

大乘理趣六波羅蜜多經

罽賓國三藏般若譯



大乘理趣六波羅蜜多經

大乘理趣六波羅蜜多經序	3
① 歸依三寶品	6
② 陀羅尼護持國界品	32
③ 發菩提心品	57
④ 不退轉品	64
⑤ 布施波羅蜜多品	99
⑥ 淨戒波羅蜜多品	131
⑦ 安忍波羅蜜多品	162

⑧	精進波羅蜜多品.....	189
⑨	靜慮波羅蜜多品.....	212
⑩	般若波羅蜜多品.....	265

大乘理趣六波羅蜜多經序

大朴既散，有為遂作。名利牽乎代，巧智喪乎真。愛惡攻其性情，因緣堅其染習。內則百慮無節，外則六根競誘。天理滅而莫知，道源迷而忘返。淪溺苦海，劫盡還初。惟至人了萬物之宗，越三界之表，廓獨立而不改，遍諸有而常然，故能開導群疑濟拔流品。

六波羅蜜經者，眾法之津梁，度門之圓極也。

昔，日月燈明如來為菩薩說，歷劫曠遠真偈寂寥。文殊師利往於耆闍會中，嘗與彌勒菩薩語及斯事。成一切種智，會無量義因，唯佛能知，唯佛能說，教必有主，其在茲乎！

是以釋迦如來，為法而出，俟時而現。三身不異，故處代而常離。萬行無

修，故隨方而自在。運慈悲之力，開護攝之門。因其六塵，示之六度，導於法分，令證法身。結習紛綸，乘理而悟，是真般若之旨也。

故，有慈氏善問，大音讚言，天垂寶花，雲集仙蓋，甘露流液，光明燭幽。使迷方淺深，皆得自然之慧。恒沙億眾，能通般若之智。

嘗試論之。先儒有言：「誠者自成，而道自導也。」夫誠已於內，則不勉而中、不思而得。誠物於外，則不言而應、不為而成。其內者，證法之身。其外者，大悲之力。德產之致也密，化育之功也大。春風發吹，萬類咸滋。旭日昇晝，群陰盡釋。乾坤易簡之道，是則大同。神明幽贊之情，孰云區別。殊塗一至，其理固然。

朕虔奉丕圖，保乂蒸庶。思建皇極以昇大猷，遐想靈蹤期於叶契。而舍城妙

說，久祕梵文。徒懷瀉瓶，未啟遺夾。微言不昧，將或起予。

於是，罽賓沙門般若，受旨宣揚。光宅寺沙門利言，為之翻譯。時，大德則有資聖寺道液、醴泉寺超悟、慈恩寺應真、莊嚴寺圓照、光宅寺道岸、西明寺圓照、章敬寺辯空、西明寺良秀等，法門領袖、人中龍象，證明正義，輝潤玄文。知釋迦之寶城，識眾尊之滿字。以貞元四年，歲次戊辰十一月二十八日，於西明寺譯成上進，凡一部十卷，龍神翼衛，如從金口之傳。梵眾護持，無異毫光之現。

朕齋心滌慮，仰味宗源。聞所未聞，實為希有。

然，以汲引之旨，流布為先。庶憑真筌，永濟浮俗。聊因暇日，三復斯經。雖法海甚深，而波流不讓。舉其梗概，照悟將來。

唐代宗製

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

大乘理趣六波羅蜜多經

① 歸依三寶品

如是我聞：一時，薄伽梵在王舍大城，迦蘭多迦竹林精舍。

時，與眾多菩薩摩訶薩，住不退轉，位階十地，十波羅蜜多悉已圓滿。

復有眾多諸大苾芻，皆阿羅漢，諸漏已盡，無復煩惱，逮得己利，心善解脫、慧善解脫。

復有阿僧企耶諸有情等，皆發阿耨多羅三藐三菩提心。

爾時，慈氏菩薩摩訶薩，於此會中，而作是念：此會眾中諸有情類，貧窮孤露，無所依怙，流轉生死，沉溺愛河。欲達彼岸，為聞法故，願見世尊求一切智，無有力能。

爾時，慈氏菩薩為欲諮問甚深義趣：一切有情，云何發菩提心，求佛決定，三無數劫，無有疲倦？今佛世尊意趣難解，廣大甚深，文句巧妙，具足圓滿，記別有情因果差別，希求速疾無上菩提。

於是，彌勒菩薩摩訶薩發如是心，即從座起，整理衣服，善調六根，身口意業皆悉寂靜。然，其六根百福所生妙相莊嚴八十種好，三無數劫之所圓滿。摩訶般若波羅蜜多等百千萬日光明相莊嚴其身。一切有情瞻仰無厭，近無等等佛

果菩提。以如是身，往詣佛所，五體投地，禮佛雙足。又，以無量功德莊嚴之手，如新生蓮花，合掌恭敬，而白佛言：如來世尊於一念中，能知一切有情過去未來現在之心。或有有情，因諮問時，獲清淨心。或有有情，受記之時，獲須陀洹果乃至阿羅漢果、辟支佛果，或得阿耨多羅三藐三菩提記。為此義故，仰諮如來。惟願世尊分別解說。世尊今為三世有情所依之主。或有有情，行大乘行，其心柔和。惟願世尊慈悲愍念，獲甘露法不獨受用而同其味。云何令諸有情趣大涅槃安隱正路？此等有情當作何事，於一切智得不退轉？云何圓滿檀波羅蜜，乃至般若波羅蜜多？又，此般若波羅蜜多，與前五種波羅蜜多，而為其母，云何修習而能圓滿？又，此大願云何顯發？又，諸有情云何修習涅槃彼岸？惟願世尊分別解說，為欲利益安樂一切有情，令得歡喜。

爾時，薄伽梵讚慈氏菩薩摩訶薩言：善哉！善哉！善男子！汝今乃能利益安樂一切有情，問是深義。勸諸有情修善業故，常為有情勤修習故。汝今一心廣為有情頓絕羈鎖勤求法故。汝今以此大慈悲心，於三阿僧企耶圓滿六種波羅蜜多大海法故，汝今已近菩提道場涅槃岸故。猶如明星沒已，旭日便照。汝今亦爾，當作佛日。

汝今諦聽，善思念之。我今為汝具足分別甚深之義。如有智人能善思惟，觀察生死險道之中，莫能過於無所依怙。

譬如大海舟船而無商主，其中有情多所漂溺，涌浪洄復，破壞沉沒，種種諸難，常有憂患，求於吉祥無上船師以為依怙。

又，諸有情於生死中常多恐懼，所以求於力勢之人而為恃怙，不被怨賊之所

侵害。縱彼怨賊有大狂力，為此之人依附王者，而彼怨賊必無更能作損害者。又，彼怨賊既見力勢，永捨怨心，順從正化。

一切有情，亦復如是。各作是念：「誰能與我作歸依處，除其衰患，令得安樂？於此三界五道之中，天、龍、藥叉、阿蘇羅、迦嚕囉、健達婆、緊捺羅、摩怛洛迦、人非人等，諸眾之中，而求覓之，無有能為作歸依者。所以者何？彼諸天等，自未能免生死羈鎖煩惱繫縛，流轉三界，無量無邊眾苦吞啖諸怖畏事，以貪欲網之所纏縛，況能為我作歸依處！又，諸天等常被甲冑鬥戰之具，心懷怖畏彼阿蘇羅，而況於人及餘諸趣！以是觀察三界六道，無有堪能拔濟我者。以是應當歸依佛法僧。除佛法僧，更無有能救護我者。一切有情，若欲求於阿耨多羅三藐三菩提涅槃樂者，應當歸依佛法僧寶。」以是因緣，令諸有情

歸佛法僧。

爾時，慈氏菩薩摩訶薩白佛言：世尊！云何名為佛法僧寶？云何歸依？

佛告慈氏言：佛寶者，則有二種：①佛身，②佛德。

言佛身者，所謂：如來、應供、正遍知、明行足、善逝、世間解、無上士、調御丈夫、天人師、佛世尊。已於過去無量無邊阿僧祇劫，不惜身命，勤修六度，萬行圓滿。菩提樹下，坐金剛座，降伏魔軍，斷諸結賊，獲一切智，成等正覺。具足如是諸妙功德，號之為佛。

言佛德者，即佛身中，具足十力、四無所畏、十八不共法、大慈大悲大喜大捨、三解脫門、三示導、六神通、隨心三摩地、四智、二智，離於知境，斷煩惱障及所知障，離諸習氣，無功用道，起如如化。若遠若近，遊止自在，無有

障礙。於一芥子，能納無量諸妙高山。如是功德，無量無邊，諸佛如來悉皆具足。

又，從一劫至無量劫，壽命自在，無能損減。於神境通，往來變現，無有障礙，隨意自在。

諸佛世尊之所經行城邑聚落，先放微妙金色光明照耀其處。其中眾生遇斯光者，身病心病皆得除愈。心火滅已，身得清涼。僂者能申、跛者能行、盲者得視、聾者能聽、瘖者能言。其心亂者，便復本心，鬼魅癡狂魍魎所持，悉皆除愈。裸者得衣，憍慢心者而得謙下，憂惱者心安隱，失道者得正路，飢渴者得飲食，囚繫者得解脫，恐怖者得無畏。丘陵坑坎、山澗堆阜，皆悉平正，猶如抵掌。門第卑小，自然高大。衢路隘狹，並皆寬廣。市肆塵里，自然開豁，穢

惡不淨，應時香潔。荊棘毒刺瓦礫沙石，悉皆不現。日光晃耀，而無炎毒。香風和暢，無諸塵坌。白鶴、孔雀、鸚鵡、舍利、迦陵頻伽、拘枳羅、拘那羅、命命等鳥，其聲美妙出和雅音。象、馬、牛、羊、水牛、犛牛、犏牛、竹牛，各出本音，其聲微妙。箏、篳、簫、笛、琴、瑟、鼓、吹，如是樂器，不鼓自鳴。及餘種種巧妙希奇諸神通事，悉皆變現。如是種種諸希有事，日日各異轉加殊勝，皆是如來威神之力。

若有眾生疑佛世尊及佛功德有一異者，當作是說：「佛與功德不一不異。」譬如燃燈，膏炷與明，不一不異。離於膏炷，無別燈明。若言燈明離膏炷者，明所及處，悉應焚爇。

佛身功德，亦復如是。此微妙身，是佛功德無漏法身，自他受用平等所依。

然，此佛身亦非是體。離是體外，無別法身。

若是體者，同於外物有四大相。故知非相亦非無相。若非相者，同大虛空。同太虛者，性即是常，無方便過。自性清淨無染無著，甚深無量，無有變易，難解難知，微妙寂靜，具無邊際真常功德，絕諸戲論。唯佛證知，非餘所及，亦非譬喻之所校量。

慈氏！當知：如此身者，即是過去未來現在殞伽沙等諸佛世尊法身之相。

佛報身者，謂：諸如來三無數劫，修集無量福慧資糧所起無邊真實功德，常住不變，諸根相好，智慧光明周遍法界，皆從出世無漏善根之所生故。不可思議，超過世智。純熟有情，為現茲相，演無盡法，廣利無邊。

慈氏！當知：此即如來報身圓滿。

言化身者，為彼有情隨所應化，故現無量阿僧企耶諸化佛身。其所化身，或於地獄以現其身，度彼有情，令離眾苦。導以正法令發勝心，便生人天受勝快樂。於佛法中深生信樂，得佛法分，獲聖道果。或生鬼趣，化彼有情，令離飢渴種種逼迫，化以正法，使發勝心，便生人天受諸快樂，深入佛法得聖道果。或化傍生在於彼趣，或作迦嚕囉身，或作龍身，或作師子、象、馬、熊、羆、虎、豹、豺狼、野干、狐、兔、蜃蛇、蝮蝎、魚、鼈、黿、鼉、白鶴、孔雀、鳳凰、鴛鴦、鸚鵡、舍利，種種之身，令諸有情，離相殘害，慈心相向，能離種種諸怖畏事。示以正法，令深信樂歸佛法僧，得生人天，獲諸快樂。得佛法分，證聖道果。或化有情於餘國土，或日月光所不能照，如是種種無佛法處，建立正法，令諸有情歸佛法僧。剃除鬚髮，受佛禁戒，而作苾芻及苾芻尼，或

作鄔波索迦、鄔波斯迦，建立僧坊，護持正法，安立無量無數有情，置於人天涅槃彼岸，而得果證。或生天趣，化彼有情，令離五欲，心無染著，導以正法發菩提心，歸佛法僧，深入正法，置於涅槃解脫果證。或生人趣，現處王宮，生釋種家，以巧方便化諸有情，斷除三界煩惱憂患生老病死，故現受生、踰城出家、菩提樹下取吉祥草、坐於道場，處金剛座、降伏魔軍，成等正覺、為化有情，轉正法輪。放大光明，周遍一切，照曜世間，自利利他，悉皆圓滿。或現寂靜入大涅槃，是即名為佛化身也。

如是種種善巧方便，無量無邊，皆是如來自在神力。此即三身，體無異相。

爾時，薄伽梵告慈氏菩薩摩訶薩言：善男子！於意云何，若有善男子善女人歸依佛者，當歸依諸佛清淨法身。

若欲求於佛法身者，當作如是發大誓願：「願我及彼一切有情，當得如是功德法身。」

云何，乃令發如是願？為佛應身，剎那遷變。化身佛者，疾入涅槃。功德法身，湛然常住。以是歸依清淨法身。

歸法身者，即是歸依過去未來現在諸佛。若我捨於眾生取涅槃者，即同受於地獄諸苦。若與有情同解脫者，雖處地獄，無異涅槃。以是因緣，令諸眾生，歸佛法身，證涅槃樂。究竟如如，體無增減。如是法身，是真安樂。是故，但令歸佛法身。

復次，慈氏！云何名為清淨法寶？

言法寶者，亦有三種。云何為三？第一法寶，所謂：涅槃甘露解脫，常樂我

淨，而為體性，能盡一切生老病死憂悲苦惱。

云何生苦？謂：依父母牝合之時，不淨種子處母胎中。業力風持，時經九月。住居黑闇，無有光明。生熟藏間，污穢不淨，八萬戶蟲之所和雜。出息入息，隨母而行。口不能言、眼不得視，飢渴寒熱種種諸苦，逼切身心。如是諸苦，無量無邊，令諸眾生不得自在，故名生苦。雖受此苦，而有一德，一切怨家所不能見，亦不能說是非過惡。無比涅槃安樂法中，無如是苦。

云何老苦？所謂：眾生從少至老，時節代謝。所有充實，悉皆損減。筋力衰朽，行止戰掉，髮白面皺，眼耳昏暗，牙齒疏缺，顏貌醜陋，身相傴僂，人所惡賤。所有言教，隨說廢忘。而以此身，為其重擔。譬如燃燈，膏油既盡，不久將滅。老亦如是，壯膏既盡，不久將死。又如蘇莫遮帽覆人面首，令諸有情

見即戲弄。老蘇莫遮亦復如是，從一城邑至一城邑，一切眾生被衰老帽，見皆戲弄。以是因緣，老為大苦。除非死至，無藥能治。雖受老苦，而不厭之，祈禱神祇，恒願長壽。無比涅槃安樂法中，無此老苦。

云何病苦？所謂：地水火風互相違害，種種諸苦來集其身。一切眾生，無問老少，皆共有之。安樂適身，勝妙五欲，金銀珍寶、家族眷屬，悉皆捨離。所有教詔，男女親戚，皆不承順。一切怨家，詐來親附。如此病苦，皆不願求。以是，當知病為大苦。安樂涅槃無比法中，清淨寂然，無斯病苦。

復次，慈氏！云何死苦？所謂：眾生氣絕識滅，無所覺知。一切苦中，莫過死苦。生老病苦，五趣之中，有無不定。此死苦者，皆共有之。譬如貧苦，能却榮華。如怨憎苦，能却親愛。死苦若至，不揀老少愚智貴賤，一切盡却。捨

此身已，入幽闇處。衣服臥具、一切財寶，莫能用之。裸露而行，復無伴侶。貨財不免，披訴無地。咄哉！無常，能作斯害，甚大鄙惡，不揀怨親。三界眾生，無能免離，皆被死伐，何能救之。設轉輪王那羅延力，皆被擒獲。當知死苦，無量無邊。以是觀之，死為大苦。解脫涅槃無比法中，寂靜安樂，無茲死苦。

譬如有人，瀑河漂溺。登陟高山，得免怖畏。眾生亦爾，常為一切生死瀑河之所漂溺，登涅槃山，離生死畏。

亦如天雨，能除毒熱塵穢等障，人民安樂，身意清涼，百卉滋茂成就果實。

如來法雨亦復如是，能除一切煩惱毒熱，眾生安樂解脫清涼，滋長一切白淨善種，成就果實，令得涅槃。以是因緣，諸佛世尊捨無常身，證涅槃樂。

爾時，世尊欲重宣此義，而說偈言：

如來妙體即法身	清淨解脫同真諦	如日與光不相離	如來功德即涅槃
真我與佛無差別	一切有情所歸趣		
生死涅槃等無二	其性不壞無造作	垢淨如如性不異	唯佛世尊獨能了
眾生悉有如來藏	三寶於是現世間	一切有情入佛智	以性清淨無別故
佛與眾生性不異	凡夫見異聖無差	一切眾生本清淨	三世如來同演說
其性垢淨本無二	眾生與佛無差別	空遍十方無分別	心性平等亦復然
譬如一切眾生界	遍在虛空受生滅	諸根生滅亦如是	處在無為界亦然
譬如虛空火不燒	生死不壞無為性	地水風輪轉相依	虛空無有所依相
蘊處界三亦復然	恒住業種煩惱性	彼業煩惱住何處	常居妄想無明源

妄想之心何所居	恒在無為淨心性	蘊處界三假施設	一切法性本無住
業惑相持如地水	妄想轉動猶如風	心性本淨如虛空	妄想依空無所有
煩惱業苦從妄起	業苦還為煩惱因	惑業循環無定居	無因無緣無所會
無生無滅性空寂	本體光明智清淨	自性無生無變異	煩惱無明垢所覆
亦如瞽眼見二月	眾生二執亦復然	煩惱猶如眾蜜蜂	其蜜即喻如來藏
此蜜眾蜂共圍遶	智者護身能取蜜	無相六度為方便	而能證彼法界身
譬如五穀穉未除	不堪與人充美饌	菩薩煩惱糠未遣	不能施人甘露飯
行人遺寶落穢處	設經萬歲無損污	天眼見寶知所在	收取洗拭隨意用
佛見眾生性無二	為欲滌除煩惱穢	大乘甘露而為水	滌盡塵勞佛性現
譬如新生五穀芽	說米有無未決定	佛性不離有無中	唯佛自證方明了

法寶自性恒清淨 諸佛世尊如是說
客塵煩惱之所覆 如雲能翳日光明 無垢法寶眾德備 常樂我淨悉圓滿
法性清淨云何求 無分別智而能證
譬如池水淨無垢 其中蓮花妙無染 如月蝕已重光明 亦如皎日出雲翳
無垢功德遍莊嚴 滌除煩惱光明現

佛告慈氏：當知第一法寶，即是摩訶般若解脫法身。

復次，慈氏！應知第二法寶者，謂即戒、定、智慧諸妙功德，所謂三十七菩提分法，謂：四念住、四正斷、四神足、五根、五力、七覺分、八聖道。此三十七法，與前清淨法寶，而為方便。

云何方便？以修此法，而能證彼清淨法身。當知此即第二法寶。

復次，慈氏！云何名為第三法寶？所謂：過去無量殞伽沙等諸佛世尊所說正法，我今亦當作如是說，所謂：八萬四千諸妙法蘊，調伏純熟有緣眾生，而令阿難陀等諸大弟子，一聞於耳，皆悉憶持，攝為五分：一素怛纜、二毘奈耶、三阿毘達磨、四般若波羅蜜多、五陀羅尼門。此五種藏教化有情，隨所應度而為說之。

若彼有情，樂處山林，常居閑寂修靜慮者，而為彼說素怛纜藏。

若彼有情，樂習威儀護持正法，一味和合令得久住，而為彼說毘奈耶藏。

若彼有情，樂說正法，分別性相循環研覈究竟甚深，而為彼說阿毘達磨藏。

若彼有情，樂習大乘真實智慧，離於我法執著分別，而為彼說般若波羅蜜多藏。

若彼有情，不能受持契經調伏對法般若，或復有情造諸惡業，四重、八重、五無間罪、謗方等經、一闡提等種種重罪，使得銷滅速疾解脫頓悟涅槃，而為彼說諸陀羅尼藏。

此五法藏，譬如乳、酪、生酥、熟酥、及妙醍醐。契經如乳，調伏如酪，對法教者如彼生酥，大乘般若猶如熟酥，總持門者譬如醍醐。

醍醐之味，乳、酪、酥中，微妙第一，能除諸病，令諸有情身心安樂。

總持門者，契經等中，最為第一，能除重罪，令諸眾生解脫生死，速證涅槃安樂法身。

復次，慈氏！我滅度後，令阿難陀受持所說素怛纜藏，其鄔波離受持所說毘奈耶藏，迦多衍那受持所說阿毘達磨藏，曼殊室利菩薩受持所說大乘般若波羅

蜜多，其金剛手菩薩受持所說甚深微妙諸總持門。如是教門，能除有情生死煩惱長夜黑闇，速能出離，證解脫果。

譬如明燈，能除暗暝，使得見道。佛亦如是，燃智慧炬能照有情十不善闇，使見善道。

設彼有情慳吝財寶，聞此法已，便能惠施一切貧窮。若有惡業眾生，聞此法已，捨惡修善。若瞋恚者，便能忍辱。懈惰有情，聞已精進。散亂眾生，聞已寂靜。愚癡有情，聞是法已，便發智慧。得智慧已，悉能迴心修種種善。

又，諸有情聞此法已，閉惡趣門，開涅槃路。猶如甘露證解脫果。

當知：此即第三法寶。

是三法寶，一切眾生應當歸依無為法寶。一切法中，最尊最勝莫過無為。

何以故？以於生死大苦海中，能為船筏，能作有情甘露良藥。又是殞伽沙等諸佛菩薩三無數劫六度萬行所證之果。

如是妙法功德圓滿，以是歸依無為法寶。

若有眾生受持經者，當發是願：「願我歸依如是法寶」。歸是法已，願令六道一切眾生，亦發是願：「我今歸依」。亦令有情安住於此功德法中，引至涅槃真實寶所。

慈氏！當知：此即名為第三法寶。

復次，慈氏！云何名為真實僧寶？

言僧寶者，亦有三種：

①第一義僧，所謂：諸佛聖僧，如法而住。不可覩見、不可捉持、不可破

壞、無能燒害、不可思議。一切眾生良祐福田。雖為福田，無所受取，諸功德法常不變易。如是，名為第一義僧。

②聖僧者，謂：須陀洹向、須陀洹果，斯陀含向、斯陀含果，阿那含向、阿那含果，阿羅漢向、阿羅漢果，辟支佛向、辟支佛果，八大人覺三賢十聖。如是，名為第二僧寶。

③福田僧者，所謂：苾芻、苾芻尼等，受持禁戒，多聞智慧，猶天意樹，能蔭眾生。又如曠野磧中，渴乏須水，遇天甘雨，霈然洪霏，應時充足。又如大海，一切眾寶皆出其中。福田僧寶亦復如是，能與有情安隱快樂。又此僧寶清淨無染，能滅眾生貪瞋癡闇，如十五日夜滿月光明，一切有情無不瞻仰。亦如摩尼寶珠，能滿有情一切善願。如是，名為第三僧寶。

是三僧寶，一切有情云何歸依？

應作是說：「當令歸依第一義諦無為僧寶。所以者何？以是無為常住僧故。而此僧寶，無漏無為，不變不異，自證之法。歸依如是無漏僧寶，能滅有情一切苦故。復願有情當獲如是無漏功德，得此法已，演三乘法，度脫有情。我所歸依佛法僧寶，不為怖畏三惡道苦，亦不願樂生於人天，誓救有情出生死苦。是則名為歸依僧寶。」

復次，慈氏！若有眾生歸依三寶，應發是心：「我今此身，已生人趣，得離八難，難得能得，以善方便，當習一切勝妙之法。若我違於如是上願，不求善法，則為自欺。亦如有人乘船入海，至於寶所，空手而歸。如是，歸依佛法僧寶，脫苦方便。若不歸依，後悔何及。」既知是已，當須勉勵，精勤修習，速

願成就。善法既成，過去罪愆，應當懺悔，使令除滅。

復作是說：「我從無始生死已來，身口意業所作眾罪，無量無邊，皆從虛妄顛倒心起。而於父母、和上、師長、佛法僧寶，尊重之境，所作諸罪，今皆懺悔。復為二事，造作諸罪，極重惡業如妙高山。云何為二？①親愛，②怨嫌。若於生死急難之中，而彼二類怨親有情，而於我身不能利益，應作如是遍觀察之，彼與我身，悉歸磨滅，而我云何乃作斯罪。又，於十方世界一切有情造諸善業，及學無學獨覺、聲聞，佛及弟子一切賢聖，我皆隨喜。復次，於無始際生死輪轉，受五趣身，無量怨親於我未曾獲得毫釐利益之事，現在未來亦不可得，我於無始，為彼怨親，所作諸罪，我願自受，誓不擾他一切眾生。若我重患之時，求親愛人慈心瞻省，扶侍我身，摩挲沐浴，供給飲食，病瘦醫藥種種

相資。雖則如斯，而於我身病苦之中無相代者，況於未來而能救我生死大苦！而我此身，於現世中，無依無怙，何況未來！我身既然，有情亦爾，自我及他皆無恃怙。是故，歸依真實三寶。何以故？以常住故。譬如有智之人，於險難中，求有力者以為救護。眾生亦爾，生死險難，歸依三寶以為其主，方能越渡生死大河。我若得已，亦為其主，覆護一切苦難眾生。」

能發如是大誓願者，得大信心，而於佛前，長跪合掌，偏露右肩，作是歸依佛法僧寶。

譬如世間貧賤之人，一切有情，見皆輕蔑，策役驅使，種種呵罵陵辱其身。既被輕賤，遂求尊貴有力之人以為其主，便能免離種種欺辱。有情亦爾，或生惡趣及在人中，恒被諸苦逼迫其身，為求免離，歸依三寶，如是諸苦，悉得解

脫。

歸依三寶已，復發是願：「願我救護一切眾生，渡生死海，到涅槃岸。如大商主，導諸商人，度大曠野沙磧險路，至無畏處。三寶導師亦復如是，導引有情度空曠處生死長夜，至大涅槃，得無所畏。」

慈氏！當知：發心修行大乘行者，應作如是歸依三寶。

② 陀羅尼護持國界品

爾時，世尊欲說甚深理趣決定了義菩薩摩訶薩六波羅蜜多時，即於東方有大光明，金色晃耀，照王舍大城迦蘭多竹林精舍，乃至三千大千世界皆作金色。而此世界所有諸天，護世四王、釋提桓因，乃至他化自在天王、大梵天王，及日月星辰、末尼燈燭，所有光明，皆不能及，除佛世尊及彼灌頂受職菩薩二種

光已，餘一切光，皆悉映蔽，無復顯現。

又，此三千大千世界，日月威光所不照處。如是日月有大威德、有大光明，不能照彼幽暝眾生。由佛光明，令彼有情，各得相見。此諸世界所有宮殿、屋舍、牆壁、山林、草木、種種諸物，亦不能障如是光明。所有諸山，香山、寶山、黑山、雪山，及妙高山、鐵圍山、大鐵圍山、目真隣陀山、摩訶目真隣陀山，如是等山，遇斯光已，影透內外，無所障礙。下至阿鼻地獄，上至非想非非想天，悉亦蒙光，靡不照耀。

如是三千大千世界所有諸光，合成一光，而無二相。其中眾生遇斯光者，罪垢煩惱皆得消除，身心安樂。各作是念：「我等蒙光，得是安樂。」

爾時，會中忽然而有六十俱胝七寶蓮花，猶如車輪，從地涌出，香氣芬馥，

其色美妙，種種雜色，令人樂見。其一一花，復有無量無邊百千萬葉。其眾會上虛空之中，自然而有微妙寶蓋、珠網絞絡，遍覆大眾，如迦遮隣底迦，柔軟妙服，觸之悅意。其蓮花中所出香氣，周遍三千大千世界。諸世界中，所有天香、龍神等香，及餘草木種種諸香，此香及處，無復香氣。又此三千大千世界種種有情，蒙香所熏，喜不自勝，皆悉發心，煩惱罪垢一切消滅。

爾時，阿難陀見是光明希有之相，奇特殊妙，得未曾有，即從座起，整理衣服，偏袒右肩，長跪合掌，而白佛言：世尊！以何因緣現此光明奇特之相？此之光明及寶花香，昔未聞見，從何所來，而現斯瑞？惟願，世尊！分別解說，令此眾會咸悉聞知。

爾時，世尊告阿難陀：汝今當知：從此東方，有世界名曰不眴，彼有菩薩摩

訶薩名無盡藏，與六十俱胝大菩薩眾，恭敬圍繞，發意欲來，故現斯瑞。

爾時，世尊說是語時，而此大地六種震動。

彼無盡藏菩薩，放大光明、現大神變，威德自在，雨妙香花。無量諸天，以種種音樂迎彼菩薩，而為供養。

彼無盡藏菩薩與六十俱胝菩薩摩訶薩眾，而來至此迦蘭多迦竹林精舍，住虛空中高七多羅樹，皆悉恭敬，合掌向佛，異口同音，聲遍三千大千世界，讚歎如來無量功德。以微妙音，而說頌曰：

大哉大悟無染著	無礙妙智清淨眼	斷除三毒無明習	我禮無等大悲尊
遠離怖畏諸疑網	十力辯才無所畏	異道邪徒皆戰慄	自在猶如師子王
如來慧日大光明	普照十方無罣礙	無明闇障惑已盡	如日舒光照世間

無恃無依苦厄者	生老病死久漂流	真實悲愍大慈尊	能拔輪迴苦海難
無明顛倒生死源	種種妄想為波浪	二障已除智自在	遊行不染如蓮花
諸法無我本空寂	猶如谷響性皆虛	無造無受如幻化	救世大悲恒演說
佛了諸法如浮雲	亦如瀑水速流注	世法不堅愚所集	聖智能觀永斷除
佛眼猶若青蓮花	超過日月百千倍	三世人天共稱讚	我禮調御難思議
佛具如是無邊德	廣度群品若恒沙	無漏功德妙莊嚴	是故我今頭面禮

爾時，無盡藏菩薩與六十俱胝菩薩摩訶薩眾，以是微妙伽他讚如來已，從空而下，頭面禮足，右遶七匝，承佛聖旨，各就蓮花跏趺而坐。

爾時，阿難陀以佛神力，從座而起，偏袒右肩，長跪合掌，而白佛言：此無盡藏菩薩，從何所來？彼世界中，佛號何等？去此幾何？惟願，世尊！分別解

說。

爾時，世尊告阿難陀：汝自問之。彼無盡藏菩薩當為汝說。

時，阿難陀即問無盡藏菩薩摩訶薩言：族姓子！從何所來？彼世界中，佛號何等？去此遠近？惟願分別。

時，無盡藏菩薩言：汝今猶有去來之相，而未除耶？

阿難陀言：我已久知此義。

無盡藏菩薩言：汝若已知，云何更問，乃生二種分別之心？若言來者，是緣起義。若言去者，是緣滅義。何處無此生滅相耶？然，我國土無有去來生滅之相。若無去來，即是聖智所行之處。若有去來，即是世間生滅之相。若有音聲文字，亦是世間生滅起盡之相。然，我國土本無文字，亦無言說起盡之相。若

無起盡，即是自覺聖智所行之境。離文字相，是則解脫。

爾時，阿難陀白無盡藏菩薩言：聖者！我不敢問辯才大士如是深妙之義，唯問聖者所居世界，去此遠近，及佛名字，所未聞事。譬如關塞收稅之人，但有往來，不揀財寶多少有無，皆合問之。今我聲聞，亦復如是，從他聞說正法之聲，勝解修行，自求涅槃，是名聲聞。今見聖者，法應問之。我若聞已，樂欲修習得安樂故，為欲增廣大乘法故。又，一切聲聞獨覺，悉從大乘出故。所以我問：「聖者！從何所來？去此遠近？佛號何等？」

時，無盡藏菩薩答阿難陀言：如來。應。正等覺，現在不遠，何不問之？佛當為汝記莚此事。於此眾會，悉得無疑。

時，阿難陀從座而起，整理衣服，偏露右肩，長跪合掌，而白佛言：惟願大

聖世尊為我說之，惟願善逝為我說之。此會無量無邊有情，因聞此法，皆欲被精進甲修菩薩行。

爾時，薄伽梵告阿難陀曰：汝今諦聽，善思念之，吾當為汝分別解說彼佛世界遠近之事，及佛名號功德莊嚴。彼佛如來。應。正等覺，無礙無著、一切智智，汝等大眾皆應信受，勿生驚疑。

時，阿難陀白佛言：大聖世尊！我於今者，願樂欲聞。

爾時，薄伽梵告阿難陀：去此東方，過十殑伽沙微塵等世界，有世界名曰不眴。彼世界中有薄伽梵，名曰普賢，如來。應。正等覺。明行圓滿。善逝。世間解。無上士。調御丈夫。天人師。佛世尊。今現在，彼說大乘法。無盡藏菩薩從彼世界而來至此。彼佛世尊，唯以諸大菩薩，而為其眾，無有聲聞辟支佛

名，何況有實。而彼菩薩，久積淨業，布施調伏，善御六根。常行忍辱，無所障礙。堅固菩提，勤行精進。成就善巧靜慮解脫及三摩地。三摩鉢底，遊戲神通。大智光明，自在無礙。文句巧妙，慈悲喜捨，猶若虛空，悉能摧伏異道邪論。降魔勞怨，勇猛不退。成就佛智，微妙甚深。如來十力、四無所畏，辯才不斷，智慧無礙。深入緣起，能離有無，行於中道。離我、我所、有情壽命、養育士夫、補特伽羅、意生儒童。作者受者、知者見者、斷見常見，遠離一切妄執諸見。得陀羅尼素坦纜王，以如來印之所印也。普觀眾生，堅固不捨。等如一子，無有二心。演甘露法，猶獅子吼。上中下類一切有情，聞斯法已，無不獲益，速疾安住涅槃正路。三明六通，具八解脫。紹三寶種，無有斷絕。灌頂受職，當作法王。能了有情，度未度者。詣菩提樹，坐於道場。處師子座，

自在無畏，降伏魔怨。能現佛身相好具足，能轉無上清淨法輪。純以大菩薩僧而為眷屬，圍遶說法，利益有情。

爾時，會中一切眾生，聞佛說彼諸大菩薩功德法已，歡喜踊躍，不能自勝。即以無量天唵鉢羅花、鉢特摩花、拘牟頭花、奔荼利迦花、曼荼羅花、摩訶曼荼羅花，及餘種種雜花，而散佛上，及無盡藏菩薩等六十俱胝菩薩大眾之上，而為供養。歡喜自慶，而作是言：我等今日，獲大善利，得見如是大菩薩眾。若餘國土一切眾生，聞我供養得親近者，亦獲善利。聞彼菩薩功德法者，皆發無上正等覺心。

時，此會中三十六億眾生，皆發阿耨多羅三藐三菩提心。

爾時，薄伽梵復告具壽阿難陀言：彼不眴世界無諸苦難，及三惡趣，亦不聞

名，亦無五眾犯禁之名，亦無煩惱勞慮等聲，亦無女人嫉妬慳悋懈怠瞋恚亂意愚癡，亦無障蓋并諸習氣，亦無種種上中下等雜類之名，亦無三乘差別之號。佛法僧寶，平等一相。亦無魔及魔民異道邪見，亦無飢渴寒熱等事，及我我所男女等相，互相攝受種種異名。而彼世界，廣博嚴淨，以六十萬億俱胝佛刹為一佛土，亦無日月，唯以菩薩願力光明而為照耀。地平如掌，純以帝青及吠瑠璃、末尼珠等種種雜寶間錯莊嚴，又以眾寶蓮花而散其上，其花鮮明，柔軟第一，如天妙觸迦遮隣底迦衣，八重寶樹交映蔭鬱，周匝圍遶以為垣牆，種種雜花而為嚴飾。亦無沙礫坑坎丘陵、土石黑山、荊棘毒刺，唯有無量妙寶高山。雖有天人，無別異相，不假雜食而用資身。亦無便利穢污不淨，常以法喜禪悅為味。國土嚴淨，唯佛法王化諸菩薩，無有文字，亦無言說。彼諸菩薩受化之

時，來詣佛所，恭敬合掌，目不暫眴，瞻仰如來，念佛三昧自然成就。故，彼世界名為不眴。

念佛三昧，云何是耶？所謂：非色相生，亦非受想行識生，非前後邊際智慧生，亦非現在見聞所生。

佛告阿難：其念佛三摩地不可思議。於諸法無所行，而觀諸法如實相，無說無示、無相無名。此即名為念佛三昧。

爾時，曼殊室利菩薩摩訶薩即從座起，偏袒右肩，右膝著地，合掌恭敬，而白佛言：大聖世尊！若有善男子善女人，受持此六波羅蜜多經深妙理趣，得幾所福？

佛告曼殊室利菩薩摩訶薩：若有善男子善女人，於九十億殑伽沙俱胝那庾多

百千佛所，供養恭敬尊重讚歎。於意云何，此善男子善女人所得功德，寧為多不？

曼殊室利白佛言：甚多，世尊！甚多，善逝！

佛告曼殊室利菩薩摩訶薩：我今為汝分別演說。若有善男子善女人、能於此六波羅蜜多經甚深理趣大乘法寶，乃至一頌一句，受持讀誦、書寫解說、如說修行。而此功德，勝前功德。所以者何？此六波羅蜜多大乘理趣甚深法門，乃是一切諸佛之母，一切如來從此生故。

爾時，曼殊室利菩薩摩訶薩白佛言：大聖世尊！我今為欲擁護國界及受持此經典者，常為守護，為欲滌除一切障難，說陀羅尼祕密文句。

第一根本身真言曰：

南謨薩嚩尾泥 唵 嚩移濕嚩 囉

第二心真言曰：

唵 穆

第三頭真言曰：

唵 母穆

第四頭髻真言曰：

唵 菴憶穆

第五甲冑真言曰：

唵 鬘穆莎訶

第六器仗真言曰：

唵 鑿穆

大聖世尊！此陀羅尼文句，是三世諸佛法身肢節，過去未來現在諸佛之所宣說。

若有善男子善女人，於閑靜處，著新淨衣，發大殷重無分別心，誦百千遍，必得聞持，永無忘失。

若有善男子善女人，持是經者，當知此人即是法師。若有人輕毀違犯此法師者，當知即是輕毀違犯過去未來現在諸佛。

爾時，薄伽梵讚曼殊室利菩薩摩訶薩言：善哉！善哉！汝今說是諸佛真言，作大利益，擁護慈愍一切眾生，滌除障難。

爾時，普賢菩薩摩訶薩，即從座起，偏袒右肩，右膝著地，合掌恭敬，而白

佛言：大聖世尊！我亦為欲擁護國界及受持此經典者，常作守護，為欲滌除障難，說陀羅尼祕密文句。

南謨囉紇旦 南謨悉馱南 南謨阿利也南 南謨娑怒南 怛地他 唵 止
哩止哩尼 悉哩悉哩尼 呬哩呬哩尼 呬吒呬吒 翳醯兮 陀囉尼三縻
莎訶

世尊！此陀羅尼祕密文句，乃是三世諸佛之所宣說。

若有善男子善女人，持是經者，當知此人即是法師。若有人輕毀此法師者，當知即是違犯過去未來現在三世諸佛。

爾時，大聖觀自在菩薩摩訶薩即從座起，偏袒右肩，右膝著地，合掌恭敬，而白佛言：大聖世尊！我亦為欲擁護彼善男子善女人持是經者，常作守護及所

住國土，為欲滌除一切諸難，說陀羅尼祕密文句。

南謨娑滿多沒馱南 怛地他 唵 哩弭嚩 哩弭嚩 誑攞哩弭嚩 簡佗哩
弭嚩 尾止嚩 莎訶

世尊！此陀羅尼，乃是三世諸佛之所宣說。

若有人能持是經者，當知此人即是法師。若人輕毀此法師者，當知即是輕毀三世諸佛。

爾時，曼荼羅諸天菩薩皆悉集會，其名曰：金剛薩埵、金剛王、金剛染、金剛善哉、金剛寶、金剛威、金剛幢、金剛愛、金剛法、金剛利、金剛因、金剛語、金剛羯磨、金剛護、金剛藥叉、金剛拳、金剛薩埵、金剛寶、金剛法、金剛羯磨、金剛嬉戲、金剛鬘、金剛歌、金剛舞、金剛香、金剛花、金剛燈、金

剛塗香、金剛鉤、金剛索、金剛鎖、金剛鈴、金剛阿尾奢等，異口同音，共說法身種子陀羅尼曰：

唵 慕 欠 阿 吽 怛闍 紇哩 惡

此等大士諸天菩薩，恭敬合掌，前白佛言：大聖世尊！我等若見有人受持此經，乃至一頌一句，我等恭敬供養尊重是人，如毘盧遮那如來，等無有異。

爾時，六波羅蜜多菩薩具足威儀，而於佛前，各各自說陀羅尼祕密文句。

第一布施波羅蜜多菩薩說真言曰：

南謨薄伽伐諦曳 怛哩瑟拏哩 摩訶撥菟迷 吽索

第二淨戒波羅蜜多菩薩說真言曰：

南謨薄伽伐諦曳 賀囉賀囉 獲施略迺以羝 曷嚟撥囉沒馱吽發吒

第三安忍波羅蜜多菩薩說真言曰：

南謨薄伽伐諦曳 蘇囉撥底 迺以羝 騾吽爾爾吉爾吠灑 索

第四精進波羅蜜多菩薩說真言曰：

唵 南謨薄伽伐諦曳 告思爾耶 末藍微毛賀耶 吽發吒

第五靜慮波羅蜜多菩薩說真言曰：

南謨薄伽伐諦曳 呬里呬里 枳里枳里 弭里弭里 矩殺吒矩殺吒 唵

慕哩 慕哩嚩莎訶

第六智慧波羅蜜多菩薩說真言曰：

南謨薄伽伐諦曳 揭諦揭諦 波囉揭諦 波囉僧揭諦 冒地莎訶

時，六波羅蜜多菩薩天等，皆白佛言：大聖世尊！我等亦為擁護持是經者，

說此陀羅尼祕密文句。

若有善男子善女人，受持此經，乃至一頌一句。我等供養恭敬尊重讚歎，如佛無異。

爾時，毘沙門天王，亦為擁護國界受持經者，說自心真言曰：

怛地他 拘那里 阿羝鞞羝捺羝 阿娜羝 拘那里 莎訶

爾時，毘樓勒叉天王，亦為擁護國界及受持經者，說真言曰：

怛地他 阿譏儻 譏儻 敖哩 岸那哩 旃拏里 摩鄧耆 卜羯斯 僧矩
黎 沒黎灑黎 莎訶

爾時，提頭賴吒天王，亦為擁護國界及受持經者，說真言曰：

怛地他 醫黎 怒米黎 怒閉孃 怒醫黎 閉黎 閉孃 莎訶

爾時，毘樓博叉天王，亦為擁護國界及受持經者，說真言曰：

怛地他 阿尼嚩尼 窶而 怒拏迷 怒矩黎 悉哩怒哩 弭哩 怒莎訶

時，四天王白佛言：大聖世尊！我等亦為擁護國土，及善男子善女人受持經者，說此陀羅尼祕密文句。若有輕毀受持經者，即為輕毀三世諸佛。

爾時，執金剛菩薩，亦為擁護受持經者，說真言曰：

起請真言：南謨囉怛曩怛囉也耶 南謨矢戰拏 鞞日囉播拏曳 麼訶藥頌

叉捫那簸戴曳 寧羝耶 撥囉入嚩履多 拘嚕馱耶 訖栗多 比俱胝目佉

耶 嚕麼曷哩沙拏昧孕羯囉耶 的乞儼那 難瑟鷄嚕羯吒耶 撥囉捻勃多

鞞日囉賀薩多耶 薩嚩尾坌那 微那夜迦尾特問娑那羯囉耶

正說真言：怛地他 吽鞞日囉矩嚕 那怛唎吒

爾時，鈴鐸耳微那夜迦等，亦為擁護受持經者，說真言曰：

怛地他 唵 必致必致 摩必致摩必致 摩尾奢摩尾奢 摩入嚩囉摩入嚩
囉 莎訶

爾時，閻魔羅王，亦欲擁護受持經者，說真言曰：

怛地他 悉哩 尾悉哩尼 質哩 尾質哩尼 儻呬儻呬 醫醯兮 慕多撥
底 莎訶

爾時，訶哩底愛子母，亦為擁護受持經者，說真言曰：

怛地他 娜孃娜孃 頓孃頓孃 薩尾山微那夜迦喃 目佉髯磨喃 鑠訖底
悉擔磨南 磨嚩都 莎訶

爾時，摩利支天，亦為擁護受持經者，說真言曰：

怛底嚧磨寧 滿怛囉 撥娜寧 麼挽底 怛地他 遏迦末斯 末迦末斯

頰怛那南末斯 撥吐迷洛叉 唵撥吐迷洛叉 薩嚩昧以瓢 薩武撥薩倪瓢

曷洛叉 莎訶

爾時，迦嚕拏王，為欲擁護國王大臣及受持經者，說迦嚕拏王理趣真言曰：

乞史簸 唵 莎訶

爾時，真實迦嚕囉王，為欲擁護國界及受持經者，說真言曰：

南謨薩哆埵 誡嚕拏耶 沒孽囉摩訶沒孽囉 縵惹縵惹 薩嚩娜岸 摩囉

耶尾沙八索 唵涅蘇哩耶 儼袍 慕瞞誡麼哩補 鑠訖多薩那 罕覩縵寧

薩莽唵多 尾搖 賀哩多羅 簡底 嚕質囉 僧屹囉銘 捺里與捺囉

儼迦囉 捨耶 薩麼曩 泥庾底 商佉 乞史囉 沒哩娜羅 窘多 那嚩

囉 三藐佉 尾灑 乞史跋寧

時，迦嚕囉王纔說是真言已，一切惡龍毒氣皆悉摧滅，國土安寧。

爾時，大自在天王，為欲擁護受持經者，說真言曰：

怛地他 唵 怛吒耶 莎訶 悉怛吒耶 莎訶 嚩吒耶 莎訶 勿吒耶

莎訶 捨咄嚕爾屹輦怛曩耶 莎訶 南謨迦吒 尾迦吒 羯昵迦囉 播吒

羅耶耨多囉 爾瑟吒簡爾瑟吒 簡爾瑜惹難羝 誡羅 爾尾誡羅 尾捨撥

囉尾捨 阿尾捨 嚕捺囉 嚕捺嚕那 汗囊汗囊 諾賀諾賀 跛者跛者

莽他莽他 尾特問娑也 尾特問娑也 瑜倪始嚩囉 摩醯始縛囉 南謨悉

諦窣覩 播摩醯 訝慈 南謨始戰拏耶 莎訶 撥囉戰拏耶 莎訶 沃屹

囉耶 莎訶 沃屹囉諦惹耶 莎訶 戍羅耶 莎訶 戍羅匿賀嚩耶 莎訶

冰誡耶 莎訶 冰誡佉灑耶 莎訶 孽囉耶 莎訶 孽囉嚕播耶 莎訶
佉囉耶 莎訶 佉囉嚕播耶 莎訶 禰怛多囉耶 莎訶 唵特縛耶 莎
訶 唵特縛繫舍耶 莎訶 諾賀那耶 莎訶 撥者那耶 莎訶 阿目佉耶
莎訶 阿寧鞞多迦耶 莎訶 烏葛讖摩耶 莎訶 烏葛讖摩嚕涅囉耶
莎訶 瑜滿 儺尾瑟底 也失者迦失質 阿寐捺囉鞞底 孽底末底 播那
壤誡 迂嚕 茗拏囉 穀乞史 紇唎奈監 摩呼 塞建那 屹哩嚕 賀
努 鄔瑟佉 匿賀嚕 娜娑 室嚕怛囉 羅邏吒 室哩山 諾賀彌 莎訶
發吒

爾時，毘沙門天王及諸天等，各說如是陀羅尼已，俱白佛言：大聖世尊！我等若見如是法師，受持讀誦，乃至一頌一句，常作擁護，滌除一切災難苦厄，

及諸毒氣，呵罵捶打，種種疾患，魑魅魍魎不吉祥事，皆悉消滅。

佛告諸大士及毘沙門天王：汝等善能守護如是持經法師。此經名字，尚不可聞，何況盡能受持、讀誦，恭敬供養、尊重讚歎！以種種塗香、末香、燒香、花鬘、衣服，及妙寶蓋、繒綵、幢幡、香油、酥燈，以如是等百千萬種供養法師。應先發願，聞此經已，如說修行。我今以此持經法師，付囑汝等，應當擁護，乃至親屬亦當守護，令無衰患，使得安樂。

③ 發菩提心品

爾時，薄伽梵作師子吼，顯明祕密總持門已。

時，慈氏菩薩摩訶薩，即從座起，偏袒右肩，右膝著地，一心合掌，而白佛言：善哉！善哉！大聖世尊！能以大悲讚說如是祕密甘露勝陀羅尼守護法師。

惟願，世尊！哀愍眾生，宣說阿耨多羅三藐三菩提法，令諸有情，未發心者云何發心？已發心者云何修行？復何因緣於大乘心得不退轉？

爾時，薄伽梵告慈氏菩薩摩訶薩言：若有善男子善女人，欲為有情修大乘法，欲度有情置大涅槃，應當先發五種勝心。

云何為五？①於諸有情，普發平等大慈悲心。②於一切種智，心不退轉。③於諸有情，起親友想，於險難中，誓當救護。④常於有情，起負債想。⑤恒懷慚愧，何時償畢。

能發如是五種心者，速能證得阿耨多羅三藐三菩提。

復次，慈氏菩薩摩訶薩！云何於大乘中一心修行不退轉？

如往昔時，有一商人，聰慧明達，常行仁孝。恒見父母宗親貧苦，常懷憂惱

逼切身心。以何方便，而能給濟？作是思惟：「無過入海，採如意寶，而供給之，得離貧苦。」以是因緣，發勇猛心，不惜軀命，從家而出。種種方便，求覓資糧，及諸善伴、船及船師。於其中路，遇一異人，從海而還，乃問此人：「如是匆遽，欲何所之？」商人具答如上因緣：「為救貧窮，今欲入海求如意寶，以相資給。」彼異人言：「我昔離家亦復如是，為濟親族貧窮諸苦。既發家已，路經曠野，度大砂磧絕無水草，多有野象虎豹豺狼毒蛇師子，或遇劫賊大山大河，飢渴寒熱，驚懼怖畏，種種危難，與彼船師，方至大海。又遇惡風大魚惡龍，雷電雹雨，鼓浪洄復，多有留難，不可具說。雖受如是種種諸苦，尚不能獲如意寶珠，但得資身粗自供足，猶未能濟貧乏之親。今勸仁者，勿強艱苦，徒自疲勞。吾欲與仁別為經理。所以者何？然彼大海有種種難，黑風、

黑山、藥叉、羅刹、摩竭蛟龍，眾難非一。但曾聞有如意珠名，往者千萬，獲無一二。以是因緣，勸於仁者宜速迴還。」爾時，商主聞是語已，倍復增進，發三勝心，入海不退。云何為三？一者，父母兄弟宗親貧苦若斯，如何空歸，不相救濟？二者，我之親屬，昔時富有，惠我衣食，憐愍於我。今者貧窮，命不全濟，如何放捨，而欲退還？三者，我在家時，處理家務，策役驅使大小僮僕，種種呵責，如何貧苦不相賑恤，令彼歡喜而欲退還？以是因緣念酬恩德，發大勇猛，決定前進，要當入海求如意寶，得已還家，濟於親屬，恣其所用，永離艱窮。

菩薩摩訶薩亦復如是，發菩提心，觀於十方六趣四生，皆是我之宿世父母，憐愍我故，造諸惡業，墮於地獄、餓鬼、畜生受諸苦惱。

以是因緣，而自思惟：「以何方便，濟斯苦難？」

作是念已，唯有入於六波羅蜜多大海中，求佛種智，拯濟有情生死之苦。

如是思已，發大勇猛，無退屈心，精進勤求，無有懈倦。種種方便，求覓資糧、菩提善伴，法及法師。

行至中路，遇一魔王，領諸眷屬，或現天身，或顯人身、婆羅門身，或作商主、苾芻、苾芻尼身，或餘種種異類之身。而彼魔王問菩薩言：「汝今匆忙，欲詣何所？」

菩薩答言：「我為一切苦惱眾生，今欲入於六度大海，求佛種智如意寶珠，以救一切貧乏眾生。」

魔王復云：「我初發心，亦復如是，為度一切苦惱眾生，出生死家，度大流

轉，曠野砂磧，備受飢渴，盜賊恐怖，眾難非一，方至六度大法海中。或遇乞頭，或逢乞眼耳鼻舌身手足支節，心肺腸胃、肝膽脾腎，國城、妻子、奴婢僕使。如是種種，隨乞而施，不生慳悋，勤求智寶。經無量劫，生死流轉，在於苦海，雖受種種諸苦難事，猶不能獲無上菩提，而但迴求阿羅漢果，出離三界寂滅涅槃。我今勸汝：勿強勞苦，應自修持，吾欲與汝共階此果。所以者何？我念三塗，常受飢苦。心思吞啖，仰面向空，誰來入口，充我一飽。種種苦難逼切身心，人命無常過於山水。善知識者，難遭難遇，若不信受，後悔何追。生死海中，流轉不定，心如水月，何有實耶？惡知識者，易見易逢，恒樂勸人行菩薩道，捨財捨命，望趣菩提，況諸佛出興，時乃一顯，求者千萬，得無一二。以是，勸仁不須勞苦，應求解脫，自取涅槃。又，三無數劫受諸勤苦，方

能獲得佛果菩提。此生三生，證阿羅漢。一種無學，何用苦為。無智愚人，心希佛果，備歷艱苦，經無量劫，尚未聞證阿羅漢果，何況能得無上菩提！譬如有人獲一小鳥，更見有一迦嚕囉王，即放手中已所執鳥，便前捕捉迦嚕囉王。大者飛翔，小者復失。愚求佛果亦復如是，棄此求餘二果俱失。既知是已，願早迴心，於此生中，必證羅漢。」

爾時，菩薩聞是語已，轉增勇猛發三種心。云何為三？一者，一切眾生，從無始際生死已來，皆我所親，或為朋友，現受苦惱，未得免離，如何退還？二者，一切眾生，從無始已來，給我衣食，憐愍我深，今受輪迴，苦難非一，云何未報，乃生退心？三者，一切眾生，從無始際，皆我眷屬，策役驅使轉相呵責，未曾少分酬報彼恩。以是因緣，不應退屈，更增勇猛，求證菩提。若證菩

提，一切智寶，用濟生死苦難眾生。

是名菩薩摩訶薩於大乘中，一心修行，得不退轉。

復次，慈氏！當知：即是菩薩摩訶薩，修大乘行發五種心。

此五心中，一者，於諸有情，起大悲心。二者，為諸有情，求一切智，心無退轉。此二心者，於大乘法精進修行。三者，一切有情，皆我親友。四者，一切有情，於我有恩，未有毫釐用相酬報。五者，一切有情，皆我眷屬，我曾於彼起不善業，種種呵罵非理責罰，深心慚愧，何時償畢。此之三心，令諸菩薩勇猛不退，乃至證得阿耨多羅三藐三菩提。

④ 不退轉品

爾時，慈氏菩薩摩訶薩，頭面著地，禮佛雙足，而白佛言：大聖世尊！已說

菩薩五種發心，修行大乘得不退轉。然，大悲心云何發起？云何修行？惟願，如來！哀愍有情，廣為宣說，利益安樂諸眾生故。

爾時，薄伽梵告慈氏菩薩摩訶薩言：善哉！善哉！善男子！快問斯義。汝今諦聽！善思念之。吾當為汝分別解說，斷汝疑網。

所言五種心者，第一大悲心。當持此心，堅固不捨。

念彼惡趣地獄眾生，復思其苦，如契經說，汝應知之。

今於此經重為汝說。

觀諸有情，皆是宿世父母、宗親，所尊重境，今在地獄，現受眾苦。

為十三火，之所纏繞。有二火焰，從足而入，徹頂而出。復有二焰，從頂而入，通足而出。復有二焰，自背而入，從胸而出。復有二焰，從胸而入，自背

而出。復有二焰，從左脇入，穿右脇出。復有二焰，從右脇入，穿左脇出。復有一焰，從首而纏，下至於足。

然，此地獄諸眾生身，其形軟弱猶如熟酥，為彼眾火交絡焚熱。其地獄火燒人間火，如燒氎花，無復餘燼。

或有眾生，為火所燒，東西馳走，以求救護，莫知所為。

復有眾生，逃形無地，却來赴火。

復有眾生，忽被擲置糞穢深坑，坑中有蟲，其觜銛利，純是銅鐵長十六指，啄啖眾生皮骨髓腦。

復有眾生，處糖煨中，而被燒煮。

或有眾生，在鹹水中，而被漂溺。

是時，獄卒以大鐵網，從中漉出，猶若捕魚，置彼眾生熱鐵地上偃臥燒炙。次以鐵鉗鑷取其舌，復以烱銅灌注其口，悶絕而死，良久乃蘇。即欲奔馳意求免離，終無得脫。

復有鐵狗尋即逐之，鐵烏鐵觜隨飛而啄，骨肉分裂而啖食之。

遙見園林，即欲攀上，望得免脫，其林樹上，皆生鐵刺。其一一刺，長十六指，其刺炎熱。眾生欲上，刺鋒垂下，從胸而入，徹背而出，受苦無量，求脫無由。烏鷲飛來啄取雙眼，復劈其腦，取髓食之。從此欲下，刺鋒向上，眼耳鼻舌身肉手足及十指節悉皆分散，隨掛樹上，免脫無由。獄卒收取盛鐵囊中，以熱鐵棒反覆搥打。

復有眾生，手足頭髻，五處磔裂，以鋸解之。

復有眾生，內鐵臼中，以其鐵杵，從頭而擣。

復有眾生，在於鑊湯，鐵杈翻轉，煮之糜爛，唯有骨在，其命猶存。

復有眾生，處於地獄，而以紫礦，將為屋舍，縱火焚燎，其焰洞然，紫礦鎔流，滴如熱箭。

復有地獄，四面鐵山，眾生處中，二山相拶，或時南北，或復東西，二山合時，其中眾生，膿血流出。

復有地獄，而有鐵蛇纏眾生身，從足至首而銜其頭，盡力縛束，髓血集頂，吸而食之，唯殘皮骨。

復有地獄諸眾生等，而被獄卒三股鐵叉而叉其身，從兩足入，至頂及肩三處通出，其火隨叉，猛焰俱發，眼耳鼻口火出亦然。

復有地獄，以諸眾生，臥熱鐵地，或偃仆側，次黑鐵繩隨身而拼，復以斤斧而斲斫之，如工匠師治諸濕木。

復有眾生，被諸獄卒，從足至頭，剝取其皮。剝已作繩，用充韁轡，銜勒眾生上高山頂，其山熱鐵，驅迫令登，鞭撻萬般，苦不可說。

此等眾生，從無始來，皆我父母內外宗親，今者流轉在於地獄，經無量劫，常受苦惱如己舍宅。惡業盡故，暫生人天。於此造罪，還墮地獄。菩薩摩訶薩觀此眾生受諸苦已，起大悲心。

次觀鬼趣，復起悲心。見諸眾生處餓鬼中，一日一夜如人一月，以日計月十二為年，於鬼趣中壽五百歲，同於人間萬五千歲，常受飢渴，耳初不聞漿水之名，何況眼見。

然，彼餓鬼身如太山，頭如穹廬，咽細如針，其髮髮下垂覆兩肩，猶如利刀割切形體，變為猛焰燒爛其身。如火燎薪，苦痛難忍。其兩腋毛下覆腰腹，次隱處毛下垂膝踝，刀割火燒亦復如是，經無量歲受如斯苦。

或遙見水，奔赴求之，及到其傍，面仆而倒。以惡業力，其水變為膿血、糞穢，或作熱砂。其水兩岸復有獄卒，執持弓箭、刀棒、鉞斧、槍稍，斫刺，種種捶楚。飢火所燒，熱渴迷亂，尋返馳走，猛火焚熱，莫知所之。獄卒隨逐搥打斫截，手足支節悉皆損折。

復有餓鬼，朝產五子，隨產食之。夜生五子，隨生隨食。由懷飢餓，未曾暫飽。或遇天雨仰口承之，由業力故，一滴入口，流入腹中，變成猛火，直過而出。或遇夏月熱風起時，吹諸餓鬼墮砂磧中，下熱砂燒上為日炙。飢渴熱逼，

望見樹林，欲取蔭涼，奔走至彼，蔭避餓鬼，隨至皆移。何以故？昔於人間或設施會，見有乞人，慳惜不與，非理打罵而驅遣之，以是業緣，今受斯報。

復有餓鬼，於夜月時，淨無雲翳流光照觸，毒熱爍身，如盛夏時日炙無異。

復有餓鬼，於盛冬時，有大風起，由業力故，吹諸餓鬼猶若飛塵，置冰山中受諸寒苦。

從是受苦，經無量時，於此命終，還墮地獄。如是往來，經無量歲。惡業盡已，希得人身。生貧賤家，慳吝不施，以乞自活，轉增貪惜。以貧窮故，造十不善種種諸罪。從此命終，復墮地獄受種種苦。其苦畢已，生餓鬼中，如是往返，經無數劫，受如斯苦。

此等眾生，亦於過去無量無邊生死劫中，恒為父母六親眷屬，常為我故造不

善業，今在餓鬼受斯苦報。菩薩摩訶薩觀是苦已，起大悲心。

復次，慈氏！鬼趣既然，次觀傍生亦復如是。有諸羴鹿、野干、狐兔、虎豹豺狼，種種諸獸，及諸飛鳥，野鷄、鵝鴨、鳧雁、鴛鴦，如是等類，若行若住棲止飛浮，恒畏於人、大力鳥獸。若飲若食，未曾暫安。晝夜之中常懷怖懼。

復有傍生黿鼉龜鼈、魚蚌蝦蟇、室獸摩羅，水族之類，恒被網捕生死水中。

復有傍生，蛇虺蜴蜥、蚰蜒鼠狼，此類傍生，闇中而生，闇中而死。

復有傍生，蟣蝨蚤等，依人身生，還依人死。

復有傍生，或依死屍，或依糞濕，或依草木，當處而生，還當處死。或變化生，還變化死，所謂：蛆蟲、螟蛉、蠹蝨、蟬蟲、蛭蝶之類。

復有傍生，恒食膿血及諸不淨，以為甘味，所謂：猪狗、蜚蝗、蠅虻之類，

遙聞臭氣以為香美，飛走馳赴，恐不得食。

復有傍生，不食美草，唯食棘刺。不飲清流，唯飲濁水。

復有傍生，非依草生而恒食草，所謂：象馬、牛驢、駱駝騾等，畜生之類。

或以鐵鈎鈎斫其腦，令使調伏得已乘之。

或穿鼻中，或以轡勒，籠繫其首，負重而行。常被鞭撻，種種呵罵，遲疾須行。或有尪羸，起已復倒，捶楚無限，力不能前，皆由宿因今受斯苦。

或食信施，無復精勤，償他宿債遭此艱苦。

如是驅役種種鞭打，尚未還足，或取殺之，苦切萬端，陳告無所。

生乏水草，病無醫藥，死已剝剝，為人啖食。如是死已，墮於地獄。何以故？由心愚癡，不知善惡，不念父母生育劬勞，不識因果，不聞正法，亦無布

施持戒善根，但念水草，餘無所知。

此等傍生，人所畜養。除畜養外，餘類傍生，所謂：師子虎豹豺狼，及上所說水陸傍生，互相殘害，更相啖食。由是業故，生地獄中，經無量劫，受諸劇苦。地獄罪畢，復趣傍生，如是往來，經無量劫。此等傍生，亦於過去無量無邊生死劫來，恒為父母六親眷屬，常為我故，造不善業，今在傍生受斯苦報。菩薩摩訶薩觀此苦已，起大悲心。

傍生既然，次觀人趣。

有諸眾生，雖生人道，多受貧窮。飢餓長時，裸形露體。泥行雨宿，霜穫暑耘。日夜驅馳，手足皴劈。頭髮蓬亂，羸步而前。乞丐巡門，未曾一飽。至於日暮，偃臥飢眠。取給於他，無相濟者。雖有言行，人不信從。雖有姿容，反

遭輕賤。恒行忍辱饒益於人，而被嫌呵云「自怯懼」。或有文藝，人不錄之。省覲宗親，猜嫌求食。或歸信三寶，謗謂邀名。或讚歎於人，便云諂曲。或生下賤，恒不自安。繫屬於人，進退唯命，常冒寒熱，不知溫涼。汲水採薪，不辭勞倦。郎主之意，都無愍心，小有差遲，尋被鞭撻。自作自得，非天與人。薄福所招，過於死苦。譬如枯樹，枝葉皆無，一切飛禽不來棲託。薄福之人，亦復如是。

爾時，薄伽梵重說頌言：

無言稱癡闇 有語謂風狂 親近嫌諂諛 遠離云恐怖

忍辱言怯弱 歸信謂邀名 貧賤在人間 實過於死苦

復次，慈氏！當知：貧窮，極為大苦。雖常親近讚歎於人，以無福故，過患

隨生。以貧窮故，恒遭凌辱。轉造惡業，墮捺落迦。

復有豪貴族姓之人，多有僕使、象馬牛羊，親戚眷屬前後圍遶，受勝妙樂，猶若諸天。五欲迷荒，轉增貪恚，恒起我慢，凌懾於人。

爾時，薄伽梵說伽他曰：

不攝五根多放逸 貪財害己若怨家 耽荒五欲如醉人 貴賤皆招生死苦

佛告慈氏菩薩摩訶薩：一切眾生，不知現在及與未來自所造業，如影隨形。諸苦所因，貪欲為本。更不修習善法津梁，燒滅宿因，白法皆盡。從此沒已，復墮三塗。所以者何？以貪欲故，恒斷生命。恃己勢力，劫奪他財。種種方便，侵他妻妾，恣欲邪行，不擇親疏。恒起希求，作諸妄語。詭詐良善，綺飾文詞。訶毀有情，作麁惡語。傳說彼此，離間他人。眷屬諸親，不令和睦。恒

懷貪嫉，侮慢自高。瞋火所燒，善業都盡。讚諸外道，謗佛法僧。祠祀天神，以求福祐。不知宿世三寶深恩，無量劫來，為我勤苦，修習勝行菩提資糧，具一切智，號之為佛，而於生死長夜闇中，為作燈明。為歸為救、為船為筏，拯濟生靈，置於人天大涅槃岸。眾生邪見我慢貢高，猶如醉人。五欲纏縛，不修善法。從此命終，墮於地獄、傍生、鬼趣。或在人中，下賤貧窮，受諸苦惱。如被毒箭中於身心。善法不修，受斯苦報。

菩薩摩訶薩觀是苦已，起大悲心。

次觀天趣。觀彼諸天，壽命長遠，無諸苦惱。將命終時，五衰相現：①頭上花鬘，悉皆萎悴，②天衣塵垢所著，③腋下自然汗出，④兩目數多眴動，⑤不樂本居。此相現時：新生天女，皆悉遠離，棄之如草；舊侍天女，愛戀情深，

圍遶而觀。如欲捨命，哽咽悲哭，各各就前，哀號問訊。時，天報曰：「彼新天女，我亦憐愍，無有二心。云何今者，棄我如草？汝等於今，悲哀惜我。以是因緣，於舊生愛、新者生瞋。五相現前，必知死至。離天宮處美妙音聲，天上色香悅意欲樂，迷亂失念，離此宮耶？諸天會中，不得久住，我於今日，命將盡耶？如是苦惱，猶箭中心。我等，無依無怙、無親無主、無歸無救。」

失聲悲歎：「諸天快樂，而捨我耶？」又思：「善見宮城，於今將絕。帝釋寶座，朝謁無由，殊勝殿中，永斷瞻望。釋天寶象，何日同乘？眾花苑中，無復能見。鹿惡苑內，介胄長辭。雜林苑中，宴會無日。喜林園苑遊止無期。波利質多及劫波樹，白玉軟石，更無坐時。善法堂中，集議長隔。曼陀枳尼殊勝池水，沐浴無由。四種甘露，亦難得食。五妙音樂，頓絕聽聞。咄哉！大苦！」

無常迅速，令我此身獨嬰此苦，剎那生滅，而至死耶？」

諸天壽命，乃如幻夢，脫衣棄地，痛割身心，如被蛇螫，極大苦惱。瞻仰餘天：「願垂慈愍，濟我壽命。更延少日，不亦樂乎！能為我身除五衰相，勿令墮彼馬頭山處，沃焦海中。」

雖有是言，諸天聞之，無能救者。此天見已，作是思惟：「彼等諸天不能相救延我壽命，以是定知『將死不久。』」

臨命終時，其天自見當生之處，墮於地獄、傍生、鬼趣。見是相已，哽咽悲號，悶絕躡地，角眼相視，尋即命終，隨業而生，墮三惡趣。

以是當知：天中大苦，流轉不絕，無有盡期。

菩薩摩訶薩觀是苦已，起大悲心。

慈氏！當知：譬如有人，以角弓弮滴大海水。弓所得水，與大海水，何者為多？

慈氏菩薩摩訶薩白佛言：世尊！其弓弮水，極為微少。如何以此比大海乎？以是大海，極為深廣，云何方比弓弮水耶？

爾時，薄伽梵告慈氏菩薩摩訶薩言：善男子！從人天沒，墮三惡趣，如大海水。復生人天，如弓弮水。墮三塗者，受苦無量，不可稱說，不可思量。如上略說三惡趣苦，如殞伽河而得一沙，其未說者如殞伽沙。壽命亦爾，如人間壽經於百年，帝釋天中為一晝夜。以此晝夜三十為月，十二為年，壽一千年，如人間歲，總三俱抵餘六十億。以此壽量，為彼黑繩大地獄中一日一夜。以此日夜三十為月，十二月為年，滿一千年而為壽量。以此千年而於眾合大地獄中為

一日夜。以此日夜三十為月，十二月為年，滿二千年以為壽量，乃至阿鼻大地獄中壽一中劫。以是當知：地獄眾生壽命長遠。諸天臨終，以天眼觀，皆悉能知，極懷憂惱，所有欲樂，一時皆失。以其苦樂，各十六分，一分苦生，能滅天中十六分樂。

是為菩薩摩訶薩觀見諸天，臨命終時，受如是苦，起大悲心。

慈氏！當知：此即菩薩摩訶薩第一大慈悲心。

復次，應起大精進心，拔濟有情置於涅槃安樂之處。

如彼商主，作是思惟：「父母宗親，咸悉貧匱，如何方便得免艱難？」

如是思已，更無異方，唯有入海採如意珠。得已還歸，色養給侍。

作是念已，入海求之，得如意珠，置高幢上，能雨一切種種珍寶、衣服、飲

食、香花、妓樂。父母宗親隨意所須，悉令充足。

菩薩摩訶薩發菩提心求一切智亦復如是。作是思惟：「一切眾生，皆我宿世父母親屬，流轉生死，現受諸苦。以何方便而得免離？」

如是思已，更無異方，唯有入於六波羅蜜法海之中，求一切智如意寶珠以濟斯苦。

作是念已，入法海中，而求種智如意寶珠置法幢上，布大慈雲、普雨一切神通功德陀羅尼門，慚愧衣服，施為舍宅，淨戒之香，忍辱花鬘，精進之饌，禪定為床，智慧甘露以為其食，諸法空寂而為其座，以大涅槃而為寶城，諸佛菩薩為善知識。降靈如是妙寶、衣服、香花、妓樂，如意寶珠一切種智，唯除無上調御大師無能拔濟諸苦難者，永得安樂，究竟涅槃。

菩薩摩訶薩思惟是已，決定自知，得不退轉。

復發是願：「願我所生有苦難處，代諸眾生受諸苦惱。不願自證解脫涅槃，捨彼眾生，自求安樂。所以者何？一切聲聞及辟支佛，自求解脫，已入涅槃，無量無邊不可勝數，不能利樂一切眾生，不能稱揚佛身功德。菩薩摩訶薩設在三塗，能令有情，捨不善業，修習善法，免離眾苦而得解脫，況於人中！以是因緣，菩薩摩訶薩利樂十方一切有情。由此義故，忉利諸天、大梵天王、自在天、諸仙外道，恭敬供養皆悉容受。而此菩薩得不退心，三世諸佛所共稱讚與授記莖。菩薩摩訶薩修大乘者，自在無畏如師子王，一切眾生隨逐而行，永無怖畏，直至菩提。聲聞、緣覺，諸阿羅漢，聞菩薩教，深入巖窟，以衣覆頭而趣涅槃。豈同大乘修菩薩行，自利利他，無不蒙益。以是因緣，轉加精進，

寧於三塗受無量苦，終不自利而取涅槃。過現未來一切有情所造惡業，應墮惡趣受諸苦者，願集我身而代受之。我於過去及現在世。所修勝行一切善品諸功德法，願皆迴施一切有情速證涅槃。所有珍財，我願悉捨。打罵凌辱，終不加報，皆忍受之。願彼眾生，悉無罪累。無量無邊阿僧祇劫，難行苦行，我願盡行，而為眾生誓求無上正等菩提，精進修行禪定解脫，得不退轉。又，如過去無量無邊菩薩摩訶薩，精勤修習一切智智，我亦當作如是修行。所以者何？為度一切流轉有情，安置涅槃無上解脫。復願一切眾生之類，若卵生、若胎生、若濕生、若化生，若有色、若無色，若有想、若無想、若非有想非無想，我皆令入大般涅槃。一切眾生，皆令圓滿六波羅蜜，具足成就無上佛身百福莊嚴，三十二相、八十種好，項背圓光過百千日，眾生樂見，瞻仰無厭。復願十方世

界一切眾生，功德莊嚴，悉皆如佛。」

復發是願：「願捨此身，為於法界一切眾生，打罵訶責。或時，繫縛苦切凌辱，欲斷命根，種種役使，承順無違。願彼眾生，悉無罪累。」

發是願已，復更思惟：「願我速得成滿此願。復願此身，住於五趣，利益安樂一切有情。無依怙者，為作依怙。遊他國者，為作示導。入海之者，為作船筏。涉溝澗者，為作橋梁。處曠野者，為作泉井。寒凍之者，為作柴薪。盛暑炎毒，為作清涼。處黑闇者，為作燈明。疲乏之者，作軟敷具。飢餓之者，作甘美饌。渴乏之者，化作甜漿。為裸露者，而作衣服。亢旱飢饉，為雨五穀。病苦之者，為作良醫，令疾除愈壽命延長。孤惇鰥寡，而為侍者。諸貧窮者，為作伏藏。隨彼行住，不相捨離。若遠行者，為作伴侶，并作車馬令達所至。」

若邪見者，為說正法，令住正見。地獄苦者，我誓入彼地獄之中，拔濟令出。墮餓鬼者，為作清涼甘美飲食，除熱飢渴。墮傍生類虎豹豺狼熊羆師子，化作肉山，以充食啖。」

復發是願：「食我肉者，悉得充飽，不相食啖。象馬牛羊羴鹿等獸，我為彼作肥膩軟草。若諸眾生食肉啖草五穀飲食，隨意所須，悉令充足。處人趣者，隨所樂欲，我悉供給，令無所乏。」

復發是願：「願我悉得成就一切陀羅尼身，隨諸眾生所在之處，皆為救護。作如意樹及作寶瓶，出無盡財，給施一切具足圓滿。或作醫王，除其疾病。以大悲手執法關鑰，開涅槃城，示佛知見。三僧祇劫，難行苦行，救諸眾生安住涅槃真實解脫。於所生處，常勤精進，無有懈怠，利益安樂一切有情。為救眾

生處捺落迦，受苦無量，如涅槃樂。」

復發是願：「若一切眾生未得解脫，我願常居地獄，不證菩提。」

慈氏！當知：即是菩薩摩訶薩，第二精進，勤求一切智智。

復次，慈氏！行此行已，應當更發三種勝心求不退轉，乃至三無數劫精進修行，於一剎那無令間斷。

或有眾魔，作沙門形，或婆羅門形、苦行之者種種異形。於大乘中，求諸過失，勸修行者令其退轉。作如是言：「佛道懸遠，經百千劫，難行苦行，難捨能捨，國城妻子、象馬七珍、奴婢僮僕、身肉手足，無所吝惜。如是布施，經千萬劫，方證菩提。無量眾生如是修習，皆未成佛，悉已退轉，自取涅槃。設成佛果，亦入涅槃，一種涅槃，何須勤苦？汝求利益，修二種事：①求現生常

受快樂。人天種種勝妙五欲，隨意所作。小有苦者，亦勿須怖。何以故？譬如農夫，豈懼蟲鹿，不營種耶？人天快樂亦復如是，雖有小苦，快樂無窮，但自修持，何憂何怖。②自求涅槃，此生三生，得阿羅漢，自當解脫，何用勤苦，求佛果耶？若復不能趣二乘者，且受人天種種快樂，設後厭離疾入涅槃。譬如有人，用功雖少，獲利乃多。復有一人，功力極多，事不成辦。設汝布施種種艱勞，都無所成，自為欺誑。汝今與我，行住共俱，出世涅槃，進止同處。」

慈氏！當知：菩薩摩訶薩修大乘者，聞斯語已，都不信從。

作是思惟：「此是惡魔，擾亂我耳，而作障礙，欲誘誑我令退菩提。」

既知是已，復發是心：「我今不應違本誓願，受如斯語。決定進求無上佛果。」

而於大乘誓不退轉，發三種心。云何為三？

①一切有情，皆我宿世父母親友，從無始際生死輪迴，受大艱苦，於八寒、八熱十六地獄，受諸苦惱。復於餓鬼、傍生趣中，及於人、天，亦復如是。況是我之宿世父母內外親屬，而無悲戀！是故，我今誓取菩提，不應退屈。

慈氏！當知：此即菩薩摩訶薩不退轉中第一心也。

②一切有情，從無始來，既為父母。一一生處，在母腹中，寢食睡眠，不得安止，生育劬勞。以大悲心，血變成乳，長時不倦，咽苦吐甘。功德日修，願我成長。自我薄祐，夭壽而終，父母悲號，自拔頭髮，椎胸墮淚，食旨不甘。一一生中，皆有斯苦。所出目淚，其量淺深過四大海。所飲母乳，過四大河。

復次，一切有情，無始至今，以恩愛故，為我父母，種種因緣，為我捨命，

以是，至今流轉未息。若此有情，勤苦修習無上菩提，即此有情，悉合成佛。由為我故，生死無窮。

復次，一切有情，從無始來，憐愍我故，造不善業，心無改悔。若此惡業可立形相，計量積集，過妙高山。積業既然，墮三惡趣，於今不絕。以是義故，如何背恩，自取涅槃，而求解脫？譬如眾人同犯王法，繫在囹圄逃刑無路。中有一人，見牆小穴，設諸方便，自脫而行。以是因緣，免離苦難。二乘之人，亦復如是，昔與眾生，同為癡愛，繫在三界生死囹圄，求出無由。中有一人，見四諦門，知苦斷集證滅修道，獲阿羅漢，自證涅槃。修大乘者，則不如是，願共眾生同得解脫，以戒定為雙手、智慧為鈇鉞、大悲為鉤鑰，破煩惱賊，摧生死軍，開涅槃城，昇智慧殿。

慈氏！當知：此即菩薩摩訶薩修大乘者第二不退轉心。

③菩薩摩訶薩作是思惟：從無始際，流轉至今，一一有情，互相繫屬。身口意業，苦惱他人，作擾亂心，發彼瞋恚。劫奪財寶，種種貪求，斷他命根，食他血肉。如是殺害，無量無邊。設彼未終，日夜思想，以何方便斷彼命根，持其血肉，充我飲啖。又懷憍慢，恃己凌他，說彼為非，自言我是。聞他勝事，嫉妬心生。不耐他人，中毒令死。見苦難者，無有悲心，喜不自勝，何當早逝。見富貴者，意不欲之。願犯刑名，貶黜貧賤。願他苦惱，自受榮華。願他財寶日夜銷亡，願我資財日日增長。願彼憂苦，我恒安樂。彼受憎嫌，我納愛敬。他作怨家，自為親友。彼恒墮落，我得超昇。願他貧窮，我唯富有。我得智慧，願彼愚癡。無始生死，日夜思惟，以如是心自求安樂，利益向己，苦惱

屬他，無一眾生不被侵害。名聞善事，皆不願他。口許心違，常行如是。種種迫脅，令彼不安。無量無邊，不可備說。復以惡教，示導他人，現在未來，墮於險道。詐作知見，辯證他人，令損珍財，失其官爵。以離間語，鬥亂親疎。巧詐多端，令心相恨，墮於地獄，無有出期。以麤惡言，於他毀罵，如以熱箭中彼身心。乃至命終，何時暫忘。假立名字，毀訾多端，損惱眾生種種異語，或作外道邪見仙人，恚火燒心，說邪惡法。瞋恚熾盛，墜陷有情。蠱道呪術，妖魅符書，令諸眾生皆共修習，互相損害，疾病流行。壯者衰羸，少變令老。明眼令瞽，聰耳使聾。端正之者，而現醜容，貢高之者，而獲癩病。修善之者而令作惡，智慧之者使令癡狂，長壽之者而令夭喪，富貴之者而令貧賤。乃至今日未絕流行。

復念：我昔為外道師，邪見教人，非法說法、法說非法，令無量無邊諸有情類退菩提心，墮於邪見非法之中，從此命終，墮捺落迦、傍生、鬼趣。

復有眾生，於往世中，受我邪教，從嶮峻山，投身而下，入閻牟那河，便取命終，云得生天。於今不絕。

復有無量眾生，往殑伽河南、閻牟河北二水中間，有大神樹名尼拘陀，其樹端正，茂葉含翠，扶疏蔭映，地平廣博，此為施場。樹下多立三鈷鐵戟。彼諸眾生求生天者，於彼場中先行布施，次剃髭髮入河沐浴，望除罪垢然後上樹，當鐵戟上投身而下自取命終，從此死已，云得生天，無始至今，流行未絕。

復有眾生，受我邪教，常自慳惜，不行惠施。若見施者，起大瞋心。見受施人，復生恚怒。何以故？我見施者及受施人，由此業緣俱墮地獄。以是見故，

無量劫中受餓鬼苦，於今未脫。

復有眾生，受我邪教，多殺牛羊以血祀天。何以故？如是牛羊，天賜與我，我食其肉，血應祭天。無始至今，受行其教，已命終者，墮惡趣中，殘害未寧，互相食啖。以愚癡故，不得涅槃。

復有眾生，受我邪教。於佛法僧，常行誹謗。

復有眾生，受我邪教，不信三世善惡因果，言無布施，亦無供養，亦無其果，無護魔法，無善行、無惡行，亦無業果，無此世、無他世、無地獄、無餓鬼、無傍生、無天、無人、無父無母，一切眾生，猶如酒醉。造酒之人，而以麴米，溫涼調適，遂有酒名，飲則醉人，此醉豈從父母生耶？眾生亦爾，父母和合，本由染愛，而有我生。我命終已，更無有生。譬如斫樹，燒已成灰種。

此灰者，豈有樹生？我身亦爾，死已無生。以是故，知定無因果。由此而於父母師長，無有恭敬，常毀罵之，無量生中，教此邪法，令諸有情，墮於地獄。

或有外道，以火燒身。或投水中，自溺而死。或利戟上，宛轉而終。或修狗行，以口食糞，而求生天。或修牛戒，如牛行李，飲水啖草，裸露而行。不辨六親，而作姪亂。

或有外道，自餓不食，盡日而立，夜後方食。

或有外道，五熱炙身，隨日而轉。

或有外道，常翹一足。

或有外道，常奉事月，白月一日啖食一口，二日二口，乃至滿月食十五口；黑月初日減食一口，二日二口，至黑月盡但食一口，或都不食。

或有外道，常持鷄戒，散食在地，以足撥取，口拾而食，知時而鳴。

或有外道，裸形而行，無有羞恥，燻去毛髮，日中而立，隨日而轉。於盛寒際，處陰影中，當風而立。

或有外道，斷人命已，而取髑髏，盛其飲食。

或有外道，裸形無恥，以灰塗身。

或有外道，炭墨塗身。以人髑髏支節諸骨，以為瓔珞花鬘環釧身首莊嚴。

或有外道，馬尾駿髦織為衣服。

或有外道，樹皮為衣。

或有外道，鷲毛作衣。

或有外道，鷄毛為衣。

以如是等外道邪法教諸眾生，以口業故，無數眾生，至今愚迷，不得解脫。復從無始乃至於今，以身惡業苦惱眾生，作獄卒身。手執鐵鉗，磔眾生活，灌注烱銅。又以鐵槌，打碎其骨。又以鐵鋸，解諸眾生。又驅迫眾生，上於劍樹，抽出腸胃五臟而食。又以鐵索縛束眾生，擲灰河中，使受諸苦，旋即曳出置熱鐵上。如魚在鑿，宛轉受苦。又逼起坐，以熱鐵杓，盛以烱銅灌口令飲。又以鐵鉗拔出其舌，曳令長廣，鐵犁耕之。如上所說地獄苦中，無始劫來，我為此事，種種身業苦惱眾生。

又作師子、虎豹、豺狼、熊羆等獸，殘害眾生，飲血啖肉。

又作人王、宰官、士庶、長者、居士，尊位之中。枉法科稅，非理捶楚，不行王法，損害有情。

以是思惟，無始至今，五趣眾生，無不惱害，斫頭剜眼，刳耳劓鼻，截舌啖肉，敲骨出髓，斬其手足，乃至斷命。

又在人中，不作餘業，而為魁膾，畋獵漁捕，罟網矰繳，奪眾生命，所謂：牛羊羴鹿，狐兔鷄猪，魚鼈等身，分割支節，成大積聚，而以販鬻。如是殺害無量無邊，經於無量俱胝劫中，如是街賣，以自活命。

復次，慈氏菩薩摩訶薩！修大乘者應發是心，如是思惟：「我以貪瞋癡故，造作如是身口意業，誘誑損害一切眾生，現墮地獄、餓鬼、畜生，受諸苦惱。我今慚愧，深自悔責，作何方便以酬報之？如是思惟，更無方便能償斯愆，唯有志求阿耨多羅三藐三菩提，更無有能償此債者。我得無上正等覺已，於此流轉曠野磧中，廣度眾生置涅槃城安樂之處，以一切智智如意寶珠，用酬無始所

有深愆。」

慈氏！當知：此即菩薩摩訶薩第三不退轉心也。

如上三心發起修行精勤不怠。此之三心於大乘中，一心修行得不退轉。

復次，慈氏菩薩摩訶薩！以此五種發菩提心修行大乘，速能成就一切智智。

⑤ 布施波羅蜜多品

爾時，佛薄伽梵於大眾中作師子吼，廣說五種發菩提心已。

時，慈氏菩薩摩訶薩與無量無數百千俱胝諸大菩薩摩訶薩眾，文殊師利菩薩摩訶薩而為上首，皆已成就六種波羅蜜多。

復有無量大阿羅漢，諸漏已盡，所作已辦，捨離重擔，梵行清淨。

及無數俱胝百千萬億那庾多天、龍、阿蘇羅、乾闥婆、迦嚕羅、緊捺羅、摩

怙洛迦、藥叉、羅刹、鳩畔荼、薜荔多、毘舍遮、人非人等。

時，慈氏菩薩摩訶薩，在大眾中，即從座起，整理衣服，偏袒右肩，長跪合掌，一心恭敬，而白佛言：世尊已說大乘菩薩不退轉心，菩薩摩訶薩修習幾法得名菩薩摩訶薩？惟願，世尊！分別解說。

爾時，薄伽梵告慈氏菩薩摩訶薩言：若有善男子善女人，以清淨心，歸依佛法僧寶，發阿耨多羅三藐三菩提心，得不退轉，即名菩薩。生我法中，名摩訶薩。與殞伽沙等諸佛菩薩，而為法子。為彼有情，而為父母。以大福德光明照耀，過百千日，莊嚴其身。

爾時，慈氏菩薩摩訶薩白佛言：世尊！此諸菩薩摩訶薩，云何遠離？云何親近？復以何人而為伴侶？先作何事？應云何住？云何修行？云何降伏其心？云

何攝持？誰之勢力速疾證得阿耨多羅三藐三菩提？

爾時，佛薄伽梵告慈氏菩薩摩訶薩言：若善男子善女人：

應當導引五趣眾生，置於無上正等菩提，遠離外道邪法及惡知識。

應當親近修行布施、持戒、忍辱、精進、禪定、智慧具足，行大乘者，而為伴侶。

應於自身，聽聞正法，精勤誦持。

應常安住如是六種波羅蜜多，精進修行，降伏心意，攝護六根。由此勢力，疾證無上正等菩提，是名菩薩摩訶薩。

云何名為六種波羅蜜多？所謂：布施、持戒、忍辱、精進、禪定、智慧，是為六種波羅蜜多。

何故先說檀波羅蜜？

佛告慈氏：我今為汝廣分別說。其布施者，於六度中最易修習，是故先說。

譬如世間諸所作事，若易作者，先當作之。是故，先說布施波羅蜜多。

一切有情，無有不能行布施者，若藥叉，若羅刹，師子虎狼，及諸獄卒屠兒魁膾，此等眾生，於有情中，極為暴惡，尚能離慳而行布施。

云何布施？所謂：養育男女，慈念乳哺。然，此眾生雖不能知福利之事，以憐愛故，令得色力壽命安樂、離飢渴苦，亦名布施。

以是義故，於六波羅蜜多，先說檀波羅蜜。

又如一切貧窮有情，飢寒裸露，身心不安，何能造作種種事業？若與衣食，令得安樂，然後能修種種事業。

菩薩摩訶薩亦復如是，見諸有情貧窮所逼，不能發起無上信心，修行大乘種種事業。先施一切衣服、飲食、房舍臥具、病瘦醫藥，令心安樂，然後令發無上正等覺心，修行大乘種種事業。

以是義故，六度彼岸布施為門，四攝之行而為其首。猶如大地，一切萬物依之生長。以是義故，先說布施波羅蜜多。

如上所說藥叉等類，不知福田及非福田，由愛念故，施於乳哺，當作人身，富有資財，所須無乏。以此習故，所生之處，常離慳貪，給施一切，能除有情貧窮困苦。所以者何？諸菩薩摩訶薩為欲利樂諸有情故，先行布施波羅蜜多。有來乞者，皆施與之，不得顰蹙，亦不邪視忿恚懷恨而行布施。隨其所有，而施與之。不得遲疑，而生慳悋。於所愛物，衣服、臥具、飲食、湯藥、國城、

妻子、奴婢僮僕、象馬七珍，不生慳悋，隨乞與之，乃至一念不生追悔。若生疑惑，當知是魔。何以故？魔王波旬化為財寶令使慳悋，以此方便惑亂我心，於大菩提而為障礙。以是義故，不應慳悋。

如是思惟，一切珍財愛戀之心，皆應捨離。

爾時，慈氏菩薩摩訶薩白佛言：世尊！若所愛財寶，皆應布施，不生悋惜。菩薩摩訶薩為轉輪王，所有七寶千子圍遶，不知云何？譬如微細草木，處於谿澗，遇天暴雨，大水汎漲，漂盡無遺。其轉輪王，五欲自恣，雄猛自在，千子隨身，滌菩提心，皆悉漂盡，云何修習布施行耶？以是因緣，難為捨離。

爾時，薄伽梵告慈氏菩薩摩訶薩言：善男子！菩薩摩訶薩所生之處，常得富貴財寶豐足，法應如是。若為轉輪聖王，應作如是二種思惟：①思惟過去諸佛

難行之行，及佛菩薩所有教法。此轉輪王，五欲勝樂，皆從妄計分別而生，猶如幻夢。轉輪聖王，於五欲境，不起分別，不生計著，何能障礙菩提之心？②思惟一切有情，我已引入阿耨多羅三藐三菩提安樂之地，亦如過去殞伽沙等諸佛如來難捨能捨，我亦誓當作如是捨，為欲滌除慳悋之垢。發如是心：「願從今身，乃至成佛，誓以此身，捨與法界一切眾生。所修福業，若多若少，願與一切眾生共之，迴向無上正等菩提。以是觀之，我昔已捨一切身命如妙高山。觀我此身，猶如芥子，身命尚捨，何況珍財。若諸菩薩多積珍財，不行布施，猶如白象於殞伽河淨澡浴已，以鼻噏取糞穢塵土遍身塗之。我以福德淨水澡浴其身，端嚴清潔，不應慳悋愛惜財寶塗污其身。」

慈氏！當知：菩薩應作如是思惟：「若有人來乞我身皮，我即剝之，不生瞋

恨，歡喜施與。若乞身首血肉骨髓，皆悉能施。」以是因緣，菩薩摩訶薩利益安樂諸有情故，不捨生死而取涅槃。

復作是念：「我今此身，前際不來，後亦無去。父母和合不淨種子，而有我身。處不淨中生熟藏間，猶如種樹枝葉茂盛花果成實。我身亦爾，以苦為枝、憂悲為葉、欺誑為花、癡為根本，瞋恚羅剎而居此樹，又為惡業虎豹豺狼師子等獸圍遶此樹。我今暫時憩此樹下，何為愛惜此毒樹耶？而此樹身無我我所，設復有者，我亦捨之。願奉眾生，任彼所須，終無憊惜。何以故？我已捨故，不求果報、不求恩德，無所著故。所以者何？以此毒身，有三惡法之所纏繞。云何為三？一者不淨，二者極苦，三者無恩。若復有人，於此羅剎毒害惡獸圍遶眾中救拔我身，當知此人，於我大恩，而於我身作大利益。我於此人，常懷

恩德，豈更於此而惜身耶？

又此大地所有園林草木藥等根芽枝葉花果成實，而堪服食及帶持者，若以利斧斬此草木枝葉花果，分析與人，而能利益無量眾生。而此大地，不念眾生食我身分枝葉花果而得除病。彼無情物，尚不分別，而能利益一切有情，而況我身不能於他而興利益行於布施，反於乞者起我慢心輕罵凌懾？」

復於自身，內外觀察。

先觀內身。眼是我耶？是我所耶？若非我者，云何憍惜。耳鼻舌身，亦復如是，周遍觀察無我我所。

次觀外身。色是我耶？是我所耶？聲香味觸，亦復如是。

於此內外周遍觀察，皆無有我。既無有我，云何慳惜，而不施耶？

應當決定如是思惟：「願將此身速奉一切。何以故？此身無常遷變不定，剎那生滅無所有故。」

爾時，世尊而說偈言：

若他逼捨身命財 制不自由無利益 如是知已諦思惟 開心自施為最勝

迷人若悟夢幻法 內外皆捨無所著 如是布施等虛空 無我無受為最勝

復次，慈氏！若菩薩摩訶薩修行大乘求阿耨多羅三藐三菩提者，當修空法。以觀空故，心得自在。於菟伽沙佛所，得受記莂。心不退轉，而行布施，無有劬勞。檀施為刀，破慳悋賊。慳悋賊者，眾苦根本。

菩薩於此不生愛著。何以故？菩薩摩訶薩，雖有煩惱，皆是方便利物而生。

然，彼煩惱不為過失，以諸菩薩隨願生故。身口意業住無功用，得清淨故。

善調五根，無放逸故。能多利樂一切眾生，能知勝義及世俗諦。以正定水洗滌慳垢，除此垢已，於施自在，說大乘法，威光照曜。如日流輝，破諸黑闇，說法聲光，除心昏冥。

慈氏菩薩摩訶薩白佛言：世尊！以何因緣先明法施？

佛告慈氏菩薩摩訶薩：此法施者，有三種事勝於財施。云何為三？

①財施者，而有竭盡。法施增長，則無有盡。以是校量，勝於財施。

②受財施者，現在利益。受法施者，現在未來俱有利益。於無量世，恒相隨逐，無人侵奪，乃至無上正等菩提，不相捨離。

③財施者，能施獲益，受者無益。若法施者，自他俱益。由聞法故，發心速趣無上菩提。

由此三義，法施之者，勝於財施。

由行法施，名稱遠聞，一切人天尊重恭敬。以此因緣，先說法施。

若菩薩摩訶薩修習布施波羅蜜多，為三種事，與諸功德，而為其本：①能利自他。若不利他，自受世樂，非菩薩行。②於大乘中，無有退轉。③隨修少分，乃為無量功德之本。何以故？由清淨心無分別故。

譬如日出照於世間，情與非情，皆蒙利益。是日不言「我能照燭」，亦不分別情與非情。

以是菩薩所作功德，乃至布施一花一果，皆為利益一切眾生。以此功德，成無上果，悲化十方，示導一切。

復次，慈氏！菩薩摩訶薩，以施為寶，作莊嚴具，乃至成佛相好莊嚴。

云何少施功德多耶？以方便力，少分布施，迴向發願，與一切眾生同證無上正等菩提。以是功德，無量無邊，猶如少雲，漸遍世界。

復次，慈氏！施有三種：①小施，②大施，③第一義施。

①小施者，謂：以種種飲食、衣服，諸莊嚴具，財寶象馬庫藏倉廩，城邑聚落園林屋宅，及轉輪王所有樂具，而行布施。是名小施。

②大施者，輪王所愛后妃眷屬及與己身，以施乞者，是名大施。

③第一義施者，能以身命，而行布施。以無所得心相應故，名為第一義施。

菩薩摩訶薩以是三種，而行布施。是故，名為檀波羅蜜。

復次，慈氏！以食施者，當施五事。云何為五？

①施命，若人無食，難以濟命。

②施色，因得食故，顏色和悅。

③施力，以是食故，增益氣力。

④施樂，以此食故，身心安樂。

⑤施辯，若飢餓者，身心怯弱，言說謇訥不能辯了。飲食充足，身心勇銳，得大辯才，智慧無礙。

菩薩摩訶薩施飯食時，應作如是迴向發願：我施食時，施此五事。

若施命者，願與一切眾生得佛壽命長遠無盡，一劫二劫，隨願而住。

施色者，願與一切眾生得佛色身如紫金色，照曜世間，過百千日。

施力者，願與一切眾生得佛十力，一一節中皆有八萬四千六百六十三種那羅延力。

施樂者，願與一切眾生得佛無比涅槃安樂。

施辯者，願與一切眾生得佛世尊四無礙辯。

若施味時，願與一切眾生得佛無上甘露法味具足充滿，安置無比清淨涅槃。

若施漿時，願與一切眾生除其渴愛。

若施美飲砂糖石蜜甘蔗蒲萄，種種香飲，得如來口中四牙，所有飲食及諸毒藥，至此牙時變成甘露。

若施醫藥，願與一切眾生得六度藥療生死病，悉得痊除獲涅槃樂。

若施衣服，願與一切眾生得慚愧服以覆其身，離諸陋形，端嚴殊勝，獲金色身最勝無比。

若施塗香種種末香，願與一切眾生戒香塗身，悉除煩惱臭穢習氣。

若施象馬車乘輦輿船筏，願與一切眾生皆得如來隨心三昧，遊止自在無所障礙。

施橋梁時，願與一切眾生得六度橋，越生死河，至涅槃岸。

若施瓔珞，願與一切眾生得三十二相八十種好瓔珞莊嚴。

若於曠野沙磧之處，往來渴乏，為日所曝，施以井池，飲水沐浴，願與一切眾生離於流轉生死曠野，三毒炎火渴愛之苦。復願我身為法泉池，一切智水充滿其中，隨彼眾生飲水沐浴，竭生死源，得真解脫。

施義堂屋，令諸眾生，離風雨怨賊惡獸怖懼，身得安樂，願與一切眾生悉得入於涅槃堂屋。離煩惱賊、地獄寒熱、生死風雨，永無怖畏。

若施氈褥細軟敷具，願與眾生坐菩提座，自然覺悟，得真平等。

若施種種上妙衣服，願與一切眾生得三乘法衣，普覆一切苦惱眾生。

若施三寶師僧父母種種燈燭，願與一切眾生得一切智眼。

若施音樂，願與一切眾生得真天耳，十方世界所有音聲，皆悉聞知。

若於迥遠無佛法處，建立僧坊及招提舍，置諸資具飲食湯藥，願與一切眾生置涅槃城安樂之處，永離流轉生死之苦。

若施湯藥，願與一切眾生施以法藥除煩惱病。

若施僕使，願與一切眾生悉如阿難奉侍如來。

若救囚繫令得解脫，願與眾生遠離一切煩惱囚繫，得真解脫，住法王位。

若施金銀及無價寶，願與一切眾生得百福相莊嚴其身。

若施寶冠莊嚴之具，瓔珞環釧，耳璫珠鬘，種種校飾，願與一切眾生獲八十

種好莊嚴法身。

若施阿蘭若修道之處，願與一切眾生得四聖種依止之所。

若施伏藏，願與一切眾生得佛無上功德法財。

若施七寶及轉輪王位自在安樂，願與一切眾生得大力用，以妙法手拔濟眾生出十惡業，以十善水洗令清淨，以淨戒香用塗其身，除斷一切惡名臭氣，以慚愧衣服而為覆蓋，以佛功德而為瓔珞，以忍辱為花鬘莊嚴其身，以靜慮為床座安處不動，以菩提冠置於頂上，處法王位而受灌頂。

慈氏！當知：如是施者，此即名為菩薩行於小施。

復次，言大施者，菩薩摩訶薩於所愛敬貞順妻妾，及以端正孝友男女愛無雙者，以用布施。若我不捨此妻子者，云何得與一切眾生為法父母，及能憐愛一

切眾生，悲愍救護如己愛子，能令離於生老病死。

以是義故，菩薩摩訶薩一切寵愛珍惜之者，悉皆布施，乃至成佛無上菩提。

慈氏！當知：如是施者，名為菩薩行於大施。

復次，第一義施者，菩薩摩訶薩以清淨心，於自身手足皮肉骨髓頭目耳鼻，乃至身命，以用布施，心無憍惜。以此功德，願與一切眾生於當來世得佛金剛不壞之身。

若施手足，心無憍惜。願與一切眾生於生死流轉漂溺瀑河無救護者，授正法手，拔濟令出，置安樂地。

若施耳鼻舌時，願與一切眾生於當來世，悉得諸佛清淨五根。以是妙法莊嚴眾生。

若以血肉施諸眾生，如是施時，願與一切眾生當得此身猶如大地，與諸有情作依止處，亦如大水能除垢穢，潤澤枯涸，百卉滋長。又如大火，能除闇冥成就一切。復如大風，能鼓一切，開發生長，使得敷榮。

若施眼時，願與一切眾生而得佛眼。

若施頭首及施寶冠，願與一切眾生得佛無上七覺寶冠。

復次，慈氏！菩薩摩訶薩，所有世間妙好之物，不生貪著，常能惠施一切有情。所以者何？以大悲心，等視眾生，猶如一子。願與一切眾生永息貧窮，於所求願，悉令滿足，而於生死曠野之中，備七聖財，得佛智寶。

復次，慈氏！云何菩薩摩訶薩修行布施無諸過患？謂：自手營作而行布施，非嫉妬他、非畏惡名、非求恩德而行布施。為濟貧乏惛獨困苦，而行布施。是

名為施。

若為名聞而作師長，行於布施。如商賈人，非真施也。

起大悲心，不擇怨親、財物多少，而行布施，名真施也。

復次，慈氏！有二種田。云何為二？

①悲田，謂：諸孤露貧窮困苦。②敬田，謂：佛法僧父母師長。

於悲田所，不應輕賤，言「無福田」。於敬田所，不應求報。以大悲心，無所分別，等施一切，名真施也。又，布施者，勿起希求，而於財物不能捨離。或被官逼奪而行布施，或畏損失而行布施。於三寶所，不得輕慢，應生尊重，不自稱說而行布施。若以重寶無所愛著，不生我慢，亦不貢高而行布施，名真布施。

若於敬田，不生恭敬，將所厭物而施與之，不名為施。

或為家貧無妙好物，而有麤鄙，恥不施之。以是因緣，都不行施。

善男子！夫行施者，不應分別，隨其所有，來即與之，是即名為檀波羅蜜。

菩薩摩訶薩不應自恃持戒、多聞、禪定、智慧，而行布施，亦不輕慢他人貪
恚、愚癡、寡聞、破戒，而行布施，非淨施也。

菩薩摩訶薩，所行布施，無不活畏、無惡趣畏，隨其多少而施與之。以廣大
心，皆得無盡無量功德，是即名為檀波羅蜜。

若為布施，互相嫉妬，令家眷屬鬥諍不和，不名布施。

若為布施譏毀乞人：「汝今丁壯，諸根具足。何不自作營理生業，而求乞
耶？」如是施者，不名布施。

或施已追悔，而作是言：「我為愚癡，枉費財物。」如是施者，不名為施。

或希他讚歎、或怖惡名，如是施者，不名布施。

或為惡願，而行布施，不名布施。

或擇日而施，謂：白月一日、八日、十四日、十五日，黑月三日、八日、九日、十三日、十四日、十五日，如是日施，餘日不施。不名為施。

或擇時施，晨朝布施，午時不施，日暮餘時亦復如是。如此施者不名布施。

或擇人施，施與貧者，不施富者。或貧富俱施，不施病者。或與病者，不施餘類。或施此人，不施彼人。如是施者，不名布施。

或選知識顏貌端正而與好物，餘施惡物。不名為施。

或見乞者俳優鼓樂善戲談笑，而施與之，餘者不施。如是施者，不名布施。

夫布施者，不求果報，輪王、護世、釋梵諸天、刹帝利家，及婆羅門長者、居士，如是家生。而為己身自求解脫而行布施，亦不厭退生疲倦心，言：「我已施，不應更施。」如是等施，但名布施，不得名為檀波羅蜜。

復次，慈氏！菩薩摩訶薩，不為如上非法布施，以正解脫，迴向發願無上菩提，是真布施。檀波羅蜜，究竟清淨，於阿耨多羅三藐三菩提得不退轉。若能如是，離諸過失行無相施，所得功德，無量無邊，廣大如法界，究竟若虛空。菩薩摩訶薩，以如是心，若施一花、若施一果，乃至施水一滴，而於此經，受持讀誦，乃至一偈一句，令他聽聞經一剎那，所得功德無量無邊。

若復有人，從無量阿僧祇劫所行布施，以金銀七寶及餘種種上妙珍財以用布施，求轉輪王、釋梵護世，或求阿羅漢果、獨覺菩提，及餘作業，於無量無邊

阿僧祇劫，受持淨戒，所有功德。比前菩薩摩訶薩無住相施所得功德，百分千分萬分億分俱胝分乃至鄔波尼殺曇分，不及其一。而此菩薩願力所施，一滴之水投於大海，海水有盡，滴水無盡。何以故？眾生無盡故，菩薩願力，亦無有盡。虛空、法界，亦復如是。

復次，菩薩摩訶薩，如是漸次勤行精進，得大神通，昇妙高山。或至大海，獲無價寶，還瞻部洲，雨種種寶，給施有情。或雨飲食、衣服、臥具、救病醫藥。除斷有情飢渴疾病貧窮困苦。以此功德，願施有情，盡未來際常無休息。廣大如法界，究竟若虛空。

若但自利，而行布施。如空片雲，風吹即散，豈能利益一切眾生。

復次，菩薩摩訶薩，如是布施，同真際、等法界，火不能燒，水不能漂，風

不能吹，金剛堅實不能碎壞。是故，菩薩布施願力，能令眾生得大利益究竟安樂，亦令一切有情同此行願，乃至無上正等菩提，誓不退轉，常行是行，乃至涅槃，利益有情令得解脫。

復次，慈氏！如來在世，一切有情而以種種上妙衣服、房舍、臥具、飲食、湯藥、酥燈、油燈、瞻蔔油燈、種種花香，以奉供養尊重恭敬歌唄讚歎。於佛滅後，取佛舍利，起窣堵波，亦作如上種種供養尊重讚歎。如是二事，功德果報，等無差別。

由此義利，令諸有情，發殷重心，虔誠愛樂。以敬慕故，發菩提心，聽聞正法，如說修行。便能趣證阿羅漢果、辟支佛果，及諸菩薩成就十地，圓滿六度，乃至佛果無上正等菩提。

即此有情，復能勸喻諸有情等，同修勝行，乃至證得無上正等菩提。

以是義故，菩薩摩訶薩修行布施波羅蜜多，乃至施水一滴，所有利益，同真際、等法界，無有窮盡。

若行施時，不能普為一切有情迴向無上正等菩提，設以寶聚如妙高山而用布施，利益甚少。猶如芥子，易可窮盡，亦如片雲，風飄即滅。

復次，慈氏！菩薩摩訶薩，修習大乘布施行時，猶如伏藏，隨自身行。如如意樹，隨有情意，能滿彼願。

菩薩摩訶薩應，當更發二種勝心：①所有資財庫藏諸物，知自性空，猶如陽焰、夢想、幻化。②於諸有情，起大悲心。若見貧窮，起憐愍心。

發是心已，應正了知。於是財寶，不應慳悋，手自行施。願與一切有情，同

證無上正等菩提。如是之財，真我所有。設畜財物，終不為己，皆為饒益一切眾生，悉皆成就檀波羅蜜。

若我積聚種種財物，不能自施。如是之物，非是我有。用不自在同於裸形，如守藏人自無其分。無常賊來，風刀解體，所愛財物，妻妾持去，別奉他人。彼人得已，倍復慳惜。乃至命終亦復如是，展轉慳恪，終不能捨。

如是等人，暫時守護，以是當知：如是資財，定非我物。王、賊、水、火及與惡子，悉皆有分。常懼侵奪，思寄親知、寢息不安，恒憂散失。由慳不施，招此憂危。

復次，慈氏！行此施已，水、火、怨賊，不能侵奪，寢息安隱，心無憂慮。

若自手施，迴向發願。彼諸有情，方霑其分。乃至佛果，恒相隨逐。心常安

隱，離諸憂怖。若慳悋者，常懷憂惱，現在世中諸苦根本。於未來世，當知亦然。

復次，慈氏！慳悋不施所畜財物，如把草炬，逆風而行。草盡燒手，當受痛苦。若速棄者，則無諸苦。如是知已，當觀此財，猶如火炬，亦如幻焰，應速捨之，求真實果。

若慳貪有情互相讚歎：「汝有點慧，守護珍財。莫如愚人，妄行惠施。」如是之人，謗無因果，當墮地獄，餓鬼，畜生。設得為人，常多貧賤。

復次，能行施者，國王、大臣、婆羅門、居士之所稱讚。所出言詞，人皆信受。慳悋之人，不能惠施，常懷憂惱，謂施無福，當墮三塗。

復次，能施之人，一切敬愛。慳貪之輩，眾所憎嫌。能布施者，如僧伽藍，

一切人天，悉皆歸向。慳貪之人，如陷塚墓，一切賢聖皆悉遠之。亦如涸池，眾鳥不集。如是二人，處大眾中，若讚於施，聞之怡暢。若訶慳吝，赦而愧之。

復次，行布施者，諸天賢聖樂與同處。慳不施者，餓鬼畜生自然會集。

復次，行無相施，住第一義，得人法空，能利自他，究竟圓滿。

復次，慈氏！若有善男子善女人，自稱菩薩修行大乘，應當決定正念思惟：「布施功德，無量無邊。慳吝過失，亦復無量。」如是知已，決定斷除無有障礙。

見乞者來，顏色和悅，言無譏毀。若聞乞聲，歡喜愍念。譬如孝子，違離父母五十餘年，忽聞還家，不勝喜躍。聞乞者聲亦復如是，迎至家中瞻覩如佛。

發如是心：「此善知識，今受我施。除我慳貪，惡趣過失。無量利益，莊嚴我身。無上菩提，瑩飾我體。如是乞士，著弊垢衣，和顏軟語，愍我而來，是我良友。所以者何？除我身中慳貪過惡。此之乞者，是我郎主。我即奴僕，應受教命。」

發是心已，從座而起，手自捧持所施之物，右膝著地，歡喜奉施，願與一切眾生利益安樂，迴向無上正等菩提。

復於乞者，起利益心：「如是之人，即是能行天如意樹。若無是者，如何得度生死曠野，不乏資糧，達於人天涅槃彼岸。」

以是當知：人天安樂無上解脫，皆因乞者，而得成就。

復次，慈氏！若時乞者，至菩薩所，起大希望。菩薩是時，家貧無物，應當

軟語慰諭彼人，無令瞋恨，不生疑惑，令悉有無。以是因緣，歡喜而去。

復次，菩薩摩訶薩，行布施時，應當慈悲寬其心意。所有乞者，任彼往來，隨其所須，皆不遮恪。

復次，慈氏！一切財物，無常敗壞，眾苦之本。如身瘡疣，烏持敗肉。其慳恪者，不自食用。功德不修，復不與人。堅守財寶，亦復如是。當知：此人非行施者，不名菩薩，於大乘法不發勝心，亦不能成不退轉位。譬如大海不宿死屍，大乘海中不容慳者。

菩薩所以修大乘行，為欲遠離一切罪垢、具修功德，於佛法中不生疑慮。於諸有情及諸財寶，一切時中，心無分別，常行惠施，利樂群生。以如是行，圓滿布施波羅蜜多，速得成就阿耨多羅三藐三菩提。是則名為第三勝義檀波羅蜜

多。

⑥ 淨戒波羅蜜多品

爾時，佛薄伽梵於大眾中作師子吼，廣說布施波羅蜜多已。

時，慈氏菩薩摩訶薩，合掌恭敬而白佛言：大聖世尊已說修大乘者興大悲心行布施波羅蜜多。以何方便，而能圓滿淨戒波羅蜜多？何名淨戒？防何過失？云何護持而得清淨？設護淨戒，現在未來有何果報？云何守護當證阿耨多羅三藐三菩提？惟願，世尊！分別廣說，利益安樂一切有情。

爾時，如來．應供．正遍知．明行圓滿．善逝．世間解．無上士．調御丈夫．天人師．佛世尊，讚慈氏菩薩摩訶薩言：善哉！善哉！汝於無量百千億劫奉持淨戒，普為利益安樂有情，問如是義。汝今諦聽，善思念之，吾當為汝分

別解說。

若有善男子善女人修大乘者，若欲圓滿淨戒波羅蜜多，應當如是發廣大心：「普為憐愍一切眾生，所謂：不怖地獄、不求生天、不為已身自求解脫，護持禁戒。」

復作如是正念思惟：「我於昔時已發誓願，若見有情毀禁戒者，誓當勸令堅持淨戒。以佛淨戒而為瓔珞，莊嚴其身。若我不能護持戒者，云何以戒攝護有情？以是因緣，勸令持戒？若不如是，云何能置一切有情於阿耨多羅三藐三菩提？所以者何？若諸凡夫，自不清淨，為毀戒者，雖說正法，勸他持戒，終不信從，反被輕呵：『若欲教他護持淨戒，何不自護而毀犯耶？』以是思之，汝應持戒。汝若不持，汝口雖說，自耳不聞，如是種種，被他譏毀，何能勸人守

護淨戒？」

以是當知，先自檢身，離諸放逸，堅持淨戒波羅蜜多，然後為人說正法要。有情聞已，便能信受。既信受已，護持佛戒，具足清白，乃至得成阿耨多羅三藐三菩提。

復次，慈氏！若有眾生發菩提心，普為一切五趣四生，乃至護持一禁戒者，亦得名為入佛淨戒波羅蜜多，能得無上正等菩提。

復次，慈氏！菩薩摩訶薩修大乘者，見諸有情墮於惡趣，應當修習淨戒波羅蜜多，拔濟令出，置於涅槃。

然，修行時有三大障：①瞋恚，②慳貪，③染欲。

其瞋恚者，能退悲心。大悲心者，一切菩提行之根本。以悲力故，於夢寐中

不生殺想，況覺寤時斷命食肉。其慳貪者，不能捨施。於己財物，常生慳惜。於他財寶，恒起貪求。

是故，菩薩摩訶薩見他財物，如覩毒蛇，不生貪著。其染欲者，非清淨行，應當遠離五欲淤泥。

然此貪欲，諸苦根本，六波羅蜜之大障也，復能燒滅菩提之心。

爾時，薄伽梵而說頌言：

女性妖媚幻惑人	如怨詐親不可近	貪欲迷荒壞清淨	如水瀑流摧石壁
女人之性多諂曲	如水隨流性不定	恒懷異志背其夫	智者諦思應遠離
譬如雪山白象王	鼻有力能拔大樹	及見母象心昏醉	引入陷穽被調伏
如鹿食草飲清流	復能遠陟諸山谷	獵師能為誘鹿聲	彼鹿尋聲來就死

如魚沉潛深隱處	游泳水中難可見	為求其食吞鉤餌	貪欲喪身亦復然
譬如黑蜂貪其香	醉象污流發香氣	貪齶此香集象身	象耳搖動撲皆死
如燈無風焰熾然	飛蛾為明競投赴	由斯入火自焚燒	貪愛亡軀亦如是
五塵遍觸眾生身	一一害人如毒藥	受者如是諦思惟	眾苦積聚非安樂
炎火熾然猶可觸	旋嵐猛風或能繫	瞋恚毒蛇易調伏	女人之心難可禁
無熱池中功德水	流入大海不堪飲	八味皆失同鹹苦	親近女人善法盡

佛告慈氏：以是因緣，當知女人，不應親近。乃至夢中，不應思想，況覺悟時而行欲事。

復次，菩薩摩訶薩離三障已，應當修習十種淨戒。

云何為十？所謂：身三淨戒、口四淨戒、意三淨戒。

言身三者，離殺、盜、姪。

云何不殺？若見有情被損害時，應以悲心往救其命，或以資財贖令得脫。設不免者，以身代之。何況自殺。

不偷盜者，菩薩摩訶薩於他財物，乃至夢中不生盜想，況於覺寤而起盜心。應於自財，以清淨心，無所吝惜，常行惠施。亦勸他人離不與取，恒行布施波羅蜜多。

離染欲者，菩薩摩訶薩應當遠離五欲境界。亦為有情，說欲過失。復令眾生離欲邪行，讚說出家無量功德，令多眾生捨家出家，拔濟有情離貪愛獄。

是則名為身三善也。

言口四者，謂：離虛誑、離間、麤惡，及無義語。

云何虛誑？謂：不見言見、見言不見。聞覺知等亦復如是。於此虛誑，皆捨離之，作真實語，名離妄語。

復次，言離間者，於彼說此、於此說彼，令生乖諍。若能離此，常和合語，是則名為遠離間語。

麤惡語者，謂：出惡言令彼熱惱。所不欲聞，而令聞之。若能離此，常以軟語令彼適悅。是則名為離麤惡語言。

無義語者，以染欲心，戲弄談諠，乃至邪論，皆無義利。若能離此，為益有情，實語、時語，是則名為離無義語。

菩薩如是若能離口四過，修習如來四種善語，常為有情說於妙語，令聞法者歡喜信受，如水清珠，能清濁水。聞法信受亦復如是。

復次，慈氏！意不善業亦有三種，謂：貪、瞋、癡。

離貪嫉者，見他尊貴、多饒財寶，起嫉妬心。應正思惟，作如是念：「願一切有情，得大富貴，無所乏少。是諸有情，勤苦艱難，今乃獲得，云何於彼生嫉妬心？我於己財，皆應奉彼，況彼自獲，我應隨喜，云何乃反生嫉妬耶？」以是因緣，於彼有情，不應嫉妬，但生隨喜。若能如是除貪嫉者，是名菩薩持心淨戒。

復次，離瞋害者，若菩薩摩訶薩，被諸有情，諸惡誣謗，無故打罵，斷截支節。菩薩於彼，離瞋害心，作是思惟：「我已發願，於諸有情，不起瞋害。云何今日，乃發是心？又我昔願，常以法藥蠲除有情瞋害之病。若於眾生起瞋害者，自疾不能救，何能救彼一切有情？復次，若諸有情瞋菩薩時，深自剋責，

以我有過，福德鮮薄，令他生瞋。我若無過，彼必不瞋。」

復次，若菩薩摩訶薩，見二有情互相瞋恨結怨不捨。菩薩見已，生悲愍心：「此之有情不捨瞋恨，當墮地獄，火燒其身，受大苦惱。是我之咎，應持法藥療此瞋病。我昔誓願，願與一切眾生除瞋恚病，云何今日不為斷除？此等眾生常為恚魔之所執縛，不自覺知，以大猛火之所焚燒。既被魔執，設持利刀來殺害我，我知魔鬼，不應生瞋。當於是人，生大悲愍。」

復次，離邪見者，一切眾生，皆有邪見，極為深厚。菩薩大悲，以正見炬，作大照明，令見三寶。又於佛法眾僧所有功德，深生信樂。一切外道，一切眾魔作障礙者，不能破壞正見之心。於大乘行，無能退屈。

復次，慈氏！菩薩摩訶薩，行大乘者，欲令眾生離不善行，先當自身遠離十

惡、修行十善。何以故？若諸菩薩自行十善，所有言教，人皆信受。若自不行而教人者，譬如有人為水漂溺，語岸上人「我能救汝」，無有是處。造十惡者亦復如是。自被十惡瀑流所漂，語諸眾生「我當度汝」，亦無是處。

菩薩，如是於十善戒具足修習，復教他人，如是展轉，名為修習淨戒波羅蜜多。

時，慈氏菩薩摩訶薩復白佛言：世尊！如有有情，除斷十惡修十善者，當獲何果？

爾時，佛薄伽梵讚慈氏菩薩摩訶薩言：善哉！善哉！善男子！汝今諦聽，善思念之，吾當為汝次第解說。

此十善業，一一皆感四種果報。云何為四？①現在安樂。②煩惱怨賊，勢力

羸劣。③於當來世，常得尊貴，無所乏少。④精勤修習，當得無上正等菩提。

離殺四者：

①菩薩摩訶薩，於一切眾生，不起害心。能施無畏，亦不恐怖。以無怖故，一切眾生親近供養尊重讚歎。菩薩於彼，生憐愍心。由慈心故，過去所有一切怨恨，自然心息。

②瞋恚害心，悉皆羸劣。以慈甘露，用塗其心，而能蠲除瞋等熱惱，睡眠安隱，恒無惡夢。以慈心故，藥叉諸鬼、食血肉者，捨離害心。及諸惡獸，常相守護。

③於未來世，獲三種果：(1)壽命長遠，常無中天。(2)所生之處，常無病苦。(3)大富饒財，恒得自在。

④以不殺故，得佛法分。於五趣中，所生之處，於世自在，隨意能住。乃至坐於菩提樹下，諸魔鬼神不能為障成等正覺，無量聖眾之所圍遶。

慈氏！此即離殺四種果報。

復次，離不與取亦四果報：

①於現生中，得離貪嫉，身心安樂。

②以離貪嫉，一切眾生之所信向，委寄任用，無復疑惑。與諸有情，而作伏藏。

③於未來世得大富饒，豪貴自在，所有珍財，王、賊、水、火，無能侵奪。

④能與殞伽沙等一切諸佛主功德藏，所謂：十八不共法等清淨法財，二乘之人耳尚不聞，何況得見！

慈氏！當知：此即名為離偷盜業四種果報。

復次，離欲邪行亦四種報：

①於現生中，一切人天之所稱讚，亦無疑阻，人所敬重，遠離惡名。

②六根調善，令染欲火，勢力微劣。

③於未來世所生之處，父母宗親妻子眷屬，孝友貞順，純一無雜，離於女人所有過失，令諸眾生無復愛染。

④為離邪行而得馬王陰藏之相，乃至成就阿耨多羅三藐三菩提。

慈氏！當知：此即名為離於邪行四種果報。

復次，離虛誑語亦四種報：

①於現在世常行實語，離虛誑語，諸天憐念常共守護。

②既無虛誑，一切眾生信受其語。若說法時，人皆諦受。無勞功力，自然信行。設復有人，自雖虛誑憎誑語人，見實語者，心亦歡喜。以自妄語，不信他實。若知真實，深生敬重。當知實語，為大利益。斷妄語者，一切惡業，不復造作。何以故？以他問時，如實答故。若在閑靜，不起妄念。何以故？若人問我：「汝閑居時，生妄念不？」若言無者，是虛誑語。若言有者，羞愧他人。以是因緣，能令妄心漸漸微薄。

③所生之處，口中常出青蓮花香、蘇曼那香，一切有情之所愛敬。自實語者不疑他人有虛誑語，亦令他人信己實語，能令眾生永斷疑網。

④所出言詞，人皆信受。能令眾生聞法歡喜，乃至當得無上菩提。

慈氏！當知：此即離虛誑語四種果報。

復次，不離間語，亦四種報：

①現在世中，能令自他和合無諍，所在安樂。

②以和合故，眾人愛敬。過去所有離間語罪，悉得銷滅。於三惡趣，心無憂懼。

③於未來世，得五種果：(1)能獲金剛不壞之身，世間刀杖無能損壞。(2)於所生處，得善眷屬，無諸乖諍，不相捨離。(3)於所生處，設不遭遇善友知識為說法者，自然覺悟無二法門。於佛法僧深生信向，無有退轉。(4)令諸有情，一心一事，歡喜相向，速能證得慈三摩地。(5)而能勸發一切有情修習大乘，令不退轉。

④遠離間語，常和合語，得善眷屬，隨順調伏。乃至涅槃，不相捨離。

慈氏！當知：此即名為離兩舌語四種果報。

復次，離麤惡語亦四種報：

①現在世中，離麤染垢，心常清淨。若於塵境，妄起貪欲，瞋恚風塵集諸藏識。菩薩摩訶薩興大悲雲、降慈心雨，滅妄貪欲、止恚風塵，令得清淨。

②軟語之人，一切愛樂，讚歎隨順。令麤惡者，漸令調伏。六根清淨，三業無染。

③以清淨故，於當來世所生之處，永離三塗，常生善處。

④漸次能得無上菩提，具梵音聲。說法之時，隨其類音，各解其義，而生念言：「今薄伽梵為我說法，不為餘人。所說妙法，皆契我心，除我身心煩惱習氣。」

慈氏！當知：此即名為離麤惡語四種果報。

復次，離無義語，亦四種報：

①現在世中，智人讚歎，心無卒暴，而得安樂。

②所出言教，人皆信受，麤惡微薄。

③於未來世所生之處，恒聞種種如意音聲。

④漸次能得無上菩提，獲無礙辯，設彼三千大千世界，所有一切天、龍、人非人等來詣佛所，同於一時各各別問自所疑事。時薄伽梵於一剎那以一言音悉能酬對，皆契本心，斷除疑網。

慈氏！當知：此即名為離無義語四種果報。

復次，離貪嫉者，亦四種報：

①現在世中，見他富貴，不生貪嫉，作是思惟：「彼人富貴，皆宿福生。以我貪嫉，豈能侵奪。以是因緣，應永斷除慳貪嫉妬。若不除斷，常受貧窮，無復威力。」以是義故，菩薩觀之，除其貪嫉。於他富貴生隨喜心，不捨毫釐，獲大功德。

②一切愛敬，身心安樂，無復憂惱，威德自在，能淨心中貪欲雲翳，猶如夜月，眾星圍遶。貪嫉之心，由斯微薄。

③所生之處，常得端嚴，六根圓滿，財寶豐足。眾人愛敬，常行惠施。無礙辯才，處眾無畏。

④乃至證得無上菩提，眾聖圍繞，功德最上。一切眾生，同受教命。

慈氏！當知：此即名為離貪嫉者四種果報。

復次，離瞋恚者，亦四種報：

①於現在世，六根聰利，儀容可觀，人所親附。瞋恚之人，猶如枯樹，心中火然，所有枝葉，悉皆乾盡。眾生亦爾，被瞋恚火熏習五根，儀相枯槁，人所惡見。

②心無瞋恚，一切惱害、打罵訶責，盡皆不起。譬如有人持迦嚕羅呪，一切諸毒，無能害之。以無恚怒，增長慈心。以慈真言，令三十六俱胝天魔鬼神悉皆摧伏，奉慈真言，無所損害。

③於未來世，以慈心梯，上生梵天，一劫安樂。令諸眾生，斷惡修善。

④漸次能得無上菩提，具足莊嚴三十二相，八十種好，熾然炳著，無量功德蘊集其身。

慈氏！當知：此即名為離瞋恚人四種果報。

復次，離邪見者，亦四種報：

①若離邪見，修行正見。於現世中，離惡知識。親近善友，聞法信受。未生不善，令永不生。已生不善，令盡除斷。未生善法，修習令生。已生善法，修令增長。此正見者，一切善法之根本也。

②能閉不善行門，於大眾中，名稱普聞，心無疑悔。

③於未來世，所生之處，遇善知識、得善伴侶，順於正見，歸佛法僧，更無異向。於菩薩行，無退轉心。除滅罪愆，增長福聚，有漏無漏、生死涅槃、過患利益，能善分別。了達諸法，無我我所。無有執著，住法性空。正見力能，究竟清淨。

④所有三乘勝妙功德，人不能測。正見之力，皆悉圓滿。能為眾生，作歸依處。度脫有情，出生死苦。悉皆安置無上大乘，乃至處於法王之位。

慈氏！當知：此即名為離邪見人四種果報。

復次，菩薩摩訶薩，非唯護持十善淨戒，功德無盡。乃至受持微細禁戒，清淨功德，亦無有盡。何以故？凡夫眾生，受持禁戒，取相果報，一切有盡。外道諸仙所有禁戒，失通亦盡。人間十善，捨十善時，戒亦隨失。欲界諸天，壽盡戒失。色界諸天，四靜慮中，無色界天三摩鉢底，捨生失定，戒亦隨盡。二乘無學入涅槃時，戒亦隨盡。若菩薩摩訶薩所受禁戒六十五種，隨一一戒究竟清淨，功德無盡。

云何名為六十五種？謂：

- ①不害眾生。②不行偷盜。③不侵他妻。
- ④不誑惑他。⑤不兩舌語。⑥忍辱惡言。⑦不作綺語。
- ⑧不生貪嫉，見他安樂，生歡喜心。
- ⑨不起瞋恚，惡言罵辱，悉能忍受。
- ⑩不起邪見，尊重如來，不師外道。
- ⑪歸信佛戒，心無疑濁故。
- ⑫歸信法戒，離欲真實故。
- ⑬歸信僧戒，和合最勝故。
- ⑭尊重父戒，生我身故。
- ⑮尊重母戒，養育我故。

- ①⑥尊重和尚戒，生我法身故。
- ①⑦尊重阿闍梨戒，教我軌則故。
- ①⑧尊重大弟子戒，成我法身故。
- ①⑨一心戒，輕重無差故。
- ②⑩無破戒，於重不犯故。
- ②⑪不缺戒，於輕不毀故。
- ②⑫不習三乘戒，不求聲聞果故。
- ②⑬不習二乘戒，不求獨覺果故。
- ②⑭離惡生處戒，不生邪見外道家故。
- ②⑮增長白法戒，以淨戒力，隨願生故。

- ②⑥富貴相戒，智者不嫌故。
- ②⑦端嚴戒，其心不亂故。
- ②⑧無毀訾戒，於一切處，不被譏訶故。
- ②⑨善護五根戒，勤不放逸故。
- ③⑩名稱戒，善解諸法故。
- ③⑪少欲戒，無所希求故。
- ③⑫端直戒，眾善隨心故。
- ③⑬如說修行戒，不違教命故。
- ③⑭大慈戒，救度一切眾生故。
- ③⑮大悲戒，拔一切眾生苦故。

- ③⑥大喜戒；慶彼得樂故。
- ③⑦大捨戒，離憎愛故。
- ③⑧知己過戒，省察自心故。
- ③⑨不見他過戒，護彼意故。
- ④⑩布施戒，救貧乏故。
- ④⑪攝持戒，攝一切善法故。
- ④⑫忍辱戒，不害眾生故。
- ④⑬精進戒，勇猛不退故。
- ④⑭禪定戒，定支增長故。
- ④⑮智慧戒，聞法無厭故。

- ④6 多聞戒，求法無倦故。
- ④7 近善知識戒，修集覺分故。
- ④8 離惡知識戒，避險惡道故。
- ④9 不惜身分戒，剎那無常故。
- ⑤0 不惜壽命戒，如救頭然故。
- ⑤1 不追悔戒，性本清淨故。
- ⑤2 不虛假戒，無變動故。
- ⑤3 無熱惱戒，內外清涼故。
- ⑤4 無人我戒，心謙下故。
- ⑤5 不掉舉戒，性安靜故。

- ⑤6 不諂曲戒，常質直故。
- ⑤7 知眾生心戒，善識物機故。
- ⑤8 調伏心戒，不濁亂故。
- ⑤9 寂靜戒，離諠雜故。
- ⑥0 右遶戒，順理行故。
- ⑥1 救拔眾生戒，行四攝法故。
- ⑥2 護正法戒，守護法財故。
- ⑥3 圓滿諸願戒，弘誓清淨故；
- ⑥4 如來戒，隨順如相故。
- ⑥5 佛三昧戒，圓滿一切佛法故。

慈氏！當知：此即菩薩摩訶薩六十五種清淨戒身。

佛告慈氏：若諸菩薩，持一一戒，能得如是無量功德。乃至捨所愛命，不得缺犯佛之禁戒。應持此戒，如護眼睛。守慎此戒，如護賢瓶。不以五欲利斧，而斬壞故。護微小戒，如五逆罪，輕重等護，心若金剛。

不得起於貢高我慢。雖持此戒清淨如是，比於無始所造惡業如大千界所有微塵，此持戒善，比彼惡業，如一微塵。既知如是，云何持戒而生我慢？

復次，慈氏！菩薩見諸眾生毀破禁戒不生輕慢，而於自身，更增持護。

復作是念：「我昔誓願，令諸眾生堅住淨戒。雖諸眾生難可化度，我當勤加精進，以淨戒船度破戒者，出生死海，到涅槃岸。」

復次，慈氏！若諸眾生有此身者，須四種物。云何為四？①飲食，②衣服，

③房舍，④醫藥。

菩薩摩訶薩，於此四事，如法營求，不以非法。不自矜高多求無厭，應當少欲知足支身。

譬如有人，身患瘡苦，求善良醫，以藥塗附，用衣裹之，處深密室，臥軟敷具，但為治瘡，非愛身故。

菩薩如是，以八苦身，雖求良藥塗以飲食、假以衣服處於房舍，不樂此身色力壽命，為修勝法安樂眾生，除斷生死煩惱癰瘡。菩薩如是處大眾中，常省己過，不毀他人，遠離名譽。

若有讚歎之者，皆自思之：「如是名聞，我皆無分。我今自測，多諸愆犯。功德法中，我無少分。眾生妄見，言我有之。」

菩薩以大悲心而為依止，以淨戒波羅蜜多而為伴侶。

復次，慈氏！有是淨戒，非波羅蜜多。取相持戒，不為最勝之所攝受，但名淨戒，非波羅蜜多。何以故？但獲三界有漏果報，壽盡無故。

若普為一切眾生護持禁戒，觀第一義，空無我人相，而為有情護持禁戒。是則名為淨戒波羅蜜多，能令眾生速得無上正等菩提。

又，此淨戒波羅蜜多，與諸有情而為示導。復與一切無信有情生淨信故，能與有情作伏藏故。

復與一切有情作無價寶珠瓔珞嚴身故，復與一切有情作上妙塗香故，復與一切有情作大名聞故。

又此淨戒波羅蜜多，能與在家出家一切有情，若老若少平等端嚴故。不起我

慢、增上慢，離諸過患，威儀清淨，無諸怖畏，能得阿耨多羅三藐三菩提最勝法王。

云何能知戒為第一？若有眾生能持淨戒。雖處卑賤，而非族姓豪貴尊嚴。亦非自力，能益他人。以是淨戒波羅蜜多，能令一切天、龍、藥叉、人非人等，國王、大臣、刹帝利、婆羅門、長者、居士，悉皆歸敬禮拜供養尊重讚歎。廝下之人受持佛戒，尚得如是恭敬尊重，況餘尊貴之人護持禁戒，成就圓滿淨戒波羅蜜多。

當知：護淨戒者，行住坐臥及經行處，其地吉祥。一切人天應取其土，頂戴供養。以是當知：持淨戒者，於諸眾中，而為第一、最高、最上。是則名為淨戒波羅蜜多究竟圓滿。

⑦ 安忍波羅蜜多品

爾時，佛薄伽梵顯說如是淨戒波羅蜜多已。

時，慈氏菩薩，即從座起，偏袒右肩，右膝著地，頂禮佛足，而白佛言：世尊！菩薩修行安忍波羅蜜多，云何進求而得圓滿？然此安忍復有幾種，若修行者功用如何？惟願開示，我等樂聞。

爾時，佛薄伽梵讚慈氏菩薩摩訶薩言：善哉！善哉！汝今為欲利益安樂一切眾生，能問如是甚深義趣。汝今諦聽，善思念之，吾今為汝分別解說。

善男子！當知：生死、涅槃，悉皆平等，以無分別，是名安忍波羅蜜多。

復次，若有愚下狂亂眾生來罵辱者，安忍受之。

譬如醉象，難可禁制，應以鐵鉤，而調伏之。瞋心醉象亦復如是，以忍辱鉤

而制禦之，令其調伏，名為安忍波羅蜜多。

復次，若諸有情，為彼三十六俱胝天魔鬼神藥叉羅刹而來侵害菩薩，唯將安忍波羅蜜多能破彼軍。乃至八萬四千煩惱怨賊欲摧伏者，亦以安忍而除滅之。非唯如是天魔大軍煩惱怨賊，乃至極下微小怨賊，亦以安忍而調伏之。是名安忍波羅蜜多。

復次，譬如王子，善習王法，父王崩已，次紹王位，當以正法頒告四方，率土之內，悉皆奉行五種正法。云何為五？①不斷生命，②不行盜竊，③離欲邪行，④不虛誑語，⑤不分外賦稅財物。

若王境內有犯殺者，其王便獲第六分罪。偷盜、邪行及以妄語，亦復如是。何以故？若法非法，王為根本。於罪於福，第六一分，皆屬於王。

菩薩摩訶薩亦復如是，心為國土，大悲為王，以五忍法宣布境內，所謂打、罵、忿、恚、戲弄。如是五法，皆安忍之。若違犯者，獲大重罪。

復次，慈氏！譬如農夫欲種植時，為引水故，先理溝渠。興功之次，中遇山石，穿掘無由，於斯便止。

菩薩摩訶薩則不如是，於生死流轉大曠野中，欲穿智渠引甘露水。既修習次，遇瞋恚石，無方除遣。唯有安忍審諦觀察，而穿破之。

復次，一切國王大臣長者居士，恒以瓔珞而為莊嚴。諸佛法王大菩薩等，常以安忍瓔珞而自嚴身。

若遇眾生非理欺負，大悲安忍，而救護之。

又此安忍與苾芻、苾芻尼而為師範。以信、進、念、定、慧而為樹林，以淨

戒為枝葉。於此林內，瞋火欵起、焚戒枝葉，無由撲滅。以安忍雨而得滅除，現在未來一切苦難永無憂患。

無安忍者，於現世中行住坐臥，無有安樂。於未來世，豈有樂耶？

菩薩摩訶薩，以安忍力而為甲冑，彼造罪人為旃荼羅，以瞋恚手執妄想弓，放麁語箭射安忍甲。而彼弓箭，自然摧折。安忍甲冑，一無損壞。其碎弓箭，變為蓮花。當知菩薩如是修行，是則名為安忍波羅蜜多。

復次，譬如世間阿伽陀藥，能除自他一切毒病。菩薩亦爾，忍伽陀藥能治自他一切瞋恚煩惱毒病，是名安忍波羅蜜多。

譬如世間明月寶珠，商主持行，度大曠野砂磧之中絕無水處，於夜月中持珠向月，以器承之，水即隨出，商主飲之，得度曠野。菩薩亦爾，持此安忍明月

寶珠，度於生死曠野磧中絕無智水煩惱之處，於佛智月持忍辱珠，承佛法水菩薩飲之，出於生死，至涅槃岸。

復次，慈氏！譬如大地，一切草木，依之得生；一切有情，依之而住。安忍亦爾，一切菩薩摩訶薩，於十地中修習六種波羅蜜多，依之生長，由斯而住。

復次，如有梯磴，極為高大。眾生登陟，直至梵天。安忍之梯，高大亦爾。菩薩登陟，至天中天。

復次，如巧畫師，畫種種像，莊彩成就。安忍畫師亦復如是，莊嚴功德圓滿成就。

復次，譬如虛空起大密雲，降注洪雨，瀑水汎漲，漂蕩一切草木花果，入殞伽河，轉至大海。菩薩亦爾，心如虛空，能起一切大悲密雲，降大法雨安忍瀑

流，漂蕩一切瞋恚草木愚癡花果，流入智河，轉至涅槃清淨大海。

復次，菩薩雖見生死流轉諸苦，以安忍力代為受之，經無量劫，不辭厭倦，亦無棄捨而取涅槃。

復次，菩薩摩訶薩以安忍力，能捨一切頭目髓腦身肉手足及與身命，心無憊惜。凡夫無智，聞之驚怖，身毛皆豎，何能捨之？

菩薩如是，以安忍力，所生之處，容貌端正，一切眾生之所樂見，於大會中常為諸佛之所稱歎。

復次，菩薩摩訶薩，安住忍力，堅固不動。如妙高山，旋嵐猛風所不能動。忍妙高山亦復如是，瞋恚猛風所不能動。

復次，一切外道，因惡知識，生邪見心，修諸苦行：裸形自餓、五熱炙身、

投巖赴火，謂：得生天不信正法。菩薩見已，起大悲心，示同苦行倍過於彼。是諸外道，尊敬菩薩以為師範，然後導之，示以正法，令彼邪徒住於正見。

復有外道，而作是言：「此身有我住在心中，如大拇指，而無障礙，亦無形相，唯天眼者方得見之。而此眼根，為我侍者。眼既得已，尋報我知。耳鼻舌身意亦如是。以此因緣，若有眾生，毀罵我者，人能殺之，得生天上。忍受罵者，死墮三塗。譬如多人同事一將，若毀我將，眾共殺之。若不殺者，眾人有罪。」

菩薩以安忍力愍彼邪見，皆忍受之。以種種方便，除彼邪見。譬如時雨，隨彼草木而能滋潤，增長成實。菩薩安忍亦復如是。

爾時，薄伽梵而說頌言：

如天欲雨蟻出穴	聚土為封作穴居	父母不淨集成身	妄識於中執為我
相續色力恃豪強	智者諦觀如幻焰	一念之頃作微塵	如象蹈封皆散壞
瞬息剎那速生滅	行住坐臥皆為苦	若了色身苦無常	智人於此何貪著
諸天梵住苦行者	毒蛇視觸無能害	設有中傷呪藥解	無常毒螫誰為救
善法易修悉棄捨	欲樂敗類苦貪求	智者觀之無所成	猶如垢衣鬱金染

菩薩摩訶薩，應為外道說無我法：「汝所執我，為在內耶？為在外耶？前際來耶？後際去耶？汝言有者，汝命終時，應不能救。既不能救，明知無我。譬如忠臣一心奉主。若在危難，主必救之，今既不能，定知無我。若有我者，應得自在，云何乃被無常壞耶？而諸眾生，被無常鬼眾苦所逼，肢節分離，奄然而逝。若有我者，應得免之。既不免離，故知無我。以是因緣，汝諸外道，從

無始來，奉事於我，造諸惡業，受苦無窮。當知：此我無少恩分，汝久事他，捨汝而去，遂將汝身，付諸惡獸豺狼虎豹，而為啖食。然我棄汝，別覓餘身，從無始來捐棄汝等。若計其數，無量無邊。現在未來，亦復如是。

復次，汝若謂：心即是神我，身為僮僕。當知：此身即是我所，從無始來，受身無量，莫知其數。如是諸身，為一我耶？為多我耶？若我多者，即是無常。以無常故，我義不成。若我是一，即應常住。恒守一身，不應移去。以不住故，一亦不成。由此因緣，汝應思察，多我一我，義並不成。以是，當知：心非是我。復當觀察，身非我所，亦非僮僕。身若屬我，行住坐臥生老病死須我處分。我未教敕相次而來，明不屬我。若屬我者，生應常生，不應老死。行住坐臥亦復如是。改易非常，定非我所，以此定知無我我所。

復次，當知：所執我者，汝之大怨。何以故？汝於前世，積集善根。五欲果報，今世受盡。現在造作種種惡業，以業力故，付與獄卒。若有我者，何不相救？」

菩薩摩訶薩，以安忍力，於我我所惡鬼之中，救拔有情，置正見處，離我我所。見一切法，本性空寂。是名菩薩修習安忍波羅蜜多。

復次，慈氏！猶如有人，為護子故，造作呪術，令諸惡鬼不得侵害。菩薩亦爾，用安忍呪，護諸眾生，瞋等怨賊，無能損害。

復次，慈氏！譬如有人，為刺刺腳。欲以諸皮，遍覆大地。於上遊行，免有憂患。

智者問曰：「汝所求皮，欲作何事？」此人具報如上因緣。智者訶云：「咄

哉愚人！不應如是。但以少皮用充革屣，足得行李，不被損傷，何用多皮覆於大地？」

凡夫眾生亦復如是，遍造怨害，持刀欲殺大地怨家。菩薩見之，深生悲愍，但以安忍而為革屣護汝身心，何有眾怨，持刀遍害。是則名為安忍波羅蜜多。

譬如有人，以毒惡言種種毀罵。菩薩聞之，不應卒暴而起瞋心。當觀察之：「如是罵者，為是誰耶？受毀罵者，復是誰耶？彼此二身，各十二處，眼處見色、耳處聞聲、鼻處嗅香、舌處嘗味、身處覺觸、意處知法，而是眼處，實非是我。若非我者，自他眼處，誰過失耶？若有過者，應須治罰。」

如是觀察，俱無過失。既無過失，誰受誰罵而瞋恚耶？

如是觀察，乃至法處亦復如是。十二處外，更無一物。罵者受者二俱是空。

以此思惟，瞋心頓息。若聞麤語，應諦觀察：「如是語言，何者是麤？麤語二字，生不同時。麤時非語、語時非麤，剎那生滅，各不相待。二字尚無，況多毀罵！」

以是觀察，百千劫中，作是麤言，不成罵辱。

又復觀察，能罵之人及所罵法，二俱無常，剎那不住，何有瞋耶？

以是當知，過去已滅、未來未至、現在不住。罵法既空，我身亦爾，同彼無常，生滅不住。以不住故，一切皆空。

作是觀時，無量怨賊，一時消滅。若離此觀，取相分別，但名安忍，不得名為波羅蜜多。

五蘊無我，乃至十八界等，悉亦無我、如幻、如化。毀讚平等，本性空寂，

亦復如是。

復次，慈氏！菩薩摩訶薩，見毀罵者，當生憐愍：「如是之人，瞋魔所持、煩惱所覆，作是毀罵。我今為欲辟除此魔，應善修學忍陀羅尼，不生瞋恨，無令瞋恚及餘煩惱損害眾生。我若瞋者，鬼魅我身。」

由此因緣，於彼罵者，生大悲愍，而安忍之。雖能如是，但名安忍。若離分別，是則名曰波羅蜜多。

復次，慈氏！菩薩摩訶薩，行安忍時。若見有人，執持利刀，斷其手足。當於是人，生欣慰心，善知識想。猶如有人，施己歡悅。我於今者，得大福報，於彼受者，常懷恩德。傍人見之，皆生隨喜。菩薩亦爾，見割截者生大慶慰：「除我罪業、施我法財。由為我故，受惡名稱，失於人天解脫之樂、受三塗

苦。以是因緣，為我善友，作我良伴，成我安忍波羅蜜多。我於彼人，應生敬重，乃至菩提，不忘恩德，況反生瞋。若起瞋恚，是負恩德。」

由是緣故，倍生敬心，作善師想。雖能如是難忍能忍，由於自他未亡分別，但名安忍，不得名為波羅蜜多。

復次，菩薩住閑寂處，而有人來謗菩薩，言：「汝不與取、作姪欲行，打罵治罰。」

菩薩摩訶薩而安忍之，作是思惟：「非他過失，是我宿世曾謗於他、打罵治罰。以我餘殃，招彼治責。彼因害我，當墮惡趣。應於是人，生大悲愍。」

復自思惟：「我今此心，極為姦詐，畏墮地獄，生安忍心。又欲自成忍波羅蜜，令割截者當墮三塗。」如是思惟，深生慚愧。菩薩是時見已過已，於割截

者生愧惡心、善知識想。深生尊重，但名安忍，非波羅蜜多。何以故？由於自他有分別故。

復次，菩薩了瞋恚法，諸苦所因。知行安忍，萬行根本。以是因緣，而行安忍，但名安忍，非波羅蜜多。何以故？由於善惡，生分別故。

復次，菩薩觀五蘊身，五種過失，眾苦所集，剎那無常，五種不淨、三十六物，無我我所，一切皆空。外道邪見，執身安樂，常住無變，是清淨法，有我我所。菩薩諦觀此五種法，一切有情亦復如是。既知是已，聞罵不瞋、讚譽不喜，但名安忍，非波羅蜜多。

復次，慈氏！略說菩薩安忍三十二種。

所謂：①無貪是安忍，②不害是安忍，③無熱惱是安忍，④無瞋是安忍，⑤

無恨是安忍，⑥無忿是安忍，⑦無諍論是安忍，⑧不染欲境是安忍，⑨能護自他是安忍，⑩順菩提心是安忍，⑪無分別心是安忍，⑫不著生死是安忍，⑬順業果是安忍，⑭身清淨是安忍，⑮口意清淨是安忍，⑯堅固不退是安忍，⑰言說自在是安忍，⑱無遍計是安忍，⑲自覺聖智是安忍，⑳將護彼意是安忍，㉑修四梵行不隨禪生是安忍，㉒於人天樂得自在是安忍，㉓相好圓滿是安忍，㉔梵音深妙是安忍，㉕滅除諸惡是安忍，㉖遠離慳垢是安忍，㉗除斷嫉妬是安忍，㉘捨諸怨賊是安忍，㉙近菩提分是安忍，㉚離諸不善是安忍，㉛樂處寂靜是安忍，㉜獲諸佛法是安忍。

慈氏！如是三十二種安忍波羅蜜多，菩薩修行，能得無生法忍，速成阿耨多羅三藐三菩提。

復次，慈氏！云何名為安忍波羅蜜多？

若人惡罵。當觀此聲，猶如谷響。

若被打時。當觀此身，猶如鏡像。

若被瞋時，當觀此心，猶如幻化。

若見忿怒，當觀此心，性無誼動。

若得利養，當觀此心，自性調伏，不生歡喜。

若失利養，當觀此心，善妙寂靜，不生瞋恚。

若遭毀謗，當觀此身，猶如虛空，不應加報。

若遇讚譽，當觀自身，性無我慢，而不高舉。

若得稱歎，當觀心性，本來空寂，不生忻慰。

若被譏嫌，當觀本心，性離怖畏，不生憂感。

若遇苦時，當觀法性，本無逼迫，不見苦相。

若受樂時，當觀實性，常住不變，無苦樂相。

菩薩摩訶薩住安忍時，如是八風不能動轉。何以故？以菩提心，住真實相，離於彼我、見法身故。

復次，有不安事，皆忍受之。為欲降伏諸魔怨故。當行一切難行苦行，為調外道諸邪見故。

慈氏！當知：我今略說安忍波羅蜜多。

復次，慈氏！若觀無常，離彼我相，心得安忍，非真實忍。

若觀諸法善不善相，心得安忍，非真實忍。

若復諦觀十二處忍，於諸根塵，離恚罵相，而得安忍，非真實忍。

若觀恚罵以為顛倒，忍為真正。辯邪正忍，非真實忍。

復次，見忍有理、恚罵無理。此取相忍，非真實忍。

復次，住八正忍、離八邪忍，道非道忍，非真實忍。

復次，不觀諸法無常、無我、不淨、苦忍，唯觀諸法常、樂、我、淨，無生法忍。此相違忍，非真實忍。

復次，於空法忍，諸見不忍。無相法忍，有相不忍。無願法忍，有願不忍。無行法忍，有行不忍。無煩惱法忍，有煩惱不忍。諸善法忍，非善不忍。出世法忍，世間不忍。無過法忍，有過不忍。無漏法忍，有漏不忍。涅槃法忍，生死不忍。如是諸忍，是對治忍，非究竟忍。

爾時，慈氏菩薩摩訶薩白佛言：世尊！如是忍者，既非究竟。云何名曰究竟忍耶？惟願，如來！分別解說。

爾時，薄伽梵告慈氏菩薩摩訶薩言：善男子！真實忍者，以正智慧，了一切法本性皆空。即此空性與一切法本性，無二故。一切法性、空性正智，本性清淨，無二無二分，無別無斷故。

以是當知：世間法即是空，空即是世間法，二法本性不相離故。如是忍者，名究竟忍。

復次，以正智慧，了一切法性即無相性，無相性即一切法性，本性無二故。一切法性，本無相性，正智本性清淨，無二無二分，無別無斷故。

以是當知：一切法性即無相性，無相性即一切法性，二法本性不相離故。如

是忍者，名究竟忍。

復次，以正智慧，了一切法性即無願性，無願性即一切法性，本性無二故。無願性、一切法性，正智本性清淨，無二無二分，無別無斷故。

以是當知：一切法性即無願性，無願性即一切法性，二法本性不相離故。如是忍者，名究竟忍。

復次，以正智慧，了一切行性即無行性，無行性與一切行性，本性無二故。一切行性、無行性，正智本性清淨，無二無二分，無別無斷故。乃至如是忍者是究竟忍。

復次，以正智慧，了煩惱性即無煩惱性，無煩惱性即煩惱性，本性無二故。煩惱性、無煩惱性，正智本性清淨，無二無二分，無別無斷故。乃至如是忍者

是究竟忍。

復次，以正智慧，了一切善性即不善性，不善性即一切善性，本性無二故。善性、不善性，正智本性清淨，無二無二分，無別無斷故。乃至如是忍者是究竟忍。

復次，以正智慧，了出世法性即世間法性，世間法性即出世間法性，本性無二故。出世法性、世間法性，正智本性清淨，無二無二分，無別無斷故。乃至如是忍者是究竟忍。

復次，以正智慧，了無過失性即過失性，過失性即無過失性，本性無二故。無過失性，過失性，正智本性清淨，無二無二分，無別無斷故。乃至如是忍者是究竟忍。

復次，以正智慧，了無漏法性即有漏法性，有漏法性即無漏法性，本性無二故。無漏法性、有漏法性，正智本性清淨，無二無二分，無別無斷故。乃至如是忍者是究竟忍。

復次，以正智慧，了涅槃性即生死性，生死性即涅槃性，本性無二故。涅槃性、生死性，正智本性清淨，無二無二分，無別無斷故。乃至如是忍者是究竟忍。

佛告慈氏：如是真實究竟安忍，於一切法，非自非他、非有非無、非生非不生、非滅非不滅。獲此忍者，名真究竟無生法忍，是名安忍波羅蜜多。

佛說此安忍波羅蜜多時，慈氏菩薩而為上首，與無量諸大菩薩摩訶薩眾及此大會，異口同音讚薄伽梵言：善哉！善哉！希有善逝！甚奇世尊！

即以無量珍妙供具而供養之，所謂：種種妙香、瞻蔔花香、燒香、塗香、末香，種種花鬘、衣服、繒綵、幢幡、寶蓋，擲虛空中以為供養。種種音樂而為娛樂，種種歌頌讚歎如來。

是諸眾生，聞佛說此安忍波羅蜜多，不驚不懼，不怖不畏，悉得如來真實法忍。所散香花種種供養，在虛空中，遍滿三千大千世界。

爾時，薄伽梵告慈氏菩薩摩訶薩言：善男子！汝應安置如是種種花、香、衣服，乃至幡蓋。

時，慈氏菩薩摩訶薩白佛言：世尊！我已安置如是香、花、種種衣服，各各置在諸菩薩等天龍眾會本身之中而為處所。

爾時，慈氏菩薩說是語已，即入一切色身三昧。入是定已，所有三千大千世

界，遍滿虛空種種花、香、衣服、繒綵，乃至幡蓋。以定力故，悉入慈氏臍輪之中，不相障礙。而諸供具亦不減小，菩薩之身亦不廣大。

爾時，無盡藏菩薩摩訶薩問慈氏菩薩摩訶薩言：善男子！此三昧名字何等？住此定中，能令如是諸供養具悉入臍中，汝身不增、眾物不減。

慈氏菩薩言：善男子！此三昧名〈普入一切色身三昧〉。

無盡藏菩薩復言：大士！此三昧神變境界，其事云何？

慈氏菩薩言：仁者！三千大千世界一切所有，入我臍輪。我身不增、彼像不減。何以故？法性如是。

爾時，會中，或有菩薩、天、龍、鬼、神、人非人等竊作是念：我等欲見是三昧境界神變，不知云何？

爾時，薄伽梵知諸菩薩、天、龍、大眾心之所念，告慈氏菩薩摩訶薩言：善男子！汝當現此三昧神變，令眾同知。

時，慈氏菩薩久已修習如是三昧，善得純熟，無諸障礙。令諸菩薩、他方大眾及在此會諸苾芻僧及佛世尊，一切悉入慈氏身中。而諸有情，亦無驚怖，得未曾有身心安樂。譬如東方過無量阿僧企耶世界，有世界名寶瓔珞莊嚴，而彼眾生所受用物，皆以種種珍寶而為莊嚴，受諸快樂。而此身中，天人大眾所受快樂，如彼世界等無有異。此諸大會皆悉了知，在慈氏身都無障礙。

爾時，慈氏菩薩還攝神力。

時，諸大眾及佛世尊，各復本座，儼然而住。

是諸大眾一切有情，都不覺知有往來相。

爾時，無盡藏菩薩白慈氏菩薩言：希有，大士！此三摩地神變之事，得未曾有，昔所未見。

慈氏菩薩言：仁者！非但此會一切大眾入我身中，設以三千大千世界諸妙高山及十寶山、大鐵圍山、大海、江河、日月星辰、天宮、龍宮、諸尊神宮、五趣四生人非人等、悉內身中，亦無妨礙。我身不增、彼亦無減。是諸眾生亦不覺知有往來相。法性如是，況此會耶！

時薄伽梵說此安忍波羅蜜多，及現大神變時，會中有七十六那庾多人天，皆發阿耨多羅三藐三菩提心，三萬二千菩薩皆得無生法忍。

佛告慈氏：若有善男子善女人，暫聞此安忍波羅蜜多名，能生信心。是人決定不墮地獄、鬼趣、傍生，於阿耨多羅三藐三菩提永無退轉。我今說是安忍波

羅蜜多，究竟圓滿，利益安樂一切眾生。

⑧ 精進波羅蜜多品

爾時，薄伽梵說是安忍波羅蜜多已。

時，慈氏菩薩摩訶薩，即從座起，偏袒右肩，右膝著地，合掌恭敬，而白佛言：大聖世尊已說安忍波羅蜜多，應當廣說精進波羅蜜多。菩薩摩訶薩應云何住？云何降伏？云何修行？云何圓滿精進波羅蜜多？惟願，世尊！分別廣說。

爾時，薄伽梵告慈氏菩薩摩訶薩言：善男子！汝今諦聽，善思念之，吾當為汝分別解說。

所謂修餘五種波羅蜜多，皆精進力而能成就。

精進波羅蜜多，謂身口意。此三善業，皆因精進，方得發生。

於三業中，意業最勝。菩薩摩訶薩修習意業，有二種心：①精進，②退轉。

所謂：發起菩提心是精進，止息菩提心是退轉。

云何發起？於諸有情，起大悲故。云何止息？住我空故。

云何發起？攝取一切眾生故。云何止息？捨一切眾生故。

云何發起？於生死中，無疲倦故。云何止息？求出三界故。

云何發起？一切悉捨故。云何止息？輕心不施故。

云何發起？堅持淨戒故。云何止息？毀犯禁戒故。

云何發起？善住安忍故。云何止息？不修忍辱故。

云何發起？修集善根故。云何止息？懈怠懶惰故。

云何發起？住禪定故。云何止息？心散亂故。

云何發起？智慧相應故。云何止息？無明相應故。
云何發起？多聞善說故。云何止息？不聞正法故。
云何發起？積集智慧故。云何止息？取相分別故。
云何發起？觀蘊如幻故。云何止息？於蘊生厭故。
云何發起？知處如夢故。云何止息？永滅根境故。
云何發起？觀界無生故。云何止息？滅身滅智故。
云何發起？增長梵行故。云何止息？捨實智慧故。
云何發起？五通自在故。云何止息？厭離有漏故。
云何發起？正觀念處故。云何止息？不修念住故。
云何發起？正斷相應故。云何止息？不行正斷故。

云何發起？神足自在故。云何止息？神足不具故。
云何發起？勤習五根故。云何止息？不增五根故。
云何發起？樂修五力故。云何止息？不修五力故。
云何發起？圓滿覺支故。云何止息？不具七覺故。
云何發起？勤修正道故。云何止息？不修八正故。
云何發起？修奢摩他故。云何止息？不善修止故。
云何發起？正觀緣生故。云何止息？厭患緣生故。
云何發起？聞所未聞故。云何止息？以有所聞故。
云何發起？以戒嚴身故。云何止息？厭患蘊身故。
云何發起？辯說無礙故。云何止息？無學默然故。

云何發起？修習三解脫門故。云何止息？不修三解脫門故。

云何發起？降伏魔怨故。云何止息？樂著涅槃故。

云何發起？善修方便故。云何止息？愛樂寂靜故。

云何發起？進求不息故。云何止息？所作已辦故。

云何發起？了俗諦故。云何止息？證滅諦故。

佛告慈氏：如是種種精進行法，皆精進力而能圓滿，無增無減，方能利益一切眾生。所以者何？以能遠離一切相故，皆由智力，而能圓滿精進波羅蜜多。

云何菩薩摩訶薩修習事業？所謂：修習大慈大悲，不捨有為，證真無為不退不轉，乃至無上正等菩提。

慈氏！當知：此即菩薩摩訶薩意業清淨精進波羅蜜多。

復次，慈氏！菩薩摩訶薩有四種精進。云何為四？所謂：①未生不善，能令不生。②已起不善，速令除滅。③未生之善，當令速生。④已起之善，能令增長。

慈氏！當知此即菩薩摩訶薩四種精進。若無此四，云何圓滿精進波羅蜜多？

菩薩摩訶薩，所起精進，乃至布施、持戒、安忍、精進，難捨能捨、難作能作，如是種種難事，精勤勇猛，心無懈倦，所修勝行，一切諸天釋梵護世所不能作。何以故？菩薩摩訶薩廣度眾生出生死海而無度相，皆精進力之所成辦，是則名為精進波羅蜜多。

復次，慈氏！懈怠眾生所修事業功力微少，猶如水滴不至大海。懈怠之人亦復如是，不能得至無上菩提。

譬如有人，手足俱無，行住坐臥不得隨心。乃至微小作業，皆不成就。如是之人，豈能越渡江河大海。懈怠眾生無精進足亦復如是。此懶惰人，於家事業尚無所成，豈有慈悲具修戒慧，能度有情出於火宅，修行菩薩六波羅蜜菩提資糧？

菩薩摩訶薩，以精進波羅蜜多而為船筏，三無數劫福智所成，與諸有情同乘此船，超越生死大海彼岸。

復次，世間眾生總有三種：①懈怠，②非勤非惰，③精勤勇銳。

言懈怠者，於己家務，悉亦棄捨，況能為他營建事業！

非勤非惰者，於大事業，都不能作。設欲進求，遇緣便退。

勤精進者，恒為有情受大勞苦，但利益彼，無念己身。羸惰之人，為懈怠鬼

常所拘執，惑亂身心。

譬如有人，入於大海至七寶山，於是山中寶珠無量，方欲採取，為鬼所著，欬然之間，徒步而返，不獲一寶，裸露而歸。懈怠眾生亦復如是，此瞻部洲福德之地，十善業力來生其中。菩薩觀之，無量無邊十善珠寶遍滿大地，而諸眾生為懈怠鬼之所魅著，狂亂失心，設見妙寶，都無取心。如妙高山不可移動。若精進人取斯寶物，不足為難如舉一毛。

菩薩摩訶薩，為欲圓滿精進波羅蜜多，普為眾生，從無量劫生死長夜，不惜軀命，勤行精進，方至菩提。菩薩觀之，心無懈怠猶如食頃。復更思惟過去諸佛行菩薩行，為欲滿足六波羅蜜，經無量劫亦如食頃。

菩薩摩訶薩復觀現在未來無量無邊一切諸佛，行菩薩行經無量劫方成正覺，

如是劫數，難可校量。

譬如有城，極為高廣，四面高下各百由旬。於此城內滿中油麻，經百千劫除去一粒。如是劫數，漸漸除一。乃至城空，為一大劫。如是大劫，積數滿三阿僧企耶。菩薩摩訶薩經如是劫，常為五趣一一有情，勤行精進，受諸苦惱，方至菩提。

譬如大地末為微塵，如是微塵，寧為多不？

慈氏白佛言：甚多，世尊！

佛告慈氏：假使眾生如彼塵數，菩薩為彼一一有情，如上劫中勤行精進，不惜身命，受諸苦惱，然後乃成無上菩提。

菩薩摩訶薩復應如是思惟：「我於過去如前劫數，勤加精進，具足圓滿六種

波羅蜜多，得不退轉，方至菩提。」

作是思惟：「如是長遠勇猛精進，況於人間年月劫數，而比於彼如剎那頃而成正覺，何不進求？菩薩摩訶薩應勤精進，堅固其心，所捨頭目髓腦、手足支節，無所吝惜。」

如是思已，一心精進，恒無懈倦，此即名為菩薩摩訶薩精進波羅蜜多。

時，薄伽梵而說頌言：

世間諸果實	皆由精進生	大地水火風	根塵由彼有
貪恚癡疑惑	皆由懈怠生	菩薩於此中	常懼如毒箭
如人有技藝	懶惰無所成	懈怠諸男女	慈母不忻見
有智勤精進	菩薩行成就	是人開覺花	能成佛果位

智人常勇猛	了達深義趣	愚癡懶惰人	世所不稱讚
若人無精進	亦無世名稱	無善法資糧	如糞穢不淨
如草及塼石	猶堪世所用	懈怠懶惰人	一切無堪用
譬如衣垢弊	亦如花鬢萎	人若無精進	端正不任用
如人有名稱	由精進安忍	無忍無精進	非女亦非男
懈怠乏資財	卑賤多驕慢	常懼他人語	家務悉不成
如是無精進	雖有眾技藝	恒被人所輕	如蛇無毒氣
雖無諸技藝	唯有勤精進	佛果大菩提	決定皆成就
一切修福業	皆由精進力	如欲受使者	專待王教敕
精進尊貴本	應當勤勇猛	菩薩樂修行	必成無上果

恒住於精進	智者所稱讚	無智執由天	邪見生死本
智者住正見	捨天而精進	應當勤勇猛	能度於彼天
愚劣無精進	捨勤而事天	智者樂精進	遠離於天教
天命及精進	愚智有差殊	信天邪見因	精進招勝果
如有地無種	耕墾何所益	無勤亦復然	天命何所獲
譬如風吹火	隨小漸成大	精進亦復然	善法而增廣
能行諸難行	而獲增勝果	身命無憊惜	當紹於法王

爾時，佛告慈氏菩薩摩訶薩：求菩提時，擐精進甲，以大誓願而為器仗，日夜精勤，增長功德。猶初白月，漸漸圓滿。

譬如有人，聞彼遠方有佛舍利窣堵波塔，及有善說正法之人。此人聞已，歡

喜踊躍，不待資糧車乘伴侶，徒跣而往詣彼塔廟。所經道路，唯是猛火及布利刀。是人勇銳，其心不退，決定前進，達於彼所，瞻禮佛塔，聽聞正法。於火刃中，舉足下足，步步思惟，而發是願：「我於今日，刀火中行，得聞正法。願我當於生死大苦之中，拔濟有情，置於涅槃安樂之處。」

菩薩摩訶薩發是願已。雖踐刀火，如履蓮花。足下柔軟，如須曼那花，復似栴檀香水而洒其上，清涼芬馥，無以為喻。

復作是願：「我從今日，乃至無上正等菩提，於是中間，身口意業，常作佛事。若行餘事，願我此身，如枯槁木。口說餘言，願我瘖瘵。意思餘法，願我狂亂。除正法外，自餘音教，無所樂著。如是三業所修諸善，皆悉迴向無上菩提。」

復願一切眾生，咸成正覺，功德無盡。廣大如法界，究竟若虛空，窮未來際無有休息。

譬如虛空，密雲彌布，降注大雨。若至陸地砂鹵之處，不久便乾，若雨一滴入大海中。海水未竭，其雨無盡。菩薩所作功德，亦復如是。若為自身求於解脫，如陸地雨，不久還乾。若為法界一切有情修於善業投涅槃海，以大悲願，眾生無盡，善亦無盡。

復次，慈氏！譬如菩薩，壽命無量，往於東方經過無量俱胝三千大千世界。所經國土眾生之類，悉皆令得大般涅槃安樂之處。如是，無量阿僧祇劫廣度眾生，我今觀之，如爪上土。其未度者，如大地土。如是東方世界，未度既然。南西北方四維上下，亦復如是。雖有如是無量有情，菩薩摩訶薩亦不厭捨而生

退轉，勤行精進，終無休息。

菩薩摩訶薩能發如是廣大之心，無有少法難修行者。於三界中所有福智，尊貴自在，無勞功力，自然得之。

佛告慈氏菩薩摩訶薩：於諸世間所有過去現在未來一切眾生、學無學人，及辟支佛，如是有情精勤修集無量無邊所有功德。比於如來一毛功德，百千萬分不及其一。如是，所有一一毛端，皆從如來無量功德之所出生。

如來之身一切毛端所有功德，共成如來一髮功德。

如是佛髮八萬四千，一一髮中各具如上毛端功德，如是合集，共成如來一隨好功德。

如是隨好具八十種，一一好中各有如上佛髮功德，如是合集，共成如來一相

功德。

如是諸相具三十二，各具如上隨好功德，如是合集至百千倍，成佛眉間毫相功德，其相圓滿，婉轉右旋，如頗胝迦寶明淨鮮白，夜闇之中猶如明星。毫相舒之，上至色界阿迦膩吒天，卷之如舊，復為毫相，於眉間住。

以此毫相所有功德至百千倍，成佛頂上肉髻之相。所有功德，無有人天能見頂者。

如是肉髻千倍功德，不及如來梵音聲相所有功德，其聲下徹阿鼻地獄，上至色界究竟天中。

如是所說無量功德，皆是如來大悲化現。如是化身，皆由無量功德集成，無比無喻，無與等者。

如是化身千倍功德，成佛報身。如是報身所有功德，百千萬倍成佛法身，所有功德莫知其量。

若有善男子善女人，聞說諸佛如來無邊功德，不驚不怖不畏者，當知是人成就精進波羅蜜多。應發如是廣大之心：「佛身功德無量福聚，我今觀之，誓當修證，勤行精進，不惜身命。為一切眾生，於無量劫，受三塗苦，心不生悔，皆令圓滿具足成就六種波羅蜜多，得成無上正等菩提。」

佛告慈氏菩薩摩訶薩：善男子！應當諦觀佛之智慧，汝今諦聽，當為汝說。

如舍利弗，諸聲聞中智慧第一。此瞻部洲，北廣南狹如頰車相，周匝七千踰繕那量。東勝身洲形如半月，周匝八千踰繕那量。西牛貨洲形如滿月，周匝九千踰繕那量。北拘盧洲地形畷方，周匝十千踰繕那量。妙高山王其相四方，入

水八萬踰繕那量，眾寶所成，出水量等，四寶合成，周圍四面各有八萬踰繕那量。次外即有金山七重，周匝圍繞有八海水，最外復有大鐵圍山。如是四洲及諸山王用為紙素，八大海水以為其墨，一切草木用為其筆，一切人天，一劫書寫，比舍利弗所得智慧，十六分中不及其一。

又於此三千大千世界，其中眾生所有智慧，如舍利弗等無有異。菩薩摩訶薩了達布施波羅蜜多，所有智慧過彼百倍。

又此三千大千世界，所有眾生皆具布施波羅蜜多智慧，不及一菩薩摩訶薩所得淨戒波羅蜜多智慧。乃至般若波羅蜜多，亦復如是。

又此三千大千世界所有眾生，皆具如是六種波羅蜜多智慧，不及一初地菩薩摩訶薩所得智慧。乃至十地菩薩摩訶薩所得智慧，展轉倍增，亦復如是。

又此十地菩薩所得智慧，比汝慈氏一生補處菩薩摩訶薩所得智慧，百千分中不及其一。

時，慈氏菩薩聞佛語已，而作是念：「今者，如來在大眾中作是稱讚，深生悚慄。」

爾時，佛薄伽梵告慈氏菩薩摩訶薩言：善男子！汝今諦聽。

於此三千大千世界，一切眾生所有智慧，皆如慈氏等無有異。

如是等菩薩摩訶薩，詣菩提樹坐於道場，降伏魔怨，將成正覺，所有智慧，於佛如來所得智慧，百千萬分不及其一。

慈氏！當知：如來智慧，甚深無量不可思議，亦非譬喻之所校量。

若菩薩摩訶薩聞是諸佛甚深智慧，不驚不怖不畏者，應加精進，成就波羅蜜

多。懈怠之人，世間小善，尚不成就，況於如來大智彼岸而能廣度一切眾生！

復次，慈氏！有三種精進。

云何為三？①聞此甚深如來廣大智慧，心不傾動。②能隨過去諸菩薩摩訶薩大悲之行，③所行之行，設逢苦難，心不退轉。

又，以精進力，觀察一切世出世間、情非情境，皆悉是空。以觀如是勝義空故，無一眾生有相可得。雖知無相，而為眾生於無數劫修諸苦行，不辭勞倦，常以四攝，布施、愛語、利行、同事，攝取有情，教以三乘令得解脫，次復安置於最上乘得不退轉，一切行願皆悉成就。具足圓滿精進波羅蜜多，諸佛如來與授記莖，近無等等無上菩提。猶如白月十四日夜，漸向圓滿。

菩薩亦爾，於佛菩提，漸向圓滿，得無功用，自然獲得十種勝事。

云何為十？①諸佛正法，不由聽習而悉現前，能為有情宣說妙法。②不思議力，自然能發堅固誓願，能令一切眾生發菩提心。③而得自在身口意業，隨願現生，一切無礙。④能現種種神通變化，隨心自在，無所障礙。⑤能作希奇未曾有事，皆得自在。⑥受生自在。於五趣中，隨機利益，而能生彼。⑦寶藏隨生，調給無盡。⑧常為心師、不師於心，無有卒暴如調伏象。⑨自然覺悟生死涅槃，二皆平等，不由師訓。⑩得無上智，利樂有情，方生死中拔濟令出，置於三乘涅槃正路，究竟無上正等菩提。

復次，精進之人，於生死中說諸過患，顯大涅槃無量功德，大悲般若常所輔翼，由斯不住生死涅槃，利樂有情，窮未來際，是即精進波羅蜜多。

復次，精進之人，聽聞正法，總持自在。以精進力，身無疾病。一切怨害，

慈心相向。微那夜迦作障礙者，無所能為，菩薩言教，悉皆承順。

復次，精進之人，一切諸天恭敬愛念。危難之中，一切善神之所擁護。

復次，精進之人，小有所施，而能圓滿檀波羅蜜多。

復次，精進之人，護持淨戒，不為懶惰之所攝受，速能圓滿淨戒波羅蜜多。

復次，精進之人，善能安忍，怨親平等無有二心，速能圓滿安忍波羅蜜多。

復次，精進之人，勇猛不退，被精進甲，大慈大悲恒不捨離，速能圓滿精進波羅蜜多。

復次，精進之人，勤修靜慮，於三摩地安住不動，速能圓滿禪波羅蜜多。

復次，精進之人，多聞智慧，諷誦無倦而無懈怠，速能圓滿般若波羅蜜多。

然，此般若波羅蜜多甚深大海，一切聲聞、獨覺，及諸菩薩，無有方便而能

測量，唯有精進波羅蜜多而能究盡。

復次，精進之人，日夜增長無量功德。如青蓮花生淤泥中，日夜增長，漸舒出水，其花開敷，香氣芬馥。見者咸悅，取以作鬘，置佛頂上。若天魔梵、國王大臣、長者居士，一切人民，皆悉愛樂。精進之人亦復如是，於彼生死淤泥之中，生菩提芽、出二乘執，開真實相，顯示涅槃，種智敷榮，香氣芬馥，遍十方界，利益人天，如青蓮花，人皆愛樂。是則名為精進波羅蜜多。

復次，懈怠之人，猶如春杵，有二種事：①不能自使，日益損壞。②不能自立，棄地即臥。漸不堪用，以火焚之。

懶惰之人亦復如是，①不自策使，色力日減。②不能勤理家業，常臥睡眠。身壞命終，地獄火中，焚燒受苦。

精進之人，如如意樹，在於生死曠野之中，與諸有情作歸依處，飢渴之者為作飲食，裸露之者而作衣服，乃至能度生死險難。盡此形壽，無所乏少，令一切眾生，安隱快樂。以精進力速能成就阿耨多羅三藐三菩提。

時，薄伽梵說此精進波羅蜜多時，會中七十八俱胝那庾多若人若天，皆發阿耨多羅三藐三菩提心。三萬二千菩薩摩訶薩，皆得無生法忍，至不退轉。

佛告慈氏：此即名為精進波羅蜜多。

⑨ 靜慮波羅蜜多品

爾時，佛薄伽梵處種種摩尼寶王師子之座，為無量無數大菩薩摩訶薩眾之所圍遶。

是諸菩薩，或現天身天眾圍遶，或現龍身龍眾圍遶，乃至或現非人身非人眾

圍遶，或現菩薩身菩薩眾圍遶。光明晃曜，普及大會，靡不周遍。

時，慈氏菩薩摩訶薩，即從座起，偏袒右肩，右膝著地，合掌恭敬，而白佛言：大聖世尊以大慈悲，利益安樂諸菩薩眾，已說精進波羅蜜多。惟願哀愍，宣說靜慮波羅蜜多，令諸有情起大乘行。云何思惟、云何修習如是靜慮波羅蜜多而得圓滿？惟願宣說，我等樂聞。

爾時，薄伽梵告慈氏菩薩摩訶薩言：善哉！善哉！善男子！汝今能問如是深義，利益安樂一切有情。汝等諦聽，善思念之，吾當為汝分別解說。

若善男子善女人，發阿耨多羅三藐三菩提心，應作如是諦念思惟：「佛道懸遠，無人能到，唯有一法饒益有情，所謂正定。若諸菩薩未獲此定，其心未得清淨不動。生死、涅槃，無有二相。」

由此義故，為度眾生，以巧方便，精勤修習相應靜慮無相正智。猶如虛空，清淨無垢，常住不變。

復觀此定，猶如滿月。一切妄想，猶若浮雲。

又此正定如清涼風，能除虛空一切雲翳，朗然清淨，光明照曜。一切有情見皆生喜。如是滿月光明莊嚴，能施有情清涼安樂。如是靜慮清涼之風，能除性空妄想雲翳。正定滿月出現世間大悲光明，能除有情諸煩惱熱，使得清淨安樂涅槃。

爾時，薄伽梵而說頌言：

靜慮能生智 定復從智生 佛果大菩提 定慧為根本
供養讀誦持 施戒及安忍 正智見不二 無二何可得

靜慮為親友	究竟不相離	世間一切法	身歿皆相捨
未來無善伴	父母不能救	況餘諸眷屬	唯靜慮能護
捨此身命時	如棄於土木	親戚皆相離	唯禪定隨逐
此身不堅固	散亂造諸惡	若不修禪定	死墮三惡趣
如人理家務	事畢應止息	如牛踐穀時	被捶猶應食
如盲還本處	慣習不失路	若人樂修定	必歸空寂舍
眾生妄心起	如醫見空花	唯定慧能治	諸佛說如是
眾生心躁動	猶如旋火輪	若欲止息時	無過修靜慮
若於一念中	不勤修靜慮	如人遭賊劫	身命難保全
捨定修餘業	雖獲大果報	猶如雜毒藥	智者不應食

財寶如塵穢	盛色方駛流	若不勤修定	甘露門難啟
如薪火所燒	壯年老所逼	愚不修靜慮	為欲之所害
一切無常吞	皆由貪五欲	禪定棄不修	云何得常住
如人煮少米	惜薪燒梅檀	捨定不修行	散亂亦如是
愚人耽睡眠	流轉生死海	犂牛自愛尾	貪惜喪其軀
輪王壽盡時	七寶皆散失	大臣及妃后	一切無隨者
唯有修靜慮	隨逐不相離	智者樂修行	必到涅槃岸

復次，慈氏！若菩薩摩訶薩欲修靜慮波羅蜜多，先當親近大善知識，復應遠離諸惡知識。

世間不善及惡名聞，由惡友生。諸善法利，名聞福德，皆因善友之所生起。

以依善友，受持淨戒，莊嚴法身。破戒之人，如焦穀種，一切善法皆不得生，況能滋長無漏深定！

如是知已，應當一心奉持淨戒，乃至小罪應生怖畏，寧喪身命，不毀禁戒。如淨戒中，已廣分別。

復次，菩薩摩訶薩，欲修靜慮，先應捨離一切世間治生販賣殖種根栽。何以故？若不捨離，擾亂其心，何能安住甚深禪定？以是因緣，菩薩摩訶薩，於四威儀，斷除妄想，善攝其心，設聞眾聲，亦無動亂。

譬如毒蛇，置竹筒內，其身自直。菩薩亦爾，妄想迴曲，置靜慮中，正見端直，不住生死，不入涅槃，離諸邪曲。

若能如是，善攝六根，不令放逸。眼雖見色而不取相，安住甚深寂靜解脫。

耳鼻舌身意亦如是。恒以正智觀察思惟：「而此三業所作善根，為是自利？為是利他？為益現在？為益未來？」

若無如是利益事者，菩薩觀察，決定不為。猶如世間安立石像，身口意業不動亦然。

設遇瞋罵，應起慈心。或侵利養，不生忿恨。或被打罵，應捨本居，自求寂靜無患難處，結跏趺坐，正念觀察，以大悲心，而為屋宅。智慧為鼓，以覺悟杖，而扣擊之。告諸煩惱：「汝等當知：諸煩惱賊，從妄想生。我法身家，有善事起，非汝所為，汝宜速出。若不時出，當斷汝命。」如是告已，諸煩惱賊尋自退散。次於自身，善起防護，不應放逸。以大悲真言，令諸有情，所求滿足。以方便慧，而為大將。用四念處，以為守護。本覺心王，住第一義禪定宮

闕，安處不動，猶若金剛。以智慧劍，斬煩惱賊，破生死軍，摧伏魔怨。荷負一切，令諸眾生皆得解脫。爾時，菩薩復語其心：「汝於昔時已發誓願，今當自勉，令其圓滿。過去如來已記莚汝：『當得菩提，廣度一切。』」汝於爾時，對十方佛三乘賢聖作是誓願，拔濟一切五趣有情咸令解脫。今諸有情無依無怙無救無歸，若入涅槃，捨於生死，違本誓願。凡諸世間，濡行忠信言尚無二，況汝昔願而不依行。汝於今者，應當正念一心不動，拔濟有情出生死獄，安置無上大般涅槃。」如是思已，住於大乘甚深禪定，是即名為菩薩摩訶薩修習靜慮波羅蜜多。

佛告慈氏：有十六種靜慮波羅蜜多，一切聲聞獨覺所不能知。

①了達生死而無生死，是菩薩靜慮，安住如來清淨禪故。

- ②於諸禪定不生味著，是菩薩靜慮，不住一切定亂相故。
- ③起大悲心，是菩薩靜慮，除諸有情二重障故。
- ④增長正定，是菩薩靜慮，不如三界見三界故。
- ⑤成就神通，是菩薩靜慮，能了有情諸心行故。
- ⑥善調伏心，是菩薩靜慮，不住調伏不調伏故。
- ⑦依無相智，得淨解脫、超諸禪定，是菩薩靜慮，於色無色界得自在故。
- ⑧寂靜極寂靜，是菩薩靜慮，勝出一切聲聞獨覺諸禪定故。
- ⑨無能燒亂，是菩薩靜慮，了心清淨，本無動故。
- ⑩對治毀禁，是菩薩靜慮，除諸有情煩惱習故。
- ⑪入智慧門，是菩薩靜慮，善達世間如幻夢故。

⑫知眾生心，是菩薩靜慮，了諸有情本性空故。

⑬紹三寶種，是菩薩靜慮，能現如來出世間故。

⑭得法自在，是菩薩靜慮，了一切法皆佛法故。

⑮常住不壞，是菩薩靜慮，普門示現、用恒寂故。

⑯遍照一切，是菩薩靜慮，法界平等，無不鑒故。

慈氏！當知此即名為菩薩摩訶薩十六種靜慮波羅蜜多，一切聲聞獨覺所未曾有。

復次，慈氏！菩薩摩訶薩於此勝三摩地，如是發起。如人要火，取木作燧，以手鑽搖，勤求不懈，方得火生。若數休息，終難得火。

菩薩摩訶薩亦復如是，求種智火，以定為燧，安忍為手，精勤不息，便能發

生一切智火。是火生已，燒煩惱薪。以布施水，沐浴清淨。用持戒香，塗摩其身。處大悲座，受法王位。雨大法雨，利樂有情。至大涅槃，安樂解脫。

復次，慈氏！若諸菩薩，心未純熟，於三摩地，心有動轉，猶如惡馬，難可調伏，當知是人退失禪定。應於如是勝三摩地，四威儀中無暫放捨。

若諸菩薩三種心生：①懶惰，②精進，非勤惰。

如是知己，應善調伏，勤加精進，當除懈怠、懶惰、睡眠，及世緣務治生艱難。若離勤惰，其心正直，湛然寂靜。

如人遠行，速即疲極，緩即不至。遲疾處中，任運能達。

菩薩摩訶薩亦復如是，應以中道，安止其心。設身火燃，安處不動，住三摩地，亦無味著。以大智力，常住寂靜，於生死海，拔濟有情，令得解脫。應以

十六種三摩地印，記剎其心，於剎那中有少動念。應當觀察，以正智鉤，制令止住，精勤不息，修行靜慮波羅蜜多。

復次，慈氏！菩薩摩訶薩修靜慮者，有五種障，一切有情，皆被覆翳。所謂五蓋：①貪欲，②瞋恚，③掉悔，④昏眠，⑤疑蓋。除此五蓋，方得禪定身心不動。

是故，菩薩而觀察之：「何因而起？云何遠離？」

菩薩應當先觀色欲猶如水月，水動月動、心生法生。貪欲之心亦復如是，念念不住，速起速滅。

復觀色欲猶如蟒蛇在曠野中，瞋毒發時，頭如蔭蓋。行人熱逼，投此蓋下，為毒所觸，因致命終。貪欲之人亦復如是。行於生死曠野磧中，妄見欲境，生

染著心，欲想纔起，喪失禪定，是即名為貪欲障蓋。

復次，觀於欲性，如地獄火，燒炙有情。如水瀑流，漂沒一切。無有慈悲，猶如羅刹損害有情。亦如獄卒，損人手足。猶如利刀、復如魁膾，斷眾生命。又如砒毒，犯必命終。如墜高山，受大苦惱。如夜黑闇，無所知見。如白癩病，不可療治。又如大海，難使乾竭，貪欲深廣，過於巨海。五欲麤重，如妙高山。如緊波果，端正可觀，若人執之，觸便喪命。如屠羊柱，懸者必亡。如熱金冠，戴之燒死。猶如過去轉輪聖王、釋提桓因、四天王等，及諸力士、那羅延天一切有情，皆因貪欲，興兵相伐，所積身骨，如毘富羅山。過去既然，現在未來亦復如是。

復次，世間之人，於己親屬父母兄弟，極相憐愛，乃至身命，無所吝惜。為

貪欲故，更相憎嫉，起毒惡心，互相殺害。

貪色之人有二苦因：①富貴，為貪色欲，受諸卑賤種種輕欺。②為貪欲刀，挑智慧眼，無所分別，猶如盲人。為此因緣，死墮地獄，受無量苦。

復次，貪欲之人，心無厭足，如火添薪。亦如國王貪於土境，亦如商主貪其財利，如求慧解貪於聽聞，如諸菩薩樂度眾生。如是等人，各於己事，皆無厭足。貪欲之人，亦復如是，無有厭足，求於欲境，憂苦艱難，得已守護，纏縛倍增，死墮地獄，受大劇苦。

求靜慮者，常於如是色欲怨家，不應想念，況親近之！

以是名為貪欲重蓋。

復次，瞋恚蓋者，如耽酒人，飲已色變。瞋恚亦爾，顏容改變，作種種相，

身心戰掉，或行毀謗損惱自他。瞋火燒心，何能修定？劫功德賊，無過瞋恚。修靜慮者，應當遠離。

復次，掉悔蓋者，猶如狂人，身心錯亂。或緣親里國邑壽命苦樂等事，妄起尋求，生善惡念，追悔所作。如是躁動，不能寂靜，覆蔽行捨，障奢摩他。如是名為掉悔重蓋。

復次，昏眠蓋者，疲極憂惱，顰呻欠呿，昏昧不任，能覆輕安，障觀慧品。修靜慮者，應當除棄。是則名為昏眠重蓋。

復次，疑惑蓋者，常懷疑惑，理事不決。障礙施、戒、安忍、精進、禪定、智慧，三世因果。三寶性相，皆不顯現。如何能生微妙靜慮？是名疑蓋。

由此五蓋，學行難成，戒定慧門不能顯了。如是知已，審諦思惟，修定之人

應當遠離。

精勤修習，能除欲苦，獲深禪定，而不味著。由此靜慮，起五神通。

云何為五？所謂：天眼、天耳、他心、宿住、神境智證通。

云何名為天眼智通？

以天眼力，徹見十方無量無邊諸佛世界，所有一切眾生之類，若卵生，若胎生、濕生、化生，有色、無色，有想、無想、非有想非無想等一切有情，如觀掌中阿摩勒果。如有有情，皆被諸苦之所纏縛。菩薩觀已起大悲心，此等有情墮生死海糞穢大坑，我今云何放捨不救？以是應當勤加精進，身心無倦，便能發起念佛三昧。

以定力故，能見十方一切諸佛遍滿虛空，坐金剛座成等正覺，或見諸佛初轉

法輪，或見諸佛往於天上，或見如來從寶階下，或見如來入里乞食，或見如來隨根說法。

或為國王、大臣、長者、居士、婆羅門身，如應說法。

或為苾芻、苾芻尼、信男、信女，如應說法。

或現天、龍、藥叉、阿蘇羅、健闥婆、迦嚕羅、緊捺羅、摩呼洛迦、人、非人等，薛荔多、畢舍遮、鳩畔吒、補旦那、迦吒補旦那、閻摩羅王、餓鬼、傍生，各隨本音，皆言「如來為我說法」。悉得解悟，歡喜踊躍。

或見諸佛為諸菩薩說六波羅蜜，或為緣覺說十二因緣，或為聲聞說四諦法，或勸有情安十善道。

或見諸佛現梵王身，如應說法。或現帝釋身，如應說法。或現護世四王身，

如應說法。或現大自在天身，如應說法。或現那羅延天身，如應說法。

或現日天子身，如應說法。或現月天子身，如應說法。

或現龍、神、藥叉、諸仙、婆羅門等身，如應說法。

或有應見轉輪王身、國王、宰官、諸男女身，和上、阿闍梨及佛如來尊重弟子，皆為現之，如應說法。

或現地獄、餓鬼、傍生異類之身，而為說法，各各聞已，離諸苦難，及離飢渴，不相殘害，慈心相向。

或有應見娑羅樹林入般涅槃，而為現之，如應說法。

或有應見般涅槃後分布設利起諸塔廟，而為現之，令申供養，而得解脫。

如是諸佛現種種相，皆令得度生老病死。

如是諸相，遍滿虛空，皆佛神通自在變現，種種奇特諸希有事。

菩薩雖見如是種種神通變化，但名靜慮所起天眼。不得名為波羅蜜多。

復次，菩薩摩訶薩所得天眼，勝於一切天龍八部、有學無學聲聞獨覺所得天眼。最上最勝最妙最尊、最極明淨，最大勢力。

以此天眼，能見過去無量無邊諸佛菩薩行住坐臥種種威儀種種行門，禪定解脫十地妙智，陀羅尼門無礙辯才，善巧方便悉令圓滿。

如是菩薩天眼清淨，見諸色像，無有障礙，無染無著，不取一切色像之相，能離一切隨眠執見。然，其眼根本性清淨，亦不依止一切境界。

又，此眼根不從一切隨眠煩惱習氣所生，亦無染著，不迷不亂，亦無翳障，無復分別。不為一切諸煩惱障及所知障之所纏縛。於一切法，而得自在。

又，此眼根能了一切諸法平等住真解脫，能知一切差別根性無能壞相，於一剎那能見一切有情之類。

又，此天眼體性明淨，能離一切濁亂之法，而能覺知慈悲之性，不捨有情，亦無縛著，無貪無害。

又，此天眼勝義境界，從真諦生，智為先導，住於大悲，了達諸法，及甚深義，離諸戲論。

如所見聞，能如實說，遠離一切諸不善法，趣向無上正等菩提，心無障礙。

見慳吝者，勸令捨施。見毀禁者，生悲愍心。見多瞋者，令住安忍。見懈怠者，令起精進。見散亂者，令修靜慮。見愚癡者，令學智慧。行邪徑者，示以正道，狹劣心者，示以大乘。令諸有情，入一切智，發勝神通，圓滿菩提一切

智智。

慈氏！當知：此即名為菩薩摩訶薩，修行靜慮所起清淨天眼智通。

復次，慈氏！云何名為菩薩摩訶薩修行靜慮波羅蜜多起天耳通？

所謂：以天耳力，勝於一切天龍八部、聲聞、獨覺，菩薩摩訶薩所得天耳，最上最勝，最妙最尊、最極明淨，有大勢力。何以故？由此功德，迴向無上正等菩提。

菩薩摩訶薩，以此天耳，能聞十方無量世界諸佛如來、獨覺、聲聞、天龍八部、人與非人，乃至地獄、餓鬼、畜生、情非情等，所有音聲。悉皆得聞彼諸有情若干種心，三業差別所出音聲，如是菩薩皆如實知。

凡所發言作善惡因，起貪著語迷惑之聲，亦如實知。

或有言音，理雖真正，言詞麤獷。或有言音，理雖不正，言詞柔軟。或有言音，二俱妙好。或有言音，二俱麤鄙。以此天耳，皆如實知。

又，此天耳能聞一切凡聖之聲，於凡不厭、於聖不忻。於賢聖境起愛樂心，於凡夫境起大悲心。如是一切前中後際所有音聲，皆如實知，不生執著。

又，此天耳普聞十方無量無邊所有世界一切諸佛說法音聲，皆如實知，心無錯亂，亦不忘失，隨根為說，了知法性，無堅不堅、非虛非實。聞一如來所說正法，無邊諸佛所有法門，一時悉聞，不錯不亂、不相妨礙，悉能領受文字章句，義理性相皆如實知。

又，聞如來為諸眾生各隨類音而為說法，令諸有情，了真實相，皆得解脫。以此功德，迴向如來清淨天耳。願於未來，不聞一切聲聞、獨覺二乘之名。

慈氏！當知：此即名為菩薩摩訶薩修行靜慮所起清淨天耳智通。

復次，慈氏！云何名為菩薩摩訶薩他心智通？

所謂：一切有情，過去未來現在之心，善、惡、無記皆悉能知。

復知過去一切有情所作諸業因果差別。

又知眾生大心、小心、非大小心，有欲無欲，有垢無垢心，愚心智心、廣心略心，定亂縛脫，勝劣差別，上心下心，皆悉知之。

又知有情布施、持戒、忍辱、精進、禪定、智慧，有相無相，慈悲喜捨相應之心，聲聞、獨覺、大乘菩薩相應之心。此諸有情能具如是善根之因。

或復有情，生於貴族，所為下劣。或生下賤，心性清淨。或心性不善，所為清淨。或二俱清淨，或二俱不善。如是有情，過去所有心行差別，皆如實知，

隨其所應，而為說法。

此即名為了知過去一切有情他心智通。

復能了知未來有情現在布施，能生未來淨持戒因。

復知有情現在持戒，能生未來安忍之因。

又知現在安忍因緣，能生未來精進之因。

又知有情現在精進，能生未來靜慮之因。

又知有情現修相善，能生未來無相慧因。

又知有情現修小善，能作未來大乘之因。

如是諸心，因緣相貌，菩薩摩訶薩皆如實知，隨緣救拔，心無勞倦。令諸有情，深入佛慧，無有增減。如是說法，無有斷絕，未曾於法，生慳悋心。

此即菩薩能知未來他心智通。

復知現在一切有情，有貪欲心無貪欲心，有過失心無過失心，愚心智心，廣心略心，定心亂心，動心不動心，縛無縛心，垢無垢心，廣大心無量心，上心下心，皆如實知。一一有情，無量煩惱之所繫縛，皆如實知。如是知己，隨根差別，如應說法。了心無心，不著自他，以善方便禪定智慧，決擇有情根性利鈍，永斷生死煩惱根源，了本性空，圓滿無缺，無染無著亦無過失，無滓無穢亦無麤澁。了知諸法如幻如化，能知有情心行差別。

慈氏！當知：此即名為菩薩摩訶薩修行靜慮所起清淨他心智通。

復次，慈氏！云何名為菩薩摩訶薩修行靜慮波羅蜜多起宿住隨念智證通？

所謂：住不動地，得法平等，善能了知諸法實性，清淨智慧，住奢摩他、毘

鉢舍那，止觀相應。於一切事，心無忘失，智為先導，三業清淨。福德、智慧二種莊嚴。自然覺悟，不由師教，到於涅槃常樂彼岸。

菩薩摩訶薩以如是智，能憶過去一生二生，若二十，乃至一劫百千萬億那庾多劫，若成若壞，皆悉憶知。

彼諸劫中，如有情，生如是家，如是父母，如是種族，如是姓字，如是相貌色力壽量苦樂等事，無不明了。

又，諸有情此滅彼生，種種家族自身他身，無量劫生，悉皆憶念。及彼生處所有善根及相勸發，憶念知已，悉皆迴向無上菩提。

又，觀過去生死之身，無常、苦、空、無我、不淨。如是知已，於諸色相壽命修短富貴自在，不生我慢，不求釋、梵、護世四王、人天果報。但以大悲利

樂有情，隨願受生。

又，知過去無量生中所造惡業，深生愧悔。於現在世，能捨身命不造諸惡。於無量世所有善業，悉皆迴向阿耨多羅三藐三菩提，普施法界一切有情。不求世間最上果報，紹三寶種，盡未來際，無有斷絕，永無休息。

慈氏！當知：此即名為菩薩摩訶薩修行靜慮所起清淨宿住智通。

復次，慈氏！云何名為菩薩摩訶薩修行靜慮波羅蜜多起神境智通利樂無盡？

所謂：菩薩住不動地，得真寂靜，除去憂苦、尋、伺、喜、樂、出入息等，不生不滅，住真法界，能現種種神通變化。或身如火聚，放大光明，遍滿三千大千世界。或身上出水，如注大雨。捫摸日月，威光自在。或現大身，上至梵天。或現小身，猶如芥子。或震動大地，如水濤波。或以一身，而現多身。或

以多身，還復一身。或隱或顯，說種種法。或沒山石，或復直過，若上若下，如電流光，往還自在。行坐空中，如鳥飛翔。或履地如水，履水如地，出沒自在，無所障礙。如是神力，皆為利樂一切有情。

復以大悲普門示現。或現佛身，或菩薩身，聲聞、獨覺、釋、梵等身，及諸異類種種之身，隨其根性，皆悉為現，隨其樂欲，而為說法。

或諸有情，恃其力勢而起貢高，隨彼所應，而為現身調伏說法。

或為釋、梵、護世四王、那羅延等諸大力士，為降伏故，舉妙高山擲置他方無量世界，猶如擲彼阿摩勒果還置本處，而諸天人無往來想，菩薩神力亦無損減。

又復於此三千大千世界，上至色究竟天、下至水際。以其右手，掌此世界住

經一劫，行住坐臥而無妨礙，還置本處，而諸有情水性之屬亦無燒害，都不覺知往來之想。

如是菩薩示現自在神通力時，令諸有情，驕慢之心，悉皆調伏，而為說法。

復次，菩薩以神通力，隨意所欲，皆得自在，如如意寶，所求皆得。

或變大海而為牛跡，或以牛跡而為大海。或現火災，至於初禪。或現水災，至於二禪。或現風災，至於三禪。或變水作火、變火為水。如是種種上中下法，隨心變化而得自在，更無有人能動轉者，除佛世尊，餘無能壞。

菩薩以此廣大神變，隨其根緣，說廣略法，令諸有情而得解脫。

如是菩薩自在神力，一切天魔及煩惱魔所不能障。以是菩薩過彼天魔及煩惱魔入佛境界，隨其根緣，拔濟有情，得大自在，常不斷絕，無能動轉。

慈氏！當知：此即名為菩薩摩訶薩修行靜慮所起神境智通化用無盡。

如是五通，但名靜慮，不得名為波羅蜜多。

復次，慈氏！若諸菩薩得此通已，精勤修習靜慮波羅蜜多，於無上菩提得不退轉。

譬如貧人，掘一伏藏，未見異相，猶懷懈慢。穿掘不已，漸見少相，勇銳精勤，無有休息。以不息故，便能得之。菩薩摩訶薩亦復如是，未得阿耨多羅三藐三菩提，日夜精勤，修真靜慮，不休不息，乃至證得無上菩提。

復次，慈氏！如是靜慮，一切有情，發心非難。長時不懈，能成就者，是則為難。

譬如勝軍，侵奪他國，取之不難。得已善守，是則為難。

外道邪師修定亦爾，不近善友、不聞正法，邪求解脫，獲無色定謂得涅槃。壽盡之時，趣地獄報。

復如癡人，畜養毒蛇常飲牛乳。所以者何？世醫皆言「牛乳除毒」。蛇飲乳已，瞋毒轉盛。如是癡人謂「蛇毒盡」，而摩拏之，為蛇所螫，中毒而死。一切眾生亦復如是，日夜畜養如是毒身，為求安樂，常供飲食。無常忽至，死魔毒發，失諸善法，趣向三塗。

復次，慈氏！聲聞、獨覺所得靜慮，斷煩惱障。無大悲心，而入涅槃。非真靜慮。凡夫有情，身口意業，恒為八萬四千煩惱之所纏縛，不得自在。譬如有人，供養怨家、羅剎惡鬼。供給不已，漸得調伏煩惱怨家。惡羅剎鬼，則不如是，供給色香，煩惱轉熾，難可調伏，何能修習禪定解脫？既無禪定，何有智

慧？既無正智，十善亦無，當墮地獄餓鬼傍生。

以是因緣，菩薩摩訶薩，應修梵行四無量心，起無緣慈普遍法界。何以故？菩薩大慈，無有齊限，不可思量，無邊際故。一切有情，遍十方界，菩薩大慈亦復如是。

譬如虛空，無有邊際。菩薩大慈亦復如是。

以是當知：有情無盡，菩薩大慈心亦無盡。真空無盡，慈亦無盡。

以是因緣，菩薩大慈，真實無盡。

爾時，慈氏菩薩白佛言：世尊！菩薩普於如是有情，起大慈悲。頗有譬喻得宣說者，願為開示。

爾時，薄伽梵告慈氏菩薩摩訶薩言：善男子！不可以少因緣譬喻而得宣說。

慈氏！當知：譬如東方有殫伽沙等世界，南西北方四維上下亦復如是。如是十方殫伽沙數世界合為一海，滿中海水，如是十方殫伽沙數世界滿中有情，一一有情各持一毛，取大海水滴於餘處。至滿一劫，是海有竭。彼諸有情尚未窮盡。

善男子！如是，有情遍於十方殫伽沙數世界，菩薩於彼一一有情起大慈心。

善男子！於意云何，如是慈心，有邊際不？

慈氏菩薩白佛言：世尊！假使虛空尚可測量，此大慈心，不可窮盡。

佛告慈氏：若菩薩摩訶薩，聞是慈心無邊無盡，不驚怖者。當知是人，亦得如是慈心無盡。

其慈心者，能護自他，滅除一切諍訟諸惡，能覆有情所有過失。令諸眾生三

業調善，常得安樂，離諸怨怖。多瞋恨者，令其慈忍，息諸戰陣刀兵等苦，悉能救護一切有情。離諸欺誑，名聞十方。釋梵四王，恭敬供養。慈心瓔珞，以自莊嚴。為諸有情，解脫導首。能令二乘，迴心向大，積集一切菩提資糧。不為世福之所屈伏，恒以相好莊嚴其身。能除一切諸根殘缺，捨離八難，得生人天，行八聖道涅槃正路。

菩薩修慈，不貪五欲，但於有情，起平等心。行布施時，心無分別。護淨尸羅，救犯禁者，示安忍力，令離瞋恚。所行精進，皆順正法。住三摩地，慈救一切。發大智慧，出離世間。煩惱、菩提，無有二相。無緣大慈，降魔軍眾，而能安樂一切有情，此生來生，常不捨離。行住坐臥，恒勸修持，我慢消除，離諸放逸。

又，慈心者，慚愧衣服，淨戒塗香，能斷世間煩惱習氣，饒益有情，施一切樂。聲聞慈心，唯求自利。菩薩大慈，救護一切。

復次，慈氏！慈有三種：①眾生緣慈，②法緣慈，③無緣慈。

云何眾生緣慈？若初發心，遍觀有情，起大慈心。

云何法緣慈？若修行時，觀一切法，名法緣慈。

云何無緣慈？得無生忍，無有二相，名無緣慈。

慈氏！當知：此即菩薩摩訶薩住真法界大慈心也。

佛告慈氏：菩薩摩訶薩，修行靜慮波羅蜜多，應當修習大悲無量。為此，大悲於諸善業，而為導首。

譬如命根，於出入息，而為其先。輪王七寶，輪寶為先。大乘萬行，大悲為

先。

譬如長者，唯有一子，父母鍾念，徹於骨髓。菩薩大悲，亦復如是。於諸有情，住於極愛一子之地。

云何大悲？大，名麼賀。麼，者名我。我以大悲利樂有情，故名大悲。

又，賀者，名性。自性大悲，能濟有情，不由他教，故名大悲。

又，娑嚩者，名屬已分。一切有情，我應救護，故名大悲。

又，迦者，名護。不令他人得其便故，名為大悲。

又，此大悲者，能作方便，成辦一切助菩提故。

又，此大悲，能悟無師自然智故。

又，此大悲，能除一切自心熱惱，隨順有情，為饒益故。

復次，慈氏！此大悲心，有五十種：

- ①云何大悲？無諂諛故。
- ②云何大悲？身口相應故。
- ③云何大悲？無虛誑故。
- ④云何大悲？住實際故。
- ⑤云何大悲？不退轉故。
- ⑥云何大悲？了本覺故。
- ⑦云何大悲？無詐偽故。
- ⑧云何大悲？自性清淨故。
- ⑨云何大悲？行質直故。
- ⑩云何大悲？住正性故。
- ⑪云何大悲？求佛身故。
- ⑫云何大悲？求佛壽故。
- ⑬云何大悲？不起一切過故。
- ⑭云何大悲？護有情故。
- ⑮云何大悲？所度有情，無有量故。
- ⑯云何大悲？同虛空故。
- ⑰云何大悲？不捨貧窮諸眾生故。
- ⑱云何大悲？拔諸苦故。

- ①9云何大悲？自性不動，荷負一切故。
- ②0云何大悲？行清淨行，不誑自他故。
- ②1云何大悲？能作自利諸善業故。 ②2云何大悲？普與樂故。
- ②3云何大悲？不生疲倦故。 ②4云何大悲？能除重擔，示勝義故。
- ②5云何大悲？堅持施忍精勤行故。 ②6云何大悲？能忍下劣所輕慢故。
- ②7云何大悲？不懷一切宿憾恨故。 ②8云何大悲？作無上醫故。
- ②9云何大悲？以大乘慧攝下劣乘，等無二故。
- ③0云何大悲？善覆自德，讚他善故。
- ③1云何大悲？能與無漏真法樂故。 ③2云何大悲？能捨所愛，心無悋故。
- ③3云何大悲？為諸有情，心無悔故。 ③4云何大悲？善持淨戒，護毀禁故。

- ③⑤云何大悲？能忍己苦，令諸有情得佛樂故。
- ③⑥云何大悲？成就有情住法身故。
- ③⑦云何大悲？不惜自身，捨支節故。③⑧云何大悲？樂修功德，不求報故。
- ③⑨云何大悲？能調有情，修靜慮故。④⑩云何大悲？了三界空，不染著故。
- ④①云何大悲？積集善根，離不善故。④②云何大悲？能滿一切有情所求願故。
- ④③云何大悲？不捨普願，住無為故。④④云何大悲？捨有為法故。
- ④⑤云何大悲？慳貪有情，令行捨故。④⑥云何大悲？能令有情住佛戒故。
- ④⑦云何大悲？多瞋有情，令住忍故。④⑧云何大悲？懈怠有情，令精進故。
- ④⑨云何大悲？散亂有情，令住定故。⑤⑩云何大悲？愚癡有情，令智慧故。
- 佛告慈氏：如是，大悲能令自他一切善根皆得成就，是則名為大悲無量。

復次，慈氏！菩薩摩訶薩，修行靜慮波羅蜜多。云何修習大喜無量？

所謂：憶念一切佛法，愛樂恭敬，不住生死、不壞喜心，除諸邪見、離五欲蓋，能安有情住真實際，恒求如來三十二相、八十種好，聽聞正法順第一義，恒樂修行達於彼岸，圓滿具足喜慶心生。

譬如世間大節會日，一切親族善友集會，勝妙五欲歡娛喜悅。

菩薩亦爾，起大神變遊戲之時，八部龍天四眾雲集，戒、定、智慧、解脫、知見，悅樂其心，是名大喜。

又此喜者，於諸有情，無損害心，勤求一切諸佛妙法，已得未得心無暫捨。於大乘法，心恒正解。於二乘法，不生取著。

捨離慳悋，增長檀那，見乞者來，心樂惠施。

於他持戒，生淨信心。見毀禁人，極懷憐愍。於己尸羅，清淨圓滿，離三惡怖，迴向法身。

設有毀罵，安忍受之。於軌範師，奉順言教，頂戴尊重，勤而行之。

於諸有情，善言含笑，遠離嗔蹙，先意問訊。住真寂定，無諂無誑，不麁不曲。常讚人善，不說他過。樂與眾同，行六和敬。作大法師，開示涅槃，顯真實相。於尊重所，起父母想。等視眾生，猶如一子。於親教師，尊重如佛。於修行者，猶海導師。諸波羅蜜，如無價寶。於說法人，如如意珠。無漏法林，自在遊戲。教授我者，深自慶喜。聞說過非，如醫示病。聞說正法，如病獲藥。是名為喜。

了苦、無常、無我、不淨，隨順涅槃常樂我淨，一相一味。故名為喜。

又，大喜者，體真勝義，性無生滅，不沉不舉、無去無來、常爾一心。名真喜悅。

又，大喜者，如聞善言，身心適悅，安住不動，猶若須彌。

又，大喜者，明了因果，無迷謬故。

又，大喜者，如地不動，為所依故。

又，大喜者，如威德人，無能敵故。

又，大喜者，如勝義諦，不毀壞故。

又，大喜者，如佛法僧，功德圓滿，求無厭故。

慈氏！當知：此即名為菩薩摩訶薩大喜無量。

復次，慈氏！菩薩摩訶薩修行靜慮波羅蜜多。云何修習大捨無量？

菩薩摩訶薩，修捨無量，總有三種。云何為三？①煩惱捨，②護自他捨，③時非時捨。

云何名為煩惱捨？

若遇恭敬，心不高舉。設遇輕慢，不鄙卑賤。得利不喜，失利不憂。毀罵不瞋，讚亦無喜。稱揚不欣，聞譏不恚。遭苦難時，觀空無我。悅樂事至，恒觀無常。於所愛境，心無貪著。設見嫌恨，亦不生瞋。於怨於親、持戒破戒，其心平等。作善作惡、若愛若憎，都無二相。聞善惡言、正不正法，亦復如是。於諸有情，其心平等。於身命財，不生慳恪。是則名為煩惱大捨。

云何名為護自他捨？

菩薩摩訶薩，若有人來，節節支解。菩薩於彼，無瞋恨心。

如是，菩薩於身語中，未嘗變易，是名為捨。

復次，乞叉多者，是名雙義，及瘡痕義。

雙義者，謂：眼及色。如有二人，於菩薩所，一人打罵、一則香塗。菩薩觀之，等心無二。

瘡痕義者，菩薩觀之，第一義中，誰為打者、誰為塗者？不見損益，亦無彼我，不害自他。是名為捨。

眼根色境，雙義既然，耳聲、鼻香、舌味、身觸、意法，寂滅平等，亦復如是。

於毀讚者，及我六根，第一義中，無傷無害。故名為捨。

設被傷害，亦不損他，是名為捨。

或護自他，俱無傷損，是名為捨。

於利非利，常爾一心，無害自他，故名為捨。

常自覺察，護他人心，離於諍訟，亦名為捨。

復深觀察，無有是非，是名為捨。

如是，名為護自他捨。

云何名為時非時捨？

若諸有情，不受教誨，非法器者，菩薩不瞋，名非時捨。

於聲聞人觀四聖諦，獲苦法忍，趣阿羅漢果，菩薩不障，名非時捨。

行布施時，且止持戒。修淨戒時，且止於施。忍辱、精進、禪定、智慧，亦復如是，名非時捨。

若於諸法，應成就事，決定應作。精進勇猛，長時無倦。無暇無退，不辭勞苦，乃至事畢，方可放捨，是名時捨。

如是，名為時、非時捨。

如是修習慈悲喜捨，但名靜慮，不得名為波羅蜜多。

爾時，慈氏白佛言：世尊！如是修習靜慮為因，悉能具足神通智慧。云何名為神通智慧？

爾時，薄伽梵告慈氏言：善男子！是神通者，能以通力，見極微色，是名神通。以淨法眼，知色性空，亦不取著，是名智慧。

復次，聞諸世間極微小聲，是名神通。於諸音聲，悟無言說，離諸譬喻，是名智慧。

復次，能知一切有情心行，是名神通。了諸有情妄心非心，是名智慧。

復次，於過未際悉皆憶念，是名神通。了佛土空，是名智慧。

復次，了知根性差別之相，是名神通。了勝義空，是名智慧。

復次，能知諸法，是名神通。了俗如幻，是名智慧。

復次，力能超彼釋梵四王，是名神通。超過一切聲聞獨覺，是名智慧。

慈氏！當知：如是名為菩薩摩訶薩修真靜慮得不思議神通果報。

復次，慈氏！一切眾生，恒為無量煩惱擾亂其心。菩薩摩訶薩得真三昧，隨彼有情煩惱品類，現如是等諸三昧門令其解脫。

菩薩摩訶薩勤加精進住是三昧，令諸有情安住如是平等法中。所謂：得心平等、行平等、相應平等，布施、持戒、忍辱、精進、禪定、智慧，悉皆平等。

即一切法普皆平等，是名法性三昧。

復次，慈氏！此三昧平等，即菩提平等。菩提平等，即一切有情平等。一切有情平等，即一切法平等。得如是平等法已，是名住真三昧。

復次，慈氏！此菩提平等，即虛空平等。虛空平等，即一切有情平等。一切有情平等，即一切法平等。得如是平等法已，是則名為住真三昧。

復次，慈氏！一切世間性平等，即清淨性平等。清淨性平等，即一切有情平等。一切有情平等，即一切法平等。得此一切法平等，是則名為住真三昧。

復次，慈氏！若知自心平等，即知一切有情心平等。是則名為住真三昧。

復次，慈氏！若諸有情，能於我身，作於饒益及不饒益。我於彼等，心如大地，普皆平等，其心不動。所以者何？由住是三昧平等性故。以住三昧，無散

亂語、無率爾語，了達諸法、解第一義，善知時節，隨順而說，八風不動。菩薩能住如是平等法性，不捨三昧、不離世間，自在無礙。

是名菩薩摩訶薩，方便智慧靜慮波羅蜜多。

復次，慈氏！云何菩薩摩訶薩，修行出世方便智慧？

若菩薩修靜慮時，於諸有情，起慈悲心，名為方便。觀法寂滅，是名智慧。

復次，修靜慮時，歸依於佛，是名方便。了無取著，是名智慧。

求一切法，是名方便。了法性空，是名智慧。

觀佛色身，是名方便。觀佛法身，是名智慧。

觀佛梵音，是名方便。了無言說，是名智慧。

若正觀時，是名方便。觀照亦空，是名智慧。

拔濟有情，是名方便。了眾生空，是名智慧。

知眾生根，是名方便。根性亦空，是名智慧。

觀佛土淨，是名方便。了佛土空，是名智慧。

得佛菩提，是名方便。了本寂滅，是名智慧。

請轉法輪，是名方便。法無轉相，是名智慧。

觀七覺支，是名方便。了真本覺，是名智慧。

菩薩摩訶薩如是相應修習靜慮波羅蜜多，一切天魔不得其便，即能成就無上菩提。

爾時，薄伽梵說此靜慮波羅蜜多時，會中三萬二千菩薩得日燈三昧。此日燈三昧，亦名一莊嚴三昧。

云何名為日燈三昧？

如日出時，一切燈燭星月無復光明。菩薩得此三昧者亦復如是。有學無學、聲聞、獨覺，諸有情智，映蔽不現。是故名為日燈三昧。

復次，云何名一莊嚴三昧？

所言一者，即是無生。無生者，即是法空。

又，一者，名遍一切處。譬如油麻，油遍麻中。無生法者亦復如是，體遍一切，是名一莊嚴三昧。

此一莊嚴，亦名一增長三昧。一者，即婀。婀，即法界。所謂：契經令法界現前。法界現前已，所有諸法神通增長明了現前，是故名為一增長三昧。

此一增長，亦名一法界三昧。所言一者，即是法界，法界亦空，以定力故，

其空現前，是名一法界莊嚴三昧。

此一法界，亦名一空三昧。所言一者，猶如虛空，一切萬物生長空中。菩薩真空現在前時，信等善法，悉皆增長。是故，名為一空三昧。

復次，慈氏！菩薩摩訶薩住此靜慮波羅蜜多時，能入俱胝那庾多百千三昧。今為汝說少分名字。所謂：

電光三昧，月光三昧，善增長三昧，毗盧遮那三昧，增長不思議三昧，如如光照三昧，無垢三昧，海德三昧，能自在轉一切法輪三昧，成就禁戒三昧，無憂三昧，堅固三昧，蘇迷盧三昧，法炬三昧，法勇三昧，轉法智自在三昧，散積聚法三昧，持一切法三昧，持白法三昧，知他心三昧，莊嚴寶幢三昧，滅煩惱三昧，壞四魔三昧，發起十力三昧，無著三昧，斷縛著三昧，燈手三昧，聞

施名三昧，持地三昧，安住心三昧，須彌燈三昧，摧伏怨敵三昧，智炬三昧，發生智三昧，教授三昧，自在轉無邊法門三昧，令心堪任三昧，知勝妙善三昧，震日月音三昧，無所行三昧，壞魔三昧，無種種想三昧，善調伏心三昧，釋師子三昧，念佛三昧，念法三昧，念僧三昧，不退轉三昧，不昞三昧，最勝無我三昧，似空處三昧，常覺悟三昧，除煩惱緣三昧，如虛空三昧，入功能三昧，念慧覺三昧，無盡辯三昧，大悲聲三昧，現真諦三昧，不毀壞三昧，善行三昧，有情歡喜三昧，知愛樂三昧，生愛樂三昧，勝慈三昧，性淨三昧，大悲三昧，大喜三昧，無所捨著三昧，法義三昧，法悲三昧，慧炬三昧，智海三昧，無動三昧，善調伏身三昧，解脫智自在三昧，金剛幢三昧，勝蓮花道場三昧，離世間法三昧，勝智三昧，佛觀行三昧，威光三昧，威焰三昧，與解脫智

三昧，佛身莊嚴三昧，光明普遍三昧，剎土遍淨三昧，入有情性三昧，滿一切願三昧，順菩提路三昧，波羅蜜莊嚴三昧，寶髻三昧，覺花三昧，與解脫果三昧，甘露音三昧，無滯三昧，疾風行三昧，寶冠三昧，截海流三昧，金剛峯三昧，大神通三昧，出生義三昧，見無邊佛三昧，憶持一切所聞三昧，與剎那智三昧，清淨無邊功德三昧。

如是無量俱胝三昧。若諸菩薩摩訶薩得是三昧者，是則名為靜慮波羅蜜多。

時，薄伽梵說此靜慮波羅蜜多時，會中七十八那庾多人天發阿耨多羅三藐三菩提心，三萬二千菩薩證無生法忍。

⑩ 般若波羅蜜多品

爾時，薄伽梵處於種種摩尼寶王師子座上，現種種相，純以菩薩摩訶薩眾而

共圍遶。

時，慈氏菩薩摩訶薩，即從座起，偏袒右肩，右膝著地，合掌恭敬，而白佛言：大聖世尊已為利益安樂諸菩薩故，說靜慮波羅蜜多。惟願，世尊！為諸菩薩說般若波羅蜜多。

又，此般若波羅蜜多復有幾種？修何方便而能得之？惟願如來分別解說。

爾時，薄伽梵告慈氏菩薩摩訶薩言：善男子！汝今諦聽，善思念之，吾當為汝分別解說。

若諸菩薩修行布施波羅蜜多，乃至靜慮波羅蜜多，皆從般若波羅蜜多本母所生，而為根本。

譬如眼等五根，發生五識，能取五塵，皆有作用。如是一一，皆以識心而為

根本。若離其心，無所成辦。

菩薩摩訶薩修前五種波羅蜜多，恒以智慧而為其母。若離智慧，無所剋獲。

亦如有情，身有命根，能有所作。命根謝已，無復堪任。修行諸度，若無智慧，亦復如是。

譬如國境，無有智臣，陰陽失序，一切人民皆不安樂。

法王國土，若無智慧，亦復如是。修行布施乃至靜慮波羅蜜多，皆不成就，解脫涅槃，終不能得。

亦如商主入海採寶，要得船師，方達寶所，隨意而取。

菩薩亦爾，於生死海，以五波羅蜜多而為舟船，載功德寶。要因般若波羅蜜多無上船師，至於彼岸。

爾時，薄伽梵而說頌言：

智慧為根本	能生善法芽	佛果大菩提	無非智所作
如人遭苦難	智者能救護	愚者造諸惡	如石投深水
若無真智慧	多聞妄分別	斯人不解義	如器安知味
所謂長老相	不必在耆年	雖少有智慧	是為真長老
如世有德人	正直無邪曲	不能辯邪正	寧知理是非
正智聞深法	智與理相應	隨順於大乘	是名真智者
於得失無著	憂喜不能動	安住如須彌	是名真智者
恭敬不生喜	輕慢無瞋恚	智慧如大海	是名真智者
不說他人過	亦不稱己德	智照無自他	當獲大名稱

勇猛勤精進	遠離一切相	我慢悉皆除	是名真智者
常當正觀察	不見他人過	深信善惡報	是名真智者
智者在眾中	不說自功德	若人所稱讚	愧心無取著
成就諸功德	虛己常謙下	如果樹繁熟	枝條自低屈
福智生豪族	雖貴無憍慢	愚者自矜高	智者應觀察
智慧為善伴	遠離惡知識	斷滅諸煩惱	自然得解脫
樂將護惡人	亦當常遠離	崇重於賢善	是名真智慧
菩薩多悲智	損惱猶慈愍	如斫梅檀樹	流香普芬馥
不念他人惡	常思其善事	智慧離分別	人中最第一
智者住空寂	被毀心無惱	諸惡不能燒	如火煖大海

大悲離分別	見惡常憐愍	如日放光明	不棄旃荼舍
智人雖小過	為益應同住	如入瞻蔔林	自然皆蒙熏
正智離分別	如日無私照	亦如清涼月	能淨諸雲翳
智者多慈悲	常濟於貧乏	見乞不輕賤	應生歡喜心
如樹初生長	日夜無休息	智者樂修行	增長亦如是
智者遇大怨	慈悲猶不捨	如折蓮花莖	藕絲恒不斷
生死如毒樹	悟即法身果	生死與涅槃	本性皆平等
淨慧賢聖行	大悲常利物	不擇於怨親	恒離於分別
耆年多智慧	淨戒悉圓滿	親近如是人	速成安樂行
智慧無垢人	三業恒清淨	應親近是人	尊重過父母

無智難親近 能壞善人心 如火燒枯木 應當常遠離

供給於惡人 欲益反招損 如人飼猛獸 無不傷害者

供養智慧人 小善獲多福 如人飲甘露 永得安隱樂

佛告慈氏菩薩摩訶薩：此般若波羅蜜多，皆從善友聞正法生。邪見之人，是智慧怨。汝等應當親近善友、遠惡知識。

此般若波羅蜜多，非唯出生一切善法，過去未來現在諸佛皆從此生。

當知：此經即是一切諸佛之母。

復次，慈氏！菩薩摩訶薩行布施時，有二種智：①小智，②大智。

小智施者，為求人、天、二乘解脫。如是施者，但名布施，不得名為波羅蜜多。

大智施者，心無所得。無所得故，得佛菩提。如是施者，名檀波羅蜜。

以是故，知：檀波羅蜜從智慧生。

尸波羅蜜亦有二種：①小智，②大智。

小智持戒，怖三惡道，求生人、天、二乘解脫。如是持戒，心不清淨，不得名為尸波羅蜜。

大智持戒，普為利樂一切有情，不住於相，而無所得，趣大菩提。

如是持戒，是則名為尸波羅蜜。

以是故，知：戒波羅蜜從智慧生。

忍辱波羅蜜多，亦從般若波羅蜜多生。一切有情，本智如日。無明覆蔽，忍光不現。

修安忍者，除斷無明，聖智現前，佛日斯照。

譬如國邑，無有智臣，識用不均，人民流散。設有智者，亦當迴避。無忍慧者，亦復如是。

又，此智慧如明眼人，遙見毒蛇，即便遠避。有智慧眼，避瞋恚蛇，亦復如是。

無慧眼者，謂：於過去無量劫中，修行諸善，無安忍力，及智慧眼。一念瞋火，燒滅無餘，如乾草積，颯火入中，焚燒皆盡。

智慧之人，有安忍力，設遇惡人打罵訶責，正智安忍，能調伏之。

譬如香象，既已調伏，臨陣驅策，能破敵軍。

菩薩摩訶薩亦復如是，住無相忍，不起瞋恚。無緣大悲，廣度一切。

以是，當知：安忍波羅蜜，從般若波羅蜜生。

精進波羅蜜，亦從般若波羅蜜多而得發生。何以故？若無般若波羅蜜多，一切所作，皆不成就大菩提果。無邊法門，安住最勝，巧便大智，周遍觀察，要精進力，方能圓滿六波羅蜜。

以是，當知：精進波羅蜜，皆從般若波羅蜜生。

禪波羅蜜，亦從般若波羅蜜生。所以者何？意業微細，難可測量。身口所作，則易除滅。妄心所起，難可制伏。如風飄火，猛焰可制。如海濤波，亦可息之。唯有妄心，甚難調伏。何以故？無始無明，迷心性故。

譬如世間，多思覺者，妄起尋求，而伺察之。如是妄想，設入定門，心猶取著。無智慧故，經百千劫，終不能得三昧現前。亦如愚人，妄執諸見，或執我

常、或執我斷，見不清淨，云何能得三昧現前？

有智慧人觀察二事：

①見其自身，多有疾病、苦樂等事，皆由先世妄想顛倒，造作諸業，而今受之。若無癡愛，何有病耶？身本自空，因緣幻有，無造無作，誰受苦耶？

②復應重更觀察，雖無我相，所作福業，皆不唐捐。當願法界一切有情，無盡福德，滌令清淨，悉得成就六波羅蜜，戒定智慧以為莊嚴。

以是故，知：一切萬行，皆以般若波羅蜜而為其母。

猶如大地，皆依虛空，而得安立。而彼虛空，無有所依。般若波羅蜜亦復如是。

以是故，知：禪波羅蜜，智慧為母。非唯五度從智慧生，一切世間福德名聞

人天果報，乃至出世無漏善根，皆以智慧而為生處。猶如大地，皆依虛空而得安立。

一切眾生，執我取相，有五怖畏：①不活畏。常積資財，恐不活故。②惡趣畏。造不善業，恐墮三塗，恒怖畏故。③死畏。愛惜身命，恐喪失故。④惡名畏。恒作諸惡，以自覆藏，恐人聞知，常怖畏故。⑤大眾威德畏。於大眾中，所發言詞，懷怖畏故。

菩薩摩訶薩，智慧觀察，具證二空，能益自他，無不活畏。除斷邪行，具淨尸羅，必至涅槃，無惡趣畏。深入緣起，了本無生，則無死畏。住無相理，身心寂靜，無自他相，離惡名畏。成就微妙四無礙辯，處眾無畏猶師子王，是故名為無大眾畏。

復次，慈氏！一切眾生根性差別。慳貪者令惠施，瞋恚者令慈忍，我慢者令謙下，愚癡者得智慧。開示涅槃顯真實相無量功德，皆從般若波羅蜜生。

一切諸佛及諸菩薩、天龍八部，咸皆讚歎，尊重恭敬，猶如父母。

譬如慈母，唯有一子，鞠育誨示，漸漸成長，令得尊貴。

菩薩亦爾，憐愛有情，等如一子。般若甘露而為法食，五波羅蜜為大資糧，十力、四無所畏、十八不共法，諸妙功德莊嚴法身，成就無上法王之位。

復次，慈氏！有十種事，能障智燈，掩蔽光明，不能顯了，增長癡闇，無所覺知。

①懶惰。於世事業皆不成就，豈能修行出世妙善。

②近惡知識。造諸惡業，增長無明。

- ③耽著睡眠。身心昏昧，不能修習無上菩提。
 - ④聽聞大乘，尋復忘失。
 - ⑤樂習世間一切技藝，不知如幻而生執著。
 - ⑥我慢覆藏，雖遇善友，不能諮問無上正法。
 - ⑦於大乘教微妙深理，不能解悟。我慢自高，便生退屈。
 - ⑧恥己愚昧，不能親近有智之人。
 - ⑨攻乎異端，詐謂知見，有所論難，皆涉邪徒。
 - ⑩於最上乘不生信樂，設有所聞，師心邪解。
- 由是十事，障礙大乘，正法不聞，淪溺生死。
- 離此十事，有十勝法，便能悟入無上菩提：①精勤樂習禪定。②親近善友，

聽聞正法。③損減睡眠，恒自覺悟。④於大乘法，所聞不忘。⑤順世事業，常觀如幻，無所著故。⑥無所藏隱，決眾疑故。⑦不輕己身，勤修行故。⑧常樂法施，興大會故。⑨恒自謙下，不誑眾生故。⑩不自師心，深入佛慧故。

菩薩摩訶薩以此十事，具足圓滿六波羅蜜，成就法身清淨解脫。

復次，慈氏菩薩摩訶薩！此般若波羅蜜多，不與十六種法而為相應：

①不與十二因緣相應，所謂：無明乃至老死。

②不與無明滅乃至老死滅而為相應，菩薩摩訶薩離分別心，無二相故。

③不與身見、邊見，乃至六十二見，而為相應。

④不與世間八風相應，所謂：利、養、稱讚、譏毀、苦、樂、衰、損等事，而為相應。

- ⑤不與隨煩惱等忿恨相應。
- ⑥不與我慢、增上慢等相應。
- ⑦不與根本貪瞋癡等，而為相應。
- ⑧不與煩惱魔、死魔等，而為相應。
- ⑨不與我相、人相、作者、受者、養育、士夫、補特伽羅、意生、儒童、業障、報障、煩惱等障，而為相應。
- ⑩不與妄念分別、見聞覺知，而為相應。
- ⑪不與四顛倒法，而為相應：無常計常、常計無常，無樂計樂、樂計無樂，無我計我、我計無我，不淨計淨、淨計不淨。如是妄計，名顛倒法，有情心行乃至諸塵勞門，而為相應。

⑫不與慳悋、犯戒、瞋恚、懈怠、散亂、愚癡而為相應。亦不與有相行施、持戒、忍辱、精進、禪定、智慧相應。

⑬不與不善等法，性罪遮罪、有漏有為，而為相應。亦不分別世出世善法，有漏無漏，而為相應。

⑭不與二十二根相應，所謂：眼、耳、鼻、舌、身根相應，亦不與苦、樂、憂、喜、捨受相應，亦不與男女等根、意根、命根、信等五根、三無漏根而為相應。

⑮不與三界五趣種種有情而為相應，亦不分別大乘小乘佛法僧寶差別之相而為相應。

⑯不分別真諦俗諦、有為無為、有智無智、有識無識、作意無作意、有體性

無體性、有相無相心意差別而為相應。

慈氏！當知：摩訶般若波羅蜜多，無染無著，離諸分別，平等清淨，一相一味，不與如是差別等法而為相應。

復次，慈氏！菩薩摩訶薩，善巧方便行深般若波羅蜜多時，住奢摩他、毘鉢舍那，住身寂靜，了因緣法如幻如化，順勝義諦，離有離無，非斷非常，隨順因果，無我人相，真實不動，不壞威儀，住三解脫門而不取證。無動無靜，是如來禪，遊戲神通深入實際。不住生死，不入涅槃，不盡有為，不住無為。雖觀無相，不捨大悲。雖住三界，而恒出離。知真無染，而不修證。離於戲論，常樂宣說。

復次，慈氏！菩薩摩訶薩，修行般若波羅蜜多，應於善友聽聞正法，具足八

十四種勝上之心，方能發生般若波羅蜜多微妙勝慧。所謂：

住真實相，最極微妙相，般若相應相，善知識相，離憍慢相，恭敬相，右遶相，無量相，善言相，至誠相，善作意相，無亂相，無定相，妙寶相，妙藥相，除病相，法器相，示導相，入智慧相，聞法無厭相，增長捨相，善調象馬相，敬事多聞相，樂聞深法相，觀身寂滅相，清淨適悅相，聞法無倦相，聞義相，聞法相，隨說修行相，為他說法相，聞所未聞相，聞神通相，不求餘乘相，樂聞般若相，樂聞菩薩藏相，樂聞善巧方便相，四攝法相，聞梵行相，念正定相，能生善巧無生相，大慈悲心相，緣起相，無常相，苦相，空相，無我相，不淨相，寂靜相，空相，無相相，無願相，無不善行相，勝義諦相，不壞相，自在相，護自心相，不捨精進相，思惟妙法相，對治煩惱相，宗重正法

相，對治邪見相，獲聖財相，除斷貧窮相，智者稱讚相，智人極喜相，智者所樂相，崇重賢善相，見諦相，觀蘊過失相，有為過患相，依法相，依義相，依智相，依了義經相，不依不了義經相，不作諸惡相，自利益相，利益他相，善作業相，無熱惱相，勝行相，獲一切諸佛法門相。

慈氏！當知：聽法之人，具足如是勝妙之心，能善聽聞甚深般若波羅蜜多，知一切法，無我、無人、本來清淨。生死、涅槃，平等無二。

復次，菩薩摩訶薩，觀於眼等五根苦樂等受，男女意、命，能起煩惱生死根本。信等五根、三無漏根，能捨煩惱，是涅槃因。知煩惱性，從本以來，不生不滅，性相常住。如是修習，是名般若波羅蜜多。

復次，慈氏！菩薩摩訶薩所修勝行，與智慧相應及不相應，無有分別、二智

平等，不捨眾生，恒起大悲，普覆一切清淨不動。

如是修習，是則名為般若波羅蜜多。

佛告慈氏：此般若波羅蜜多句義不可思議，是相應句、如理句、如量句、佛語句、了緣句、無礙句、無滅句、大捨句、不動句、一切不動句、無依止句、平等句、無難句、無高下句、實際句、不變易句、無著句、無住句、無所住句、對治句、寂靜句、極寂靜句、遍寂靜句、無戲論句、無起句、即真句、不缺句、無餘句、無際句、無對治句、最勝句、真實句、如如句、絕言句、不別異句、無彼此句、三世平等句、無三世句、不住五蘊句、不住六界句、不住十二處句、不住十八界句、依法句、依義句、依智句、依了義句。

如是句義，是菩薩摩訶薩，修行般若波羅蜜多，不可思議，離言說故。真勝

義故、不可思議故、無因喻故、無比量故、無有上故、自利利他故、大希有故，唯佛與佛能證能說，餘無測知。

何以故？般若波羅蜜多，無性無相、無比無喻，唯佛如來方能究盡。

復次，慈氏！此般若波羅蜜多，非即蘊、處、界，無依無止、不生不滅，不內不外，不在中間。是故，般若波羅蜜多不可思議。

爾時，慈氏菩薩聞是般若波羅蜜多，歡喜踊躍，以偈讚曰：

大雄世尊智無量	十力無畏真解脫	神通廣大無邊際	一切無能測量者
昔曾侍覲無量佛	獲得甚深微妙智	難行苦行恒沙劫	是故能成調御師
佛證自然一切智	住真寂滅難思議	唯佛如來自證知	能現無邊佛境界
法性真常離二邊	寂滅無為出三有	煩惱業苦悉皆除	法身清淨真解脫

菩提道場成正覺 唯有諸佛能證知 清淨湛然無去來 無相無行無說示
涅槃無比無能喻 凡夫二乘莫能測 等覺菩薩不能知 唯佛世尊獨明了
佛會一切聲聞眾 逮得己利如來讚 漏盡皆住最後身 此等不知佛境界
一切辟支佛利智 遍滿十方如稻麻 百千萬劫共思惟 不能測知佛智慧

佛告慈氏：菩薩摩訶薩，有七種事，能得如是不可思議無盡法門，謂：

①因無盡、②有情界無盡、③大悲無盡、④妙用無盡、⑤法門無盡、⑥壞生死魔故、⑦智無盡故。

如是般若波羅蜜多，無行無相、無生無滅。菩薩於一切法，應如是知。

佛說是甚深般若波羅蜜多時，會中有一外道，名微末底，即從座起，而白佛言：世尊！佛說「一切諸法，本來不生、自性清淨。」此義不然。

自在天常，而是一切萬物父母，能生諸法，能造能作安立世間。

復有說云：「神我能生一切諸法。然，此我者住於心中，猶如拇指。」

復有說云：「一切諸法，從和合生。」

云何今者，乃說無生？

爾時，薄伽梵告微末底：汝所問者，隨汝意答。斷汝疑心，應當諦聽。

如汝所說「自在天常，能生一切。」所生萬物，應同一性，悉亦是常。若謂所生前後變易，非常住者，理亦不然。用不離體，應是常住。體不離用，應非常故。自在常者，生應常生，云何有時或生不生？既不常生，云何是常？以是義故，同彼所生，定是無常。所生既多，亦非是一。若是一者，應無差別，萬類區分，如何是一？又，自在天能生一切，無有慈悲。若有慈悲，應令有情悉

生人天，常受快樂。云何令諸有情受於八苦，生三惡趣受種種苦？若有慈悲，云何自生自立自害？若自在天，是一是常，所生一切應無變易，云何異類生滅無常，五趣之中受茲不淨？

譬如見果，即知其因，當知自在，非常非一。若言妙好，是自在作。麤鄙不善，畢舍遮為。如是之言，亦不應理。善由自在，惡由舍遮。善惡相違，何名自在？

又諸有情，作惡人多、修善者少，即畢舍遮鬼勝自在天。

又諸有情，所作善事，自在處分。所作諸惡，鬼所教者。汝諸弟子，恒作是言：「為善生天，惡墮地獄。」若生天墮獄，由造善惡，云何言彼自在作耶？

譬如國王，使人宣令賜財授職，但言王賜，終不言是宣教命人。

又如國王使人斷命，但言王殺，不言魁膾。

是即造善，歸自在天。若造諸惡，畢舍遮受。有情何故受苦樂耶？

以是，當知：大自在天決定不能造作一切。

若言一者，有情何故能生無量善惡心耶？以是故，知：亦非是一。

若言一切由自在天，即應純善，何有惡耶？

如人，有時於多人所，作諸惡事，即是惡人。若眾生惡，由自在者，世間咸謂「地獄罪人自作惡業」，汝獨云何推自在耶？

又如果有人謗他作惡，得無量罪。汝謗自在，獲罪亦然。

復次，微末底！自在造作，過失如前。神我過失，倍過於彼。

若我是常、能造作者，此身去住，應得自由，無人能害。云何號哭，而懼死

耶？

若我是常，應能憶念過去造業受諸苦報，故於今生，不應造惡。

又我常者，即應自在，捨於衰老，恆受少壯。如脫故衣，更著新好。云何而有老病死耶？以是當知：我非作者。

復次，微末底！我觀諸法，亦非和合因緣所生。所以者何？因無生性。因若有生，不應待緣。緣無生性亦復如是。

若說因緣，我能和合，此亦不然。如二盲人，各別行住，不能見色。設令同住，不見亦然。

當知神我和合因緣亦不能生。若能生者，應是無常，有作用故。如所生果，定是無常。以是當知：離所生外，無別能生。

或說五大極微是常，能生諸法。此亦不然。猶如水米和合成酒，飲即令醉。如是醉力，不從外來，非水中出，亦非米出，水米和合轉變而生。

一切諸法，無有作者，亦無有我而為因緣。所以者何？大地虛空。水、火、風界，當知亦爾，豈無情物生有情耶？

一切諸法，假有實無。非自在天，亦非神我，非和合因緣五大能生。

是故，當知：一切諸法，本性不生，從緣幻有，無來無去、非斷非常，清淨湛然，是真平等。

爾時，薄伽梵而說偈言：

一切有為法 如乾闥婆城 眾生妄心取 雖現非實有
諸法非因生 亦非無因生 虛妄分別有 是故說唯心

無明妄想見	而是色相因	藏識為所依	隨緣現眾像
如人目有翳	妄見空中花	習氣擾濁心	從是三有現
眼識依賴耶	能見種種色	譬如鏡中像	分別不在外
所見皆自心	非常亦非斷	賴耶識所變	能現於世間
法性皆平等	一切法所依	藏識恒不斷	末那計為我
集起說為心	思量性名意	了別義為識	是故說唯心
心外諸境界	妄見毛輪花	所執實皆無	咸是識心變
色具色功能	皆依賴耶識	凡愚妄分別	謂是真實有
睡眠與昏醉	行住及坐臥	作業及士用	皆依藏識起
有情器世間	非由自在作	亦非神我造	非世性微塵

如木中火性	雖有未能燒	因燧方火生	由此破諸闇
展轉互為因	賴耶為依止	諸識從彼生	能起漏無漏
如海遇風緣	起種種波浪	現前作用轉	無有間斷時
藏識海亦然	境界風所動	恒起諸識浪	無間斷亦然
如酪未鑽搖	其酥人不見	施功既不已	醍醐方可得
賴耶妄熏習	隱覆如來藏	修習純熟時	正智方明了
諸識隨緣轉	不見本覺心	自覺智現前	真性常不動
猶如金在礦	處石不堪用	銷練得真金	作眾莊嚴具
賴耶性清淨	妄識所熏習	圓鏡智相應	如日出雲翳
若有修空者	順空而取空	觀空與色殊	不名真觀者

觀色即是空	色空不可得	此即勝義空	是真解脫者
客塵無自性	無明妄分別	實相非有無	眾生虛妄見
猶如日月明	流光能普照	如來清淨藏	具足諸功德
真妄互相熏	猶如二象鬥	弱者去無迴	妄盡無來去
蓮花性無染	出水離淤泥	菡萏開敷時	見者皆歡喜
如來無垢識	永斷諸習氣	清淨智圓明	賢聖所歸趣
猶如最勝寶	無復諸瑕翳	輪王為寶冠	常置於頂上
如來清淨藏	永離諸分別	體具恒沙德	諸佛之法身
住真無漏界	清淨解脫身	寂滅等虛空	法性無來去
佛現三界中	不生亦不滅	此界及他方	湛然常不動

平等真法界	佛與眾生如	非斷亦非常	大悲恆不盡
諸佛法性身	本覺自然智	是真勝義諦	唯佛方證知
自性體無生	牟尼本寂靜	流轉諸三有	畢竟歸依處
法無來去相	三世常寂然	住真三昧者	見彼法界身
清淨不思議	恆沙眾德備	此即無漏界	諸佛之所依
佛具三種身	體相用平等	甚深廣大性	勝義無差別
無漏無變易	遠離一切相	煩惱及所知	本性恆清淨
無垢無染著	是真調御師	性淨即涅槃	亦是法身佛
體備恆沙德	無垢不思議	六度常圓滿	此即薩婆若
廣大無邊際	永斷於思想	斷習成菩提	具恆沙功德

於諸法自在	普現諸色像	大悲清淨果	常利一切眾
無漏無分別	願力皆圓滿	猶如摩尼珠	隨色皆能現
譬如工畫師	能畫種種相	所現諸境界	皆是識心變
眾生諸性欲	如來悉能知	法身恆不動	願力隨緣現
示現兜率天	降神乘白象	生處於王宮	出家修苦行
即詣菩提樹	降伏諸魔怨	成佛轉法輪	或現涅槃相
示現有生滅	真身恆不動	鈍根樂小法	方便說涅槃
真如法界中	無有涅槃相	大悲樂饒益	引導於眾生
猶如大商主	誘進諸愚少	菩薩廣大心	咸令入涅槃

爾時，微末底聞佛說已，身心適悅，歡喜無量，從座而起，整理衣服，右膝

著地，合掌恭敬，以妙伽他，而讚佛曰：

墮在生死河	邪見所纏縛	迦毘微野娑	迦那仙外道
凡愚被昏蔽	邪見由是生	十力善逝尊	慧日朗明照
或聞那羅延	自在天等教	增長於貪著	令心發狂亂
正見破諸暗	是真如來教	我當至心聽	歸依大聖尊
大梵身四臂	四面蓮花生	演說四圍陀	增長於邪見
唯佛薄伽梵	慧日大聖尊	能破我等疑	真實歸依處

時，微末底讚歎佛已，而白佛言：大聖世尊！我於今者，得大善利，蒙佛慧日正智光明，邪見疑心一切都盡。我今歸依大聖世尊！

復白佛言：世尊！我今所以名微末底，為求異道，心轉疑惑。今於佛前，獲

正法眼，滅疑惑心，名蘇末底。我及弟子，同於今日，歸佛法僧，修行大乘，願無退轉。所得善利，迴施有情，皆向佛道。

爾時，薄伽梵為微末底說是法時，會中無量眾生發阿耨多羅三藐三菩提心，六十二那庾多菩薩證無生法忍。

復次，慈氏！菩薩摩訶薩，修行般若波羅蜜多，應修八法。云何為八？

所謂：①蘊善巧、②處善巧、③界善巧、④諦善巧、⑤緣起善巧、⑥三世善巧、⑦一切乘善巧、⑧一切法善巧。

云何蘊善巧？謂：

觀色蘊猶如聚沫，愚人見之，謂是白氎，入水而取。其沫散滅，不可撮摩。菩薩摩訶薩以正智慧見第一義，了色性空，猶如聚沫。以是因緣，名正知見。

復觀受蘊如水上泡，速起速滅、剎那不住。菩薩摩訶薩以正智慧見第一義，了受性空，猶如水泡。以是因緣，名正知見。

復觀想蘊猶如陽焰，如人熱渴，遠見陽焰，謂之為水。馳走尋覓，近之則無。菩薩摩訶薩以正智慧見第一義，了想性空。以是因緣，名正知見。

復觀行蘊猶如芭蕉，中無有堅，剝之不已，竟無所得。菩薩摩訶薩以正智慧見第一義，知行性空。以是因緣，名正知見。

復觀識蘊猶如幻化，如世幻師，幻作金銀珍寶真珠瓔珞，求其實體，了不可得。菩薩摩訶薩以正智慧見第一義，了識性空，猶如幻化。以是因緣，名正知見。

作是觀已，於諸有情，起大悲心，興拔濟意。如是觀察，名蘊善巧。

復觀五蘊猶如幻夢，皆從妄想顛倒心生，無我、無人、無眾生、無壽命，非養育、非士夫，非補特伽羅、意生、儒童、作者、受者，以善巧方便，了蘊性空。猶如夢想，都不可得，是名菩薩摩訶薩蘊善巧智。

復次，菩薩摩訶薩觀蘊如響，無我、無人，乃至無作者、受者，如是蘊性如空谷響，屬諸因緣。如實了知，等無二相。是則名為菩薩摩訶薩蘊善巧智。

復次，觀蘊如影，從業緣現，無我、無人，乃至受者，如是影性了不可得，等無二相。是名菩薩摩訶薩蘊善巧智。

復次，觀蘊如鏡中像，無我、無人，乃至受者。如是鏡像，非內非外，了不可得，平等無二。是名菩薩摩訶薩蘊善巧智。

復次，觀蘊從緣而有、如幻如化，無我、無人，乃至受者。以善巧智，如實

了知，等無二相。是名菩薩摩訶薩蘊善巧智。

復次，觀蘊是變壞相，無常、苦、空、無我、不淨，性本空寂、非壞、非不壞，如實了知。名蘊善巧智。

復次，云何名為處善巧？

謂：觀眼處，耳、鼻、舌、身、意處，內法皆空。次觀色處，聲、香、味、觸、法處，外法亦空。以正智慧觀第一義，非內非外，名正知見。是則名為處善巧智。

復有處善巧，所謂：了眼、耳、鼻、舌、身、意處皆悉是空，亦無見、聞、覺知之相。名法處智。

復有了法處智，了色、聲、香、味、觸、法處，自性空寂。非眼、耳、鼻、

舌、身、意處境界相。名了法處智。

復有處善巧，謂：眼處，耳、鼻、舌、身、意處，法性空寂、無我我所。色處，聲、香、味、觸、法處，法性皆空、無我我所，非相應非不相應，非善法非不善法，不增不減，無有二相，本來空寂。是名菩薩摩訶薩處善巧智。

復有處善巧智，眼處色處本來清淨無染無著，眼處堅固，寂然常住。如是耳聲、鼻香、舌味、身觸、意法，性本清淨，無染無著，乃至意根堅固寂然常住不變。是名菩薩處善巧智。

復次，云何名為處善巧？

所謂：聖人處非凡夫處，能生聖道，是名為處。凡夫邪行生於惡道，名為非處。

菩薩摩訶薩住八聖道，起大悲心，令諸有情入正定聚。是則名為處善巧智。

復次，云何名為菩薩界善巧智？

謂：觀眼界、色界、眼識界，無我，亦不屬我，亦非眼界、色界，眼識為緣而起。乃至眼界、法界無我，亦不繫屬於我，乃至意識界無我，亦非意識為緣而起。如是菩薩以正智慧觀第一義，知十八界性即是空、無我、無人，法界平等，清淨不動。是名菩薩摩訶薩界善巧智。

復有界善巧，所謂：了法界智，了知地水火風界性是空，堅、濕、暖、動皆不可得，同真際，等法性。是名菩薩摩訶薩了法界智。

復有了法界智，了眼界乃至眼界性空，色界乃至法界性空，眼識界乃至意識界性空，亦無見聞覺知分別之相。是則名為了法界智。

復次，云何名為諦善巧？所謂：四諦，苦、集、滅、道。觀此五蘊，苦苦、行苦、壞苦。名苦聖諦智。

了知無明增長五蘊，名集諦智。

不起貪欲，滅盡諸苦，名滅諦智。

為此滅故，修八聖道，名道諦智。

是名菩薩摩訶薩諦善巧智。

復有諦善巧，所謂：知苦無生，名苦諦智。知集不起，名集諦智。了本不生今則無滅，名滅諦智。於不二相修中道觀，名道諦智。是則名為諦善巧智。

復次，菩薩摩訶薩了知苦受空無自性，能觀正智亦復皆空，名苦中苦智。

觀集緣起，從緣幻有，能觀正智亦皆是空，名集中集智。

知貪愛滅，既本性空，正智現前，清淨平等，名滅中滅智。

知出苦道了不可得，正智觀察，自性皆空，名道中道智。

如是正智，離諸分別。是名菩薩摩訶薩諦善巧智。

復次，能知生苦體即無生，名苦中真智。

知生集起，集無和合，名集中真智。

知生本無，即無有滅，名滅中真智。

知出苦道，離有離無，是名道中真智。

菩薩摩訶薩如實了知，名諦善巧。

復有諦善巧，所謂：三諦，世俗諦、勝義諦、實相諦。

世俗諦者，謂：一切世間語言文字、見聞覺知。

勝義諦者，謂：心行處滅，無復文字，離於一切見聞覺知。

實相諦者，所謂：一切相即無相，如是無相即是實相。

菩薩摩訶薩，於俗不染，觀真不住，一相平等，是則名為菩薩摩訶薩諦善巧智。

復有二諦，所謂：世諦、真諦。

世諦者，所謂：一切世間色心等法，如實而見，稱實而知。

真諦者，謂：二空理，清淨湛然，究竟寂滅，化之不厭，知真無取，無法可得。

是名菩薩摩訶薩諦善巧智。

復有一諦，謂：即真如清淨法界，無生無滅、非斷非常，遠離二邊，究竟安

樂，於生無生心無二相。是名菩薩摩訶薩諦善巧智。

復次，云何名緣起善巧？

菩薩摩訶薩，觀察緣起流轉不斷，無明緣行，行緣識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱。

菩薩以正智慧如實了知緣起無性，無生無滅，法性現前，無心無作、無主無攝。是名菩薩摩訶薩緣起善巧智。

復次，所有善因不善因、動因不動因、生死因涅槃因，如此因等皆如實知。所有眾生利根鈍根如是根性，如是因，如是緣，如是果報，如是本末，皆如實知。隨其因緣，生善修集而無所失。是名菩薩摩訶薩緣起善巧智。

復次，妄想滅則無明滅，無明滅則行滅，行滅則識滅，識滅則名色滅，名色滅則六入滅，六入滅則觸滅，觸滅則受滅，受滅則愛滅，愛滅則取滅，取滅則有滅，有滅則生滅，生滅則老死愁歎苦憂惱滅。菩薩摩訶薩，以正智慧了知緣起，無生無滅、無主無攝。是名緣起善巧智。

復次，慈氏！一切因緣，皆假和合，無有自性。不從我、人、眾生、壽命而得生長，為是有情說如是法，無量無邊，無有窮盡，如實了知。是名緣起善巧智。

復次，菩薩摩訶薩，了知一切緣生之法，無生無滅、無盡之相。此無盡相，即菩提相。是名菩薩摩訶薩緣起善巧智。

復次，云何三世善巧？

謂：念過去所有善法，如實修行。不善之法，常當遠離。如實知已，悉皆迴施一切有情。是名菩薩摩訶薩過去善巧智。

復念未來所有善根菩提資糧，皆悉迴向一切智智。是名菩薩摩訶薩未來善巧智。

復次，現在所有正念相應善法，不起邪念相應不善。是名菩薩摩訶薩現在善巧智。

復次，觀於過去皆悉是空，現在未來亦復皆空，三世平等，住第一義。是真解脫。

復觀過去、現在、未來一切諸佛福德智慧，生隨喜心。是名菩薩摩訶薩三世善巧智。

復觀過去已滅、未來未至、現在不住，三世善法所修勝行，悉願迴向無上菩提，現在善法，剎那不住，而恒發起菩提之心。是名菩薩摩訶薩三世善巧智。

復次，過去已滅，未來未至，現在不住。如是生滅，念念不住，心常覺悟。是名菩薩摩訶薩三世善巧智。

復次，菩薩不思議自在神通，能憶過去所種善根，現在所修諸善，未來覺心當願圓滿，願皆迴向無上菩提。是名菩薩三世善巧智。

復次，為欲成就諸有情故，憶念過去所有善根，一切有情，隨彼彼根依願成就，所有供養未來諸佛，一切有情，隨彼彼根當來成就，所有現在一切有情，神通說法種種教化隨根成就。如是三世利益自他，圓滿菩提勝妙之行。是名菩薩三世善巧智。

復次，云何名三乘善巧？

謂：聲聞乘、獨覺乘、菩薩乘，依此三乘而求出離。

云何菩薩摩訶薩於聲聞乘善巧智慧？

遇佛出世，聞四諦法，因聲悟理，生正見故，是名聲聞。

修淨戒故，圓滿戒身。得禪定故，圓滿定身。見諦理故，得智慧、解脫、解脫知見身。是名菩薩摩訶薩於聲聞乘得善巧智。

復有聲聞乘善巧。於三界中，生疲倦想。於有為法，深觀無常。見一切法，悉皆無我，涅槃寂靜，歡喜愛樂。

復觀五蘊如怨賊，觀諸界如毒蛇，觀內六處如空聚，常願出離。樂於涅槃，起依怙想。是名菩薩摩訶薩於聲聞乘而得善巧。

復次，云何菩薩摩訶薩於獨覺乘善巧？

謂：厭諸有為，樂於出離，少欲知足，離諸戲論，樂居閑寂。於諸因緣，自然覺悟諸法無常，而得解脫。是名菩薩摩訶薩於獨覺乘善巧智。

復次，云何菩薩摩訶薩於大乘法而得善巧？

大乘功德，無量無邊，悉令有情，咸皆悟入彼最上乘，無有障礙。無生無滅得大智慧，積集一切福德善根，一切有情所受用故。成就諸波羅蜜，令諸心行善調伏故。增長無上大菩提故。有大威力，詣菩提樹，坐於道場，觀眾生根大悲不捨，無障無礙普於一切，悉皆憐愍等如一子，能越一切惡道諸怖畏故。能令一切佛法皆現前故。摧伏外道諸魔怨故。建立菩提勝法幢故。能除斷常諸結使故。得佛如來無礙智故。豐益佛法諸珍寶故。隨根利益無錯失故。養育有情

大悲成故。十力、無畏、不共佛法、相好功德瓔珞莊嚴無過失故。如是，所有
一切善巧，是名菩薩摩訶薩大乘善巧智。

復次，一切諸佛之所乘故，具足七法佛為大乘，如轉輪王具足七寶。

云何為七？所謂：大觀察故、大隨順故、大智慧故、大精進故、大方便故、
大證悟故、大事業故。

大觀察者，菩薩摩訶薩，親近善友，聽聞正法。於一剎那，悟一切法，實相
現前。

大隨順者，菩薩摩訶薩，成就大智大定大悲，利益自他故。

大智慧者，菩薩摩訶薩，見真實相，我法皆空。

大精進者，菩薩摩訶薩，於無量阿僧祇劫，大悲萬行能成辦故。

大方便者，菩薩摩訶薩，得平等忍，不住生死、不證涅槃。

大證悟者，菩薩摩訶薩，證力、無畏、不共佛法，無量無邊大功德故。

大事業者，菩薩摩訶薩，於生死中得大菩提，成就圓滿恒沙萬億佛事業故。

具足如是七種勝法而為法王，是名菩薩摩訶薩大乘善巧智。

復次，云何一切法善巧？

謂：有為、無為。菩薩於此二法，巧便最勝。於身善行、口善行、意善行，清淨增長，迴向無上正等菩提。是名菩薩有為善巧智。

菩薩於身、口、意具三無作，清淨平等，迴向無上正等菩提。是名菩薩無為善巧智。

復有善巧，謂：菩薩摩訶薩於布施、持戒，乃至靜慮，增長修習，迴向無上

正等菩提。是名菩薩有為善巧智。

復以般若波羅蜜多，離一切相修諸波羅蜜多，迴向無上正等菩提。是名菩薩摩訶薩無為善巧智。

復有善巧，以方便智，行四攝法，攝取眾生，是名菩薩摩訶薩有為善巧智。

復有善巧，住第一義，雖攝眾生，而無取著，迴向菩提，是名菩薩無為善巧智。

復有善巧，了知煩惱增長生死，菩提分法斷絕生死，是名菩薩有為善巧智。

復次，知空、無相、無願三解脫門，能於無上正等菩提，決定平等、無二無別、無有退轉。是名菩薩無為善巧智。

復次，有為善巧，行於三界不著三界，是名菩薩有為善巧智。

了知三界，性皆是空，如幻如化，而不取著。是名菩薩無為善巧智。

復次，如是了知法性清淨，無相無名，具一切智，名為實智。為度眾生，假名方便，如是分別，是名權智。

菩薩摩訶薩，於此八法二智自在，名為般若波羅蜜多。

復次，悉能了知一切法性，名為智慧。所有觀察善不善法，名為方便。隨順解脫離諸分別，聖智現前，名為般若波羅蜜多。

復能如是善巧分別諸見結使，以奢摩他、毘鉢舍那，如是拔除，是名方便。而能圓滿無上大願，是名智慧。

除彼熱惱使得清涼，是名方便。能解煩惱性不可得，是名智慧。

除身心苦，得輕安樂，是名方便。遊法園苑，得念總持，理智現前，是名智

慧。

與諸有情，作依止處，是名方便。能依所依，無住無著，是名智慧。

獲三十七菩提分法，是名方便。應常離念而與實相智慧相應，得大法樂，是名智慧。

復能生長五波羅蜜，是名方便。隨所樂乘同歸佛慧，自性照明，是名智慧。

能度一切生死瀑流，是名方便。實無眾生得滅度者，是名智慧。

建立正行，是名方便。見本性空，是名智慧。

除客煩惱，是名方便。善能覺悟智性無染，是名智慧。

行無所行，是名方便。悟於法空，是名智慧。

不著三界，是名方便。令諸菩薩了第一義，是名智慧。

攝諸眾生行於萬善，是名方便。一切賢聖同一法界，是名智慧。

隨其根性，除妄分別，是名方便。見本清淨，寂滅無生，是名智慧。

能起方便，斷滅癡闇，是名方便。深入禪定，不住禪定，是名智慧。

誘導二乘，是名方便。除斷法執，入佛知見，是名智慧。

隨眾生根，令生勝解，是名方便。了根性空，是名智慧。

超妄境界，是名方便。示勝義諦，是名智慧。

權說四諦，是名方便。於諸修行，了不可得，是名智慧。

勤求功德，悲願無盡，是名方便。了應非真，不來不去，法界平等，是名智慧。

隨緣普示，教化一切，是名方便。了煩惱性，本來解脫，是名智慧。

了知結使虛妄分別，是名方便。了眾生心本來寂靜，是名智慧。

勸令修斷隨眠習氣，是名方便。一切眾生心行差別，八萬四千諸塵勞門即佛慧門，是名智慧。

聲聞、緣覺善巧勸修漸入佛道，是名方便。菩薩修行如是般若波羅蜜多，疾證阿耨多羅三藐三菩提，是名般若波羅蜜多。

佛說此摩訶般若波羅蜜多時，會中三十二俱胝菩薩摩訶薩得無生法忍，七十萬八千眾生發阿耨多羅三藐三菩提心。

此會大眾，各以種種妙花、寶幢、幡蓋諸莊嚴具，瞻蔔花香供養般若波羅蜜多，散於如來及慈氏菩薩摩訶薩等諸菩薩上。

一切諸天，於虛空中作天妓樂，種種歌頌讚歎如來於無量劫成就菩提無邊功

德。

爾時，佛告一切大眾、慈氏菩薩摩訶薩：汝等能問甚深般若波羅蜜多，大乘功德無盡法門不可思議。彼諸會眾聞是經者，亦當圓滿如是功德。若聞是經生信解心，受持讀誦書寫解說，如是等人利益無量不可思議，亦非譬喻算數之所能及。

爾時，薄伽梵解絡掖衣，授與慈氏，而作是言：善哉！善哉！善男子！汝能問此甚深般若波羅蜜多，一切十方諸佛如來悉皆隨喜。

時，慈氏菩薩受佛衣已，頂戴尊敬，而作是言：此衣即是如來真身制底，一切天，龍，人非人等，皆應作禮，右遶恭敬，種種供養。

爾時，大眾忽見無量雜花、寶鬘、幡蓋，從十方來，住佛頂上，在虛空中，

須臾之間遍覆大會慈氏菩薩大眾之上。又，於幡蓋供養具中，出大音聲讚言：

「善哉！善哉！慈氏菩薩摩訶薩！快問斯義。我等深心隨喜供養。」

爾時，舍利弗白佛言：世尊！此等花鬘、幡蓋，從何而來，出是音聲讚歎隨喜？

爾時，薄伽梵告舍利弗言：善男子！此慈氏菩薩，於過去世行菩薩行，度脫無量百千萬億諸眾生等，於今有住菩薩不退地者，或在聲聞、獨覺、人、天之中，彼諸眾生，以宿因緣，於十方界各以種種寶花鬘蓋，供養般若波羅蜜多經及佛如來，讚歎慈氏如是功德，有是音聲。

說此語已，一切眾會於慈氏菩薩摩訶薩所，深生尊重，咸作是言：我等今日得大善利，得見是人，親近供養。於如來所，得聞是經。

世尊！此諸眾生，得聞佛名及慈氏菩薩摩訶薩名，尚得無量無邊功德，何況親於佛前得聞是經信解受持！

爾時，世尊告舍利弗：若有善男子善女人，於一劫中種種布施，金、銀、瑠璃、珊瑚、瑪瑙、真珠、摩尼、頭目髓腦，無所吝惜。護持禁戒，安忍精進，修諸禪定，若聞此經一四句偈，我說此人成就大乘般若波羅蜜多。而此功德，勝前功德。若離此法，諸波羅蜜悉不成就。

舍利弗！以是因緣，若善男子善女人，聞此經典，信解受持思惟修習，我說是人速能成就無上菩提。當知：是人則為已得諸佛如來菩提法印。

舍利弗！若有菩薩說此經時應發是願：「我今應當諷誦此經，廣為人說。」能生此念，即名圓滿檀波羅蜜。何以故？一切施中，法施最勝。

若持此經，守護法身，即是圓滿戒波羅蜜。

順無生忍，亦即名為忍波羅蜜。

如理不懈，此即名為精進波羅蜜。

安住寂滅，此即名為靜慮波羅蜜。

得自然慧，不由他悟，是即名為般若波羅蜜。

舍利弗！若復有人，受持此經四句偈等，速能圓滿無上菩提。

若諸菩薩，持此法要，讀誦書寫，或持經卷，所在之處，則為有佛。當知：是人已得如來一切法藏。

若有受持此經典者，形雖差別，而菩提心，無有二相。何以故？舍利弗！此經則是不退菩提實相法印。以是當知：若諸菩薩隨順此經，當知是人得不退轉

無上菩提。若諸菩薩隨順此經，當知則是隨順一切佛法。

爾時，護世四天王及諸眷屬，悉皆合掌，尊重恭敬，一心正念，而白佛言：世尊！我等四王，今為如來作護法眾。若善男子善女人，持此經者即是法師，我當承事供養恭敬，如佛無異。何以故？一切諸佛及大乘法，皆從此經出故。

爾時，天帝釋白佛言：世尊！我雖從佛得聞餘經，未曾得聞如是甚深最勝經典。我今堪任，與諸天眾，隨此經典所在國土、城邑、聚落、山林、樹下空閑之處，有受持讀誦書寫解說，我等諸天為作聽眾。以是經故，令彼國王后妃眷屬色力增盛，永無憂患。大臣卿相，一切人民，及說法師，我等常當共作擁護令無衰患。令諸國界，陰陽順序，無諸愆失。一切怨敵，無能侵害。稼穡成熟人民安樂，增彼法師色力辯才自在無礙。又令法師處大眾中，得大無畏，如師

子王，廣為他說。

爾時薄伽梵告天帝言：善哉！善哉！憍尸迦！汝於此經及說法師，如是擁護令無衰患。汝今當知：若護法師則是護法，若護法者，則護國土及一切眾生。

爾時，索訶世界主大梵天王白佛言：世尊！我與梵眾天等，捨禪定樂，隨此經典及說法師所在之處，我當往彼為現四相，令彼法師知我等來。云何為四？一者見大光明，二者聞有異香，三者令彼法師辯才無礙，四者令諸聽眾專念一心。以此四相，知我在會，聽聞正法，為作擁護。」

爾時，魔王波旬白佛言：世尊！佛說此經，令我宮殿皆無光色、震動不安，力勢衰損。所以者何？以諸菩薩摩訶薩聽此經故，若此經典在在處處，有善男子善女人等，受持此經，乃至一偈一句，一經於耳，信解受持。當知：此人已

受阿耨多羅三藐三菩提記，當紹佛位。

爾時，魔王波旬白佛言：世尊！彼善男子善女人，以受持是經，令我眷屬威德勢力悉皆摧滅。若有人受持讀誦書寫解說此經典者，所在之處，我等誓願常作擁護，不起一念障礙之心。

爾時，薄伽梵告舍利弗：汝當於未來世受持讀誦流布此經，為令正法得久住故。

舍利弗言：唯然，世尊！我當受持。

復告阿難言：汝當受持讀誦流布此經。

阿難陀言：唯然，世尊！我當受持。我等雖能奉行不得如諸菩薩廣宣流布。

佛告阿難：勿憂此經不能流布。無量菩薩摩訶薩，盡在此會，悉願傳通。

會中有六十俱胝菩薩摩訶薩，為欲護持此經典故，從座而起，白佛言：大聖世尊！我等誓當於十方界流通此經。此索訶世界，自有慈氏宣布是經，不令斷絕。若佛滅後後五百歲，有諸眾生，於此經典，暫得聽聞一經於耳，當知此人佛所記莚。受持此經一偈一句，當知皆是慈氏菩薩摩訶薩威神之所建立。

爾時，薄伽梵告諸菩薩言：善哉！善哉！善男子！汝等今於我所護持此經，當於無量殞伽沙佛所亦護是經。

時，慈氏菩薩摩訶薩，長跪合掌，而白佛言：大聖世尊！我問此經，觸犯如來，今於佛前至誠懺悔。惟願慈悲，哀恕我過。及諸菩薩亦當受我如是悔過。

佛告慈氏：汝於是經，得深理趣般若波羅蜜多，於大乘法，無有疑惑。於身口意，無有誤失。一切諸佛，共印可汝。我亦如是。汝所說法，如我無異。

爾時，阿難白佛言：世尊！當何名此經？我等云何奉持？

時，薄伽梵告阿難言：此經，是過去、現在、未來菩薩摩訶薩大乘理趣，亦為一切眾生眼目，亦為諸佛本母，所以此經，名《大乘菩薩理趣六波羅蜜多無量無邊無盡義經》。以是名字，汝當奉持。

佛說是經已。具壽阿難陀等諸大聲聞，慈氏菩薩摩訶薩等諸大菩薩，一切世間天、龍、藥叉、阿蘇羅、健闥婆、迦嚕羅、緊捺羅、摩怛洛迦、人非人等，及不眴世界無盡藏菩薩摩訶薩等，一切大眾聞佛所說，皆大歡喜，信受奉行。

大乘理趣六波羅蜜多經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>